

Undurkah Mahathir?

**Dilema
Dollah Badawi**

◆ 16 MAY 2003

NASKAH PEMELIHARAAN

PERPUSTAKAAN NEGARA MALAYSIA

APB 01097825

M
320-9595
MSO

MOHD SAYUTI OMAR

**UNDURKAH MAHATHIR?
DILEMA DOLLAH BADAWI**
Cetakan Pertama April 2003
Kod TM/BP 26/01(2003)

© MOHD SAYUTI OMAR(MSO)

Hakcipta terpelihara - mana-mana bahagian di dalam penerbitan ini tidak boleh dihasilkan semula, disimpan dalam sistem simpanan kekal atau dipindah dengan sebarang bentuk atau sebarang cara samada elektronik, sawatan, salinan foto, rakaman, skan dan sebagainya tanpa terlebih dahulu mendapat keizinan daripada Penerbit/Penulis.

Penerbit:
TINTA MERAH
Wangsa Melawati
53300 Kuala Lumpur.
Tel: 03-41498799

Pencetak:
NOHAS CETAK SDN. BHD
Rawang Selangor, Malaysia.

ISBN: 983-9032-31-3

K a n d u n g a n

Muqadimah	i
1. UNDURKAH MAHATHIR?	1
2. PAK LAH BEBAS ANWAR	15
3. MUSTAHIL ANWAR BEBAS 14 APRIL	29
4. UMNO PASCA ERA MAHATHIR	43
5. MUNGKIN ANWAR SERTAI UMNO?	59
6. BA SELEPAS KETIADAAN MAHATHIR	69
7. DILEMA PAK LAH SATUKAN MELAYU	83
8. PERCUTIAN MAHATHIR UJIAN BUAT PAK LAH	91
9. KELANTAN DALAM GENGGAMAN PAS	107
10. MUSTAPA MOHAMED JADI MB KELANTAN	123
11. BILA PILIHAN RAYA UMUM KE 11	139
12. MENGAPA LUTFI MENYALAK BUKIT?	147
13. PENUTUP	155

Muqadimah

BERSYUKUR saya ke hadrat Allah s.w.t. kerana taufik dan hidayah serta *sir* dan *tajalli*Nya dapat saya mem persembahkan buku ini kepada anda budiman. Tidak lupa juga terima kasih kepada Muhammad s.a.w. dimana dengan rahmat dan syafaat bagindalah memungkinkan kita mendapat petunjuk yang benar dan berada di atas dunia ini. *Allahummasalialasyaidina Muhammad walaalhi syaidina Muhammad.*

MENULIS dan menerbitkan buku politik sebenarnya bukan perkara mudah dan dilakukan secara isengan. Kerja ini menuntut beberapa sifat tertentu. Antara sifat yang perlu ada kepada seseorang penulis lebih-lebih lagi penulis buku politik selain modal, bakat; ketajaman membuat ulasan dan analisis, ia memerlukan keberanian sebagai sifat tunjang kepada seseorang penulis.

Kombinasi tiga perkara itu sangat penting dalam menentukan kejayaan seseorang yang ingin jadi penulis. Kenapa saya berkata begitu sebab kalau seseorang itu tidak

memiliki salah satu perkara itu belum tentu dia sempurna menjadi penulis.

Katakan seseorang itu mempunyai bakat serta keberanian dalam mendedahkan sesuatu isu atau skandal, tetapi jika dia tidak mempunyai modal mungkin impianya tidak tercapai. Ini kerana tidak banyak pernah sanggup untuk menanggung risiko di atas penerbitan buku politik.

Pun begitu juga kalau seseorang itu ada modal, ada isu dan bakat tetapi tidak ada keberanian dia juga tidak akan muncul menjadi penulis politik yang kontroversi. Isu atau kritikan dalam buku politik haruslah realistik dan berani kerana ia tidak akan didedahkan oleh media massa arus perdana.

Maksud berani di sini bukan berani menunjuk-nunjuk tetapi berani yang sebenarnya. Berani membuat pendedahan fakta-fakta sahih dan bersifat rahsia demi kepentingan awam. Dan juga berani termasuklah bersedia menanggung risiko zahir dan batin. Berani bertanggungjawab terhadap apa yang didedahkan dan berani pula untuk mengatakan yang *haq* meskipun disebabnya terpaksa menggadaikan maruah dan nyawa.

Profesional menulis buku politik berlainan dengan bidang kesasteraan atau kesenian. Subjek yang dibicarakan di dalam buku politik ialah mengenai manusia – tokoh politik itu sendiri. Makanya dalam pendedahan dan pembongkaran sesuatu isu itu tentulah akan timbul rasa tidak menyenangkan sesuatu pihak ataupun kumpulan.

Dalam setiap pendedahan secara realitifnya ia melibatkan dua puak, satu yang senang isu itu diketengahkan, kedua yang sebaliknya. Puak atau kumpulan yang mendapatkan manfaat dari pendedahan itu akan berterima kasih dan memuji penulis. Sebaliknya puak yang menanggung kerugian dan mendapat kehinaan (*damage*) akan memaki hamun dan

berdendam dengan penulis dan tidak kurang juga ada yang berusaha untuk membala dendam.

Selaku penulis 'kami' mahu berdiri di tengah-tengah konfrantasi di antara dua puak protogonis dan antogonis itu. Tujuannya untuk mendamaikan. Melaporkan sesuatu yang tidak baik dengan harapan ianya diperbaiki. Mendedahkan keburukan seseorang tokoh dengan harapan mereka berubah, dan kembali ke jalan benar. Lebih jauh dari itu kalau ia tidak berubah, biarlah mereka musnah ataupun dihukum oleh masyarakat.

Sesungguhnya seorang penulis tidak boleh melarikan diri daripada tanggungjawab sosial itu. Kalau penulis mengambil sikap kecewa, kecut perut atau mengelak, maka tidak akan lahirlah buku-buku politik. Rentetan itu, pendedahan, pembongkaran dan kritikan ke atas sosial politik tidak ada lagi. Lebih zalim dari itu ia seolah-olah telah mensia-siakan bakat anugerah Allah. Sebenarnya ramai manusia yang ingin jadi penulis tetapi kerana tidak ada bakat ia tinggal sebagai angan-angan saja.

Seperti dinyatakan tadi risiko bagi seorang penulis bukan kecil. Ia kadang-kadang sama besar dengan risiko ataupun implikasi yang diterima oleh mereka yang menjadi mangsa 'kami'. Muasir ini risiko itu bukan lagi secara nyata tetapi ia juga datang secara ghaib. Perbuatan sihir, santau (santet), tenung, dan sebagainya kini sudah mula berlegar dalam dunia realiti penulis politik. Kalau dahulu penulis hanya diugut dengan surat *lawyer* serta diheret ke mahkamah dengan tuntutan puluhan juta ringgit (gilal!) atas tuduhan memfitnah, namun kini sudah ada pula perbuatan sihir ke atas penulis.

Saya tidak mahu mempercayai tanggapan orang ramai terhadap apa yang berlaku ke atas sahabat saya, sdr. Ahmad Lutfi Othman. Tetapi itulah hakikat yang berlaku. Sihir, santau,

bomoh dan sebagainya bukan satu dongeng di dalam masyarakat Melayu. Ia wujud sejak lama dahulu. Penggunaan sihir dan bomoh ini untuk kepentingan peribadi bukan sahaja dipakai oleh orang kampung, tetapi oleh golongan elit, termasuklah Yang Berhormat dan juga menteri.

Penderitaan aneh yang dihidapi Lutfi dikaitkan dengan perbuatan itu? Kononnya disebabkan beliau mendedahkan keaiban seorang tokoh politik, tokoh itu bertindak balas ke atasnya. Kini kawan itu terlantar dirumahnya. Kegiatan menulisnya berhenti untuk seketika. Kedai bukunya di Medan Idaman juga terpaksa ditutup. Demikian risiko yang dihadapinya. Kesan daripada itu menyebabkan tidak adalah buku atau tulisan Lutfi dan ini sedikit sebanyak melemahkan industri buku politik. Keuzuran persis itu menjelaskan penerbitan buku politik (stail kami) secara umum.

Pun begitu keterjejasan industri kami sebenarnya bukan sahaja kerana 'kemalangan keuzuran', tetapi masih ada lagi hal-hal lain yang turut menghambat seperti kekurangan modal, kehilangan modal serta kehangusan modal. Seorang penulis buku politik akan kekurangan modal apabila sambutan ke atas bukunya berkurangan ataupun apabila hasil karyanya dirompak. Dan seorang penerbit buku politik akan kehilangan modal (hangus modal dan kelemahan semangat) apabila pengedar tidak membayar kepadanya atau menghilangkan diri terus. Itulah gejala dan risiko yang dihadapi penulis menyebabkan masam dan kusamnya industri buku politik.

Namun penulis tidak mudah mengalah. Menulis adalah perjuangan dan bukan kerja isengan. Bertolak dari hakikat itulah maka saya menguatkan juga semangat untuk menulis buku ini meskipun berada dalam lembah kesepian kerana ramai yang lain sudah *turn off computer* masing-masing ataupun menghadapi masalah seperti Lutfi itu. Yang terus

MUQADIMAH

unggul menulis hanya 'presiden' kami Syed Hussein al-Attas.

Sesuatu yang perlu disebutkan disini ialah tentang perhatian anda sekalian mengenai nasib kami. Misalnya nasib yang menimpa sdr Ahmad Lutfi mendapat perhatian banyak orang. Ini dapat saya rasakan apabila berlaku kekeliruan apabila ada sebilangan pembaca yang tidak mendapat maklumat, menyangka saya yang sakit. Kekeliruan ini mungkin disebabkan hujung nama kami sama, T. Di atas perhatian dan dokongan moral seperti itu sangat diperlukan oleh 'kami' dalam meneruskan perjuangan ini ke akhir hayatnya.

Buku saya kali ini masih lagi berlebar di sekitar permasalahan politik lokal negara kita, iaitu soal Mahathir, Pak Lah dan Anwar Ibrahim. Meskipun saya sudah berjanji untuk tidak menyebut Mahathir sejak tahun 1999, selepas buku "Sayalah Mahafiraun", namun saya terpaksa memungkirinya. Ini kerana Mahathir masih lagi relevan untuk diperkatakan pada saat ini. Buku ini juga sebagai sambungan kepada buku terakhir saya sebelum ini, "Sandiwara Belum Berakhir".

Persoalan saya bawa untuk dikupas dan renung bersama ialah apakah Mahathir benar akan berundur pada Oktober ini, serta cuba memahami mengenai dilema Pak Lah Badawi sebagai bakal Perdana Menteri dan selepas sah menjadi PM. Persoalan seterusnya teka-teki mengenai pembebasan Anwar Ibrahim dimana ketika ini pembebasan Anwar sudah memasuki fasa ketiga dan akhir, bila mana kesnya berada dalam period rayuan di Mahkamah Rayuan.

Meskipun Dr Mahathir seperti akan berhenti selepas Oktober, tetapi pertanyaan dan keraguan mengenainya masih hidup dimana-mana. Dimana-mana orang bercakap mengenai perkara itu, sehingga lah ke seluruh dunia. Keadaan

inilah menyentuh naluri politik saya untuk memberi ulasan mengenainya.

Saya cuba menggambarkan beberapa keadaan untuk mengiyakan apa yang Mahathir katakan itu (berundur) dan juga memberi isyarat untuk mengatakan Mahathir tidak akan berhenti. Pembaca budiman boleh berkongsi pandangan dan membuat konkulsif mengenai perkara ini berdasarkan apa yang saya bentangkan 'sambirin' menunggu Oktober ini.

Persoalan di sekitar Mahathir itulah yang (saya huraikan) secara tidak langsung membawa dilema kepada Pak Lah. Dua keadaan yang menyebabkan Pak Lah lemas dan cemas ialah kerana mengenangkan politik Mahathir, serta kesan selepas Mahathir berundur. Selain itu perkara besar bagi Pak Lah selepas beliau sah menjadi PM ialah mengenai kes Anwar Ibrahim dan juga pemilihan timbalannya.

Pak Lah menghadapi sedikit kesusahan di dalam perkara ini. Apakah beliau akan 'membebaskan' Anwar selepas setahun atau dua tahun Mahathir tidak ada? Seperkara lagi ialah untuk membuat pilihan tepat di antara Najib dengan Muhyiddin. Inilah dilema yang dirasakan wujud di dalam diri Pak Lah menyebabkan beliau menjadi semakin banyak berdoa dan mendirikan solat *istikhara* meminta petunjuk dari Allah s.w.t.

Peluang BA dalam pilihan raya akan datang juga saya sentuh. Sejauh manakah BA dapat berlawan dengan Umno. Perkembangan terbaru dalam Umno Kelantan yang sedang siap siaga dan ghairah untuk menakluk Kelantan saya sorotkan sebagai mauduk sampingan. Meskipun secara ringkas tetapi ia dapat memberi gambaran sebenar mengenai apa yang berlaku di negeri Cik Siti Wan Kembang itu. Dan sebuah rencana berjudulul 'Mengapa Lutfi Menyalak Bukit' disiarkan semula sebagai dedikasi kepada beliau.

MUQADIMAH

Itulah persoalan yang saya lontarkan di dalam buku ini. Di harap buku ini sedikit sebanyak menjadi panduan kepada kita semua untuk membaca peta dan pergerakan politik negara dalam setahun dua ini.

Seperti biasa di atas perhatian serta kesetiaan anda budiman mengikuti penulisan saya, diucapkan berbanyak terima kasih. Salah silap saya pohon maaf. Akhirnya ingin saya pesankan apabila kita bercakap soal politik, sebaik-baik apa yang perlu sentiasa terbetik di dalam diri kita ialah bagaimanakah untuk kita pastikan agar kuasa politik orang Melayu terus utuh buat selama-lamanya.

Wassalam.

MOHD SAYUTI OMAR (MSO)

sayuti@pd.jaring.my

Wangsa Melawati,

Kuala Lumpur.

13 Mac 2003.



Undurkah Mahathir?

1

UNDURKAH Dr Mahathir? Berhentikah Mahathir? Jadikah Mahathir bersara? Atau sebaliknya! Mahathir tidak jadi berhenti, tidak jadi undur dan tidak jadi bersara dan terus menjadi Perdana Menteri! Itulah persoalan yang paling popular dan membantu kepala para pemerhati politik hari ini. Bagi mereka yang kuat menyokong parti pembangkang dan sentiasa meragui cakap Mahathir dengan mudah dan cepat mengatakan Dr Mahathir tidak akan berhenti. Mahathir akan terus menjadi Perdana Menteri untuk satu tempoh yang tidak diketahui - mungkin sampai terdengarnya nafiri yang ditupukan oleh Israfil.

Mereka cukup yakin! Keyakinan itu diselimuti oleh rasa sentimen dan benci mereka kepada Mahathir. Disebabkan mereka sudah merasakan sangat mual dengan Dr Mahathir,

maka mereka beranggapan demikian. Padahal mereka itu mahu sangat Dr Mahathir cepat berhenti. Mahu melihat bagaimana warna dan corak Malaysia selepas 'ketiadaan' Mahathir.

Berlainan dengan mereka yang menyokong Barisan Nasional (BN) dan terpesona dengan Dr Mahathir, berpendapat Mahathir akan berhenti pada tarikh yang ditetapkan itu. Mereka juga cukup yakin Mahathir akan kotakan apa yang dikatakan itu. Dr Mahathir bukan seorang pemain wayang ataupun aktor yang pandai bersandiwaro. Justeru mereka mula membuat persiapan rapi menanda dan mencula mana-mana tokoh di kalangan Umno untuk dijadikan sebagai pengganti Dr Mahathir.

Pun begitu pendapat ini tidak sepakat. Tidak ada ijmak ulama di kalangan parti Umno mengenai perkara itu. Tidak dapat disepakati akan pengakhirananya. Dari kalangan yang anti dan merasa bakal penggantinya Abdullah Badawi (Pak Lah) tidak berkelayakan untuk menjadi PM, merasakan Dr Mahathir tidak akan berhenti. Dr Mahathir akan terus menjadi PM sehingga orang yang difikirkan layak muncul mengambil alih tempatnya. Mereka berpendapat penamaan Pak Lah sebagai penggantian itu hanya bersifat sementara saja.

Sebenarnya banyak persoalan yang timbul di sebalik pertanyaan dan teka teki itu. Ia berkaitan di antara satu sama lain. Kalau Dr Mahathir tidak jadi berhenti, ini bermakna Pak Lah tidak akan menjadi Perdana Menteri. Kalau Pak Lah tidak menjadi PM, bermakna ada orang lain yang akan menjadi PM. Siapa?

Dalam kabus itu sesiapa pun tidak tahu siapa yang akan menjadi PM selepas Dr Mahathir ini. Pertanyaan ini menjadi klase dan mitos, sebab ia muncul sejak berbelas tahun lalu. Berbelas tahun dahulu orang sudah meramal dan mencari

siapakah bakal pengganti Dr Mahathir sebenarnya.

Bukan sedikit orang-orang yang dikatakan akan menjadi PM selepas Mahathir. Selain daripada Musa Hitam, Ghafar Baba, Anwar Ibrahim dan Abdullah, yang sememangnya digrowth untuk itu, ada sejajar nama lain lagi yang dimimpi dan bermimpi untuk menjadi Perdana Menteri. Mereka diulik dan didendangkan oleh pengikut dan kumpulan masing-masing.

Tengku Razaleigh Hamzah, Ashaari Muhammad, Abdul Hadi Awang adalah di antara nama-nama asing dari kalangan Umno diramalkan dan digossip oleh tukang nujum pak belalang akan menjadi PM. Tok Guru Nik Aziz juga disebut dan diberi pilihan untuk diletak menjadi PM. Maka tersenyum kambinglah orang-orang ini mendengar gosip itu. Walaupun mereka tahu akan kebolehan dan peluang mereka namun mereka bangga juga!

Orang-orang yang setia dengan Ku Li sampai sekarang mereka mengharap dan mendoakan Ku Li akan mengganti Dr Mahathir. Sebab itu jika ada perjumpaan atau pertemuan secara tidak langsung di antara Ku Li dengan Mahathir mereka akan gosipkan, kononnya pertemuan itu sebagai satu perbincangan untuk menyerahkan jawatan. Apa lagi Tengku Razaleigh sendiri sudah beberapa kali membisikkan perkara ini kepada rakannya dari bekas parti Melayu Semangat 46, kononnya beliau hanya menunggu masa sahaja untuk mendapat *button* (kuasa) daripada Mahathir.

Ashaari Muhammad bekas pemimpin Darul Arqam yang kini disulukkan di Labuan, Sabah sangat mempercayai satu teori atau kaedah bagi mana beliau akan muncul menjadi Perdana Menteri. Manakala nama Haji Abdul Hadi Awang pula digimikkan oleh majalah *international* yang mempunyai seribu motif.

Namun yang munasabahnya adalah nama-nama di atas tadi; Musa, Ghafar, Anwar dan Pak Lah. Sebab mereka pernah dan masih berada di bawah Mahathir. Lagipun mereka berada atau pernah berada dalam Umno parti yang melahirkan Perdana Menteri sebelum ini.

Kemunasabahan itu kini menjadi sebaliknya. Menjadi seperti ganjil pula. Dan keganjilan itu sudah menjadi kenyataan. Bagi Musa, Ghafar dan Anwar penantian untuk mengisi kekosongan tempat Mahathir sudah berakhir. Pada adatnya mereka telah terlepas peluang. Cuma kini hanya tinggal Pak Lah. Apakah Pak Lah juga akan menunggu giliran untuk menghadapi keganjilan itu? Seandainya Dr Mahathir mendapat idea dan ilham baru, ia boleh menjadikan Pak Lah mengigit jari. Pak Lah juga akan termasuk dalam senarai orang-orang yang bernasib ganjil, terlepas peluang untuk menjadi Perdana Menteri.

Biarlah kita jangan cuba mencari siapa dia bakal PM selepas Mahathir itu, sebab ianya sangat misteri dan abstrek sekali. Harus diserahkan juga kepada Qada dan Qadar Al-lah. Seperti mana yang diucapkan oleh Pak Lah soal menjadi PM serahkan kepada Allah.

Yang penting kini kita cuba lihat dahulu, apakah Mahathir benar akan berundur pada Oktober ini, seperti mana yang dijanjikan itu ataupun tidak? Memikir dan mencari calon PM sebelum Mahathir berundur adalah satu kerja yang tolol dan membuang masa. Kalau pun kira ada calon dari langit, tetapi Dr Mahathir tetap babil untuk tidak meninggalkan kerusinya, tidak ada siapa juga boleh mengambil alih tempatnya. Seperti pernah saya katakan sebelum ini Mahathir seperti pohon rendang yang berhantu di mana orang semua takut untuk mendekatinya kerana bimbang disampuk.

Dalam kepala sesetengah orang hari ini, Mahathir adalah

UNDURKAH MAHATHIR?

segala-galanya. Mahathir adalah raja segala raja. Mahathir mempunyai kuasa penuh. Tidak ada siapa yang berani membantah kehendak Mahathir. Apa yang beliau suarakan orang akan akur – meskipun anggukkan itu hanya di hadapannya sahaja. Demikianlah bisa dan bijaksana dan liciksananya Mahathir. Prof Datuk Shahnon Ahmad membuat analogi orang Umno adalah sekumpulan kerbau ternakan dimana Mahathir adalah tuannya.

Jadi kerusi PM itu selagi dia mahu dia boleh memiliki sampai ke bila-bila pun. Hatta kalau beliau sudah sakit dan terbaring dan teringin lagi untuk memerintah dia akan memerintah negara ini dari tempat duduknya. Dia akan membuat arahan menerusi skrin-skrin komputer yang disambung langsung ke bilik tidurnya. Apa lagi dizaman IT ini kerja tidak semestinya dilakukan di pejabat. Peralatan canggih Multi Media Koridor Raya boleh membantu Mahathir menguruskan pentadbiran dari luar pejabat.

Di tambah pula orang-orang di bawah beliau sudah diasuh kesekian lama agar tunduk kepadanya. Patuh kepadanya tanpa ada sebarang tanda soal. Kamu tunduk dan kamu dengar itulah yang didoktrinkan oleh Mahathir kepada pengikut-pengikutnya baik di dalam parti Umno ataupun di luar. Doktrin inilah juga diguna oleh Asaari Muhammad pada pengikut Arqam.

Mahathir tidak ada masalah untuk memerintah dan mentadbir. Asalkan sahaja beliau mahu. Dan pengikutnya pula tidak boleh menindakkan akan kehebatan Mahathir. Apa lagi yang tidak diiktiraf kepada Mahathir. Semua gelaran dan jolokan yang muluk-muluk telah diberikan kepada Mahathir. Mahathir adalah bapa segala bapa di negara ini.

Justeru yang penting kita perlu melihat dan menanti detik keramat pengunduran Mahathir selepas Oktober ini. Itu yang

mustahak sekali. Pengunduran Mahathir akan menjadi satu sejarah persis tumbangnya pohon berhantu dan keramat.

Jawaban atau nama bakal menjadi PM kelak akan terjawab dengan sendirinya apabila kita menemui dan mencari jawaban kepada persoalan berundur atau tidak Dr Mahathir.

Seperti dikata tadi ada berbagai pendapat mengenai persoalan itu. Berbagai versi. Tetapi ada satu pendapat dari kalangan yang tidak berkepentingan. Umno pun tidak Pas pun tidak. Mereka ini adalah golongan atas pagar dan membuat perkiraan berdasarkan kepada realiti semasa mengenai Dr Mahathir Mohamad.

Biarlah saya tidak menyebut namanya ataupun apakah nama agensinya. Dia mengakui menjadi agen dan broker politik berwibawa di Malaysia. Bukan kepada Mahathir. Selama ini dia bergerak untuk mensejahterakan Malaysia bukan untuk mengemuk mana-mana individu. Dia tidak taksub kepada sesiapa di dalam Umno. Walaupun dia mengakui pernah baik dengan Pak Lah, dan khabarnya kalau ke rumah Pak Lah terus boleh buka saji sendiri di dapur dan masih baik dengan Mahathir, tetapi dia akan kritik jika apa yang berlaku tidak sejulur dengan perhitungannya.

Menurut *buduanda* ini, Dr Mahathir tidak akan menyerahkan jawatan PM kepada Pak Lah. Beliau yakin bahawa Mahathir tidak akan mempusakakan jawatan itu kepada Pak Lah. Beliau tidak menyebut Dr Mahathir tidak akan berhenti, tetapi menyebut Dr Mahathir tidak akan memberi kepada Pak Lah. Ini bermakna menurut *buduanda* ini Dr Mahathir ada orangnya tersendiri. Atau sedang mencari pilihan yang tepat.

Saya menghujah kenapa? Apakah disebabkan saudara sudah tidak baik dengan Pak Lah maka saudara merasakan

jawatan PM tidak perlu diberikan kepada Pak Lah? Selalunya kita menjadi negatif kepada seseorang yang kita tidak kenal atau bermasalah dengan kita. Begitukah?

Dalam perbualan di restoran mamak di Danau Kota, Setapak itu, beliau cepat menafikan, "bukan kerana itu, tetapi kerana lain. Pak Lah seperti mana yang *you* tahu dan seperti mana yang orang lain cakap, dia tidak berkemampuan untuk menjadi PM, Malaysia. Apa lagi Malaysia dalam situasi hari ini amat berat untuk dipikul oleh Pak Lah."

Sebab? tanya saya. "Pak Lah lemah dalam segala hal. Pak Lah tidak ada hubungan luar negeri, tidak tahu menguruskan ekonomi. Pak Lah tidak memiliki apa-apa kepakaran dan kepandaian," katanya. Bukanakah kepandaian dan sokongan itu datang kemudian, setelah ia berkuasa? Saya cuba menghujah mempertahankan Pak Lah.

"Benar, tetapi Pak Lah menghadapi laluan sukar. Kesukaran sudah mula nampak apabila beliau cuba mengambil orang lain sebagai timbalannya tidak orang yang ditunjuki oleh Mahathir." Maksud *you* Pak Lah akan berada dalam bahaya kalau beliau tidak ambil Najib? "Iya, Pak Lah tidak mahukan Najib. Sudah dua kali PM panggil Pak Lah dan minta Pak Lah umumkan Najib, tetapi dia tak buat sebab dia hendakkan Muhyiddin." jelas *biduanda* itu seakan tahu benar rahsia Mahathir.

Apa implikasi kalau Pak Lah ambil Muhyiddin? Teken saya. "Kalau Pak Lah ketepikan Najib satu perang besar akan berlaku dalam Umno. / rasa tidak sampai dua bulan Pak Lah jadi PM atau presiden akan berlaku undi tidak percaya dalam Majlis Tertinggi Umno. Pengaruh Najib cukup kuat, hatta di dalam MT sendiri Najib boleh menguasai sampai 70 peratus." hurai beliau.

Secara jujur saya tidak nampak akan implikasi itu akan

berlaku. Berpandu kepada sejarah di mana ada bendang di situlah pipit dan uban-uban berkerumun. Sebaik sahaja Pak Lah melangkah kaki ke Seri Perdana maka akan berduyun-duyunlah orang mendatangi rumahnya. Tenguk kenduri kahwin anak perempuannya saja dihadiri oleh lebih 70,000 tetamu. Kenduri anak Mahathir pun tidak sebegitu hebat. Bukan sahaja yang buta, tuli dan pekak datang untuk memberi tahniah dan syabas, tetapi orang-orang yang sebelum ini mencemuhi Pak Lah juga akan datang. Sekejap masa sahaja Pak Lah akan kuat, mempunyai pengaruh dan kuasa. Bukan *you* tidak tahu jenis-jenis manusia politik, apa lagi ahli Umno yang macam serigala dan pacat sebab *you* cukup rapat dengan ahli Umno!

"Tidak, salah andaian *you* itu. Sekiranya Pak Lah tidak lantik Najib, orang Najib akan kecewa. Mereka tidak akan diam begitu sahaja. Mungkin saat ini Najib akan cuba mencari *partner* baru menentang Pak Lah, inilah yang akan berlaku. Bagi Najib beliau tidak akan rugi apa-apa kalau dia tidak menentang Pak Lah. Kalau Pak Lah tidak ambil dia, sudah tentu dia tidak dapat jadi PM. Alang-alang lebih baik dia bergasak, untung-untung Pak Lah tumbang dia akan naik." Ha...haha..haha..hahaa, *biduanda* ketawa.

Biduwanda itu meneguk teh tarik dan menghisap narkotik dalam-dalam dan melepaskan asapnya bertebaran di mata saya kemudian dengan rakus menghembus. Huss....

"Pak Lah ada satu lagi penyakit berat?", sambungnya. Apa dia? "Soal isterinya?" Kenapa? Tanya saya buat-buat pandir. "Bini Pak Lah seorang *queen control!*" Saya faham maksudnya itu. Beliau cuba hendak menjadikan soal Datin Endon sebagai halangan kepada Pak Lah. Sebenarnya perkara itu nisbi. Saya tidak memberi peluang dia bercakap banyak mengenai Endon, sebab kalau beri peluang banyak

yang tidak benar mengenai Endon akan dibuka mungkin termasuklah soal penyakit dan sebagainya. Biasalah orang yang tidak suka, dia akan menyelongkari semua keburukan termasuk mereka-rekanya.

Apa bezanya Endon dengan Rosmah, kalau Najib jadi PM! Saya cuba provoknya, apakah dia bersikap jujur atau sebaliknya. "Samalah tu.....balasnya," Tetapi Rosmah sudah berubah sekarang, banyak berubah," sambungnya. Dia terus *call hand-setnya*. You call siapa? "Rosmah.... you cakap sendiri dengannya." Dia mahu membuktikan kepada saya yang Rosmah sudah berubah. Selain itu dia hendak menunjukkan dia *very closed* dengan Rosmah.

Memang fitnah ini saya mendengar dari sejak dahulu lagi. Macam-macam tentang Endon ini. Malahan kemasukan semula Pak Lah ke dalam Team A bersama Dr Mahathir disebabkan Endon. Endonlah yang bersungguh-sungguh memohon dan merayu kepada Siti Hasmah. Cerita ini saya dengar daripada beberapa orang isteri bekas menteri yang bersama Ku Li dulu. Merekalah yang menceritakan mengenai diri Endon. Menurut mereka walaupun Endon tidak lagi menjadi isteri menteri yang automatik menjadi ahli Puspanita, namun Endon masih berhubung dengan Siti Hasmah selaku Presiden Puspanita.

Demikian juga dengan isteri Rais Yatim, Datin Masnah beriya benar agar Rais menjadi menteri semula.

Apakah di sini bermakna Pak Lah takutkan isteri? Ha..haha..haha.. si biduwanda itu ketawa. Begitulah nampaknya?

Masakan kerana itu *you* terus menghukum Pak Lah. Pak Lah banyak kelebihan lain lagi. Personalitinya sebagai seorang Islam, keturunan cukup melayakkkan diri Pak Lah menjadi pemimpin, dia cucu kepada ulama besar Tanah

Melayu ini, kata saya. Tarikh kemerdekaan negara ini datuknya yang pilih, tambah saya mengangkat Pak Lah. Pak Lah juga tidak main politik wang, provok saya.

"Tak main politik wang? You tidak tahu sebenarnya." tegas beliau tidak memberi bukti dan menjelaskan maksud kata-katanya. Dia lari ke topik lain. "Kalau tak boleh *handle* bini macam mana?" tekan kawan itu lagi. Banyak cerita buruk yang dihemburkan mengenai Endon. Setengah baru dan ada setengah yang sudah basi. Setengahnya sukar untuk diterima akal.

Diam-diam saya tidak bersetuju dengan agen bebas itu. Pada saya dia ada *something wrong with* Pak Lah. Sebab dulu dia seorang yang kuat menyokong Pak Lah. Dari maklumat lain saya perolehi dia ni kecewa dengan Pak Lah sebab projek dia di luar negeri ada masalah. Dia cuba mohon bantuan daripada Pak Lah namun tidak berhasil. Sejak itu dia terus *against* Pak Lah.

"You tengoklah nanti Pak Lah tidak akan jadi PM? Percayalah!", tekannya. Saya tidak mahu mempersoalkan tentang itu, sebalik apa yang saya ingin ketahui ialah, apakah Mahathir berhenti atau tidak. Mahathir berundur atau tidak selepas Persidangan Negara Islam (OIC) nanti. Itu yang penting. Kalau Mahathir masih tercongkol di atas kerusi selepas Oktober ini, maka sah dia tidak akan berhenti.

Apakah *you* boleh beri tanda atau isyarat yang Dr Mahathir tidak akan berhenti? Saya cuba mengelecek kawan itu, mencari alasan ataupun hujah yang tidak berbau dendam dan emosi.

"Tiada syarat yang jelas, tetapi ada perkara yang Dr Mahathir harus ketahui apa akan berlaku kalau dia serahkan jawatan kepada orang yang tidak kuat dan tidak mempunyai pengaruh yang luas. Kesan dan implikasi tindakan itu boleh

merosakkan Umno."

Justeru katanya Dr Mahathir kena cari orang lain. Sebelum berjumpa orang itu beliau akan tangguhkan pengudurannya. Nampaknya kawan ini tidak berapa selesa dengan Pak Lah. Ada semacam dendam tidak sudah dengan Pak Lah. Kalau bukan Pak Lah siapa? Saya mengacahnya lagi walaupun saya sudah tahu siapa yang beliau berkenan.

"Najib ada, pengaruh Najib memang kuat berbanding dengan Pak Lah. Tetapi kalau Najib ia boleh menimbulkan perkara lain. Najib memang tokoh yang digilap, tetapi dia terlalu muda untuk menjadi TPM. Najib sesuai untuk menjadi timbalan sahaja." Saya kurang faham kenapa *biduwanda* berkata begitu. Tadi dia mempertahankan ketokohan Najib tetapi tidak bersedia menerima Najib menjadi PM.

"Kalau Dr Mahathir mengambil Najib akan berlaku pergaduhan di dalam Umno. Muhyiddin akan memberontak," katanya. "Muhyiddin bukan kecil anak, para penyokong Anwar atau orang Anwar masih ramai. Bila-bila masa mereka boleh bangkit. Kalau Dr Mahathir ambil Najib, menyebabkan orang Anwar akan tersinggung, pun begitu sebaliknya. Perbalahan akan berlaku, perwujudan puak akan timbul semula di dalam Umno seperti mana di zaman Ku Li ataupun Anwar.

"Jadi Mahathir kena cari orang yang boleh mengamankan Umno. Meneutraliskan penyokong kedua pihak." Kawan itu masih cuba menyembunyikan tokoh yang beliau maksudkan itu. Siapa tokoh itu?, soal saya. Tengku Razaleigh Hamzah?

Boleh lagi ke Ku Li saya menanyai diri saya sendiri. Tanpa menunggu reaksi saya seterusnya kawan itu menceritakan seminggu sebelum Mahathir membuat rombakan ke atas Umno Kelantan, pada 16 Januari, Mahathir panggil Ku Li. Menurutnya Najib yang beri tahu kepadanya.

Beliau cuba membuktikan bahawa Ku Li masih *some body* bagi Dr Mahathir. Mahathir masih membuat perkiraan dengan Ku Li. Beliau nampaknya cuba untuk memprojekkan Ku Li. Tanpa segan silu beliau mengakui beliaulah yang membuat gimik Ku Li akan bertanding melawan Pak Lah dalam perhimpunan lalu. Pak Lah cukup marah dengan gerak kerjanya itu. Endon dakwanya sampai mengupah orang tertentu melakukan perkara diluar normal manusia ke atasnya.

"Tengku Razaleigh Hamzah boleh menjadi pendamai di antara puak bekas Mahathir dan bekas Anwar Ibrahim. Di sebelah Mahathir tidak akan merasa kecewa dan di sebelah Anwar tidak akan merasa hampa. Lagipun orang yang sepatutnya selepas Mahathir ialah Ku Li, bukannya Musa, Ghafar, Anwar atau Pak Lah." tekannya.

Bagai mana dengan Dr Mahathir berundur atau tidak? Menurut pengamatan *buduanda* itu Dr Mahathir tidak akan berundur pada Oktober ini. Dia akan terus menjadi PM. Kemungkinan besar beliau akan bertanding lagi dalam pilihan raya umum akan datang. Sukar juga bagi Dr Mahathir untuk menerima formula *buduanda* itu. Hanya satu cara sahaja yang boleh dilakukan Mahathir. Selepas berlangsung pilihan raya (ditakdir Umno menang besar) beliau adakan persidangan agung Umno. Dalam persidangan itu beliau mengumumkan perletakan jawatannya dan melepaskan ahli-ahli Umno bertanding menguji kekuatan masing-masing.

Dalam keadaan dan semangat hari ini Dr Mahathir tidak lagi boleh menentukan orang itu dan orang ini untuk menjadi ketua. Sebab selepas beliau berhenti orang yang ditunjuk dan ditentukan itu tidak akan dihormati oleh ahli sebab orang itu naik bukan di atas kehendak ahli tetapi di atas perkenannya. Itu sahaja.


Berdasarkan teori itu Dr Mahathir tidak akan meng

UNDURKAH MAHATHIR?

undurkan diri setidak-tidaknya sebelum pilihan raya umum berlangsung. Beliau akan tetap bertanding. Bukan di Kubang Pasu, tetapi akan bertanding di Putrajaya? Ini bermakna Pak Lah menghadapi bulan-bulan resah bukan sembilan bulan dari sekarang tetapi bertambah untuk beberapa bulan lagi. Tempoh itu cukup untuk menjadikan Pak Lah semakin cemas dan sesak nafas.- ©



PAK LAH: "Kalau Datuk Seri tak jadi berundur selepas Oktober ini pun tak mengapa, saya tak jadi masalah asalkan Janganlah cancelkan saya daripada menjadi Timbalan Perdana Menteri, malu saya... Datuk Seril Ke mana nak diletakkan muka ni..."



SATU pose istimewa Dr Mahathir dengan Dollah Badawi. Dari gambar ini jelas menunjukkan mereka berdua tidak sehaluan. Mahathir seperti berkata sesuatu sementara Dollah pula mengelamun jauh, mungkin mengenangkan nasibnya selepas Oktober inil. Apakah yang sedang diperkatakan oleh Mahathir? Dan apakah pula agaknya yang dingelamunkan oleh Pak Lah? Sebenarnya Dr Mahathir tidak ada pilihan lain untuk menjadi penggantinya selepas Anwar Ibrahim 'buat hal'. Walaupun Dollah tidak mempunyai kredibiliti tetapi Mahathir terpaksa mengambil Dollah jadi TPM. Bergunalah akar apabila rotan tidak ada.



Pak Lah bebas Anwar...

2

DI KOTA BHARU, sore 15 Januari kira-kira setengah jam Dr Mahathir akan sampai dengan jet eksekutif dari Kuala Lumpur, saya menerima panggilan dari seorang yang selalu membuat panggilan bila ada isu politik terkini. Dia ialah orang Parti Keadilan Nasional (PKN) yang selepas 23 Februari ini akan menjadi Parti Keadilan Rakyat (PKR). *Insya-Allah.*

Dia ini bekas seorang ketua bahagian PKN, di Selangor. Seorang yang begitu taksub cinta kepada Anwar Ibrahim. Dia meninggalkan beberapa kemudahan yang dikecapi dalam Umno dan bersama Keadilan semata-mata memperjuangkan nasib Anwar. Dia begitu lunatik mahu membebaskan Anwar dari penjara.

Saya tidak tahu apakah budi yang Anwar berikan kepadanya. Apakah sebanyak yang diterima oleh Ahmad

Sebi, atau Nasaruddin Jalil, atau Wan Husni Wan Sulaiman, atau YB Azmin Ali atau sesiapa lagi? Setahu saya dia tidak menerima apa-apa faedah daripada Anwar hatta sekeping kad hari raya sehingga kini atau sekeping nota kecil dari penjara sebagai tanda terima kasih Anwar diatas simpatinya.

Tetapi orang Melaka yang kuat ketawa ini sangat kuat citarasa, kasih sayang kepada Anwar dan membenci sejuta kali benci kepada Dr Mahathir. Baginya dia menganalogikan Anwar sebagai malaikat dan Mahathir sebagai syaitan! *Nauzubilahimin zalik!* Katanya, dia membela Anwar kerana kezaliman yang dilakukan ke atas Anwar. Nampaknya prinsipnya itu sama dengan pendirian saya. Saya bingkas membela Anwar kerana tindakan ke atas Anwar terlalu zalim bukan kerana kemaksuman Anwar! Kezaliman yang sebelum ini dibaca dalam buku-buku cerita kuno disebabkan perebutan kuasa, wanita atau untuk mempertahankan pangkat dijelmakan dalam alam nyata di era Mahathir. Itulah sebabnya.

Apa yang membanggakan lagi perjuangannya untuk membebaskan Anwar dibantu sama oleh isterinya. Sampai isterinya saya panggil *Nona Azizah*. Mereka berdua laki bini cukup gigih dan komited dengan perjuangan Keadilan. Saya percaya seluruh keluarganya berubah angin selepas tercetusnya tragedi 3 September 1998. Mereka berpaling dari Umno dan berusaha, berkempen dan menjalankan apa jua propaganda termasuk yang bodoh tolol untuk membebaskan Anwar. Pantang mendengar sesuatu *rumours* ataupun apa-apa mengenai Anwar beliau akan respons dan cepat-cepat menjalankan tugasnya, menyebar luaskan.

Demikian juga sore itu ketika saya sedang menanti kehadiran Dr Mahathir di Kota Bharu, tiba-tiba beliau menelefon, menanyakan sesuatu yang sangat memualkan

saya. Apa lagi kalau tidak khabar angin mengenai Anwar.

Dari mana *you* dapat cerita ini, mengarutlah. Dah saya katakan jangan cepat percaya, semak dahulu dan *check* dulu, begitulah selalu saya pesan. Dalam keadaan itu pun beliau tetap melakukan kesilapan yang sama. Saya faham, ia berlaku kerana dia mahukan kebebasan Anwar. Jiwanya memberontak untuk melihat Anwar berada di luar. Itu sahaja. Justeru perkara yang tidak logik asalkan memberi kebahagiaan kepada Anwar dan perasaanya dia akan respons dan mempercayainya.

I dah kata Anwar akan bebas tahun 2004, tunggulah tidak lama lagi. Saya cuba mententeramkan dia dan mengembalikannya ke alam nyata. "Tetapi, ini betul ni, *you* tahu semua orang-orang yang dahulu tidak pedulikan Anwar sudah mula mendekati Anwar", hujahnya lagi. "Fuad Hassan, Suhaimi Ibrahim dan Zahid Hamidi sudah hantar kad selamat hari raya kepada Anwar. Merayu-rayu berdinda dan berkanda. (loya)", sambungnya lagi dengan perasaan jengkil.

Itu satu propaganda sahaja. Satu gimik sahaja. Tidak mungkin berlaku, lambat lagi, tekan saya lagi. "Tetapi kenapa dia cakap, ini orang atas". Dia mempertahankan maklumat yang diterimanya itu. Kesian kawan saya ini dia tidak tahu selok belok politik. Tidak tahu apa itu propaganda, apa itu muslihat, apa itu perang psikologi dan sebagainya. Padahal dia salah agennya kadang dia terperangkap dalam perangkap yang dibuat sendiri. Mungkin dia seorang ahli perang saraf yang tidak cukup latihan atau kerana kangennya kepada Anwar?

Berita yang disampaikan kepada saya, kononnya Anwar akan dibebaskan pada 17 Februari ini. Dr Mahathir telah bersetuju untuk membebaskan Anwar. Entah hantu mana yang menyampaikan maklumat itu kepadanya. Bagaimana

pembebasan itu dibuat, *wallhualam*. Tetapi dapat saya menyangka, begini; rayuan Anwar akan diterima dan kes penjara sembilan tahun yang sedang dalam proses rayuan akan dibenarkan jamin.

Penarikan balik notis bankrupsi oleh Mahathir ke atas Anwar dijadikan alasan. Kononnya Mahathir hendak kompromi dengan Anwar. Baru-baru ini ada tersebar berita Mahathir menarik balik notis bankruspi ke atas Anwar sejumlah RM35,381.

Dalam pada itu tersebar satu dakyah kononnya ada kompromi di antara Mahathir dengan Anwar? Dr Mahathir menawarkan pembebasan kepada Anwar dengan syarat-syarat terlalu personal. Bagaimana pun Anwar tidak menerima tawaran tersebut. Kononnya Mahathir ingin memberi 'pengampunan' tetapi Anwar tidak mahu, beliau mahukan mahkamah membebaskannya. Dia mahu dibaptis oleh undang-undang sebab beliau dinodai dengan undang-undang.

Sedap bunyinya cerita berkenaan. Moral cerita itu ia menunjukkan Anwar tidak bersalah, seorang yang tegas, seorang hero. Seorang pejuang sejati.

Sebenarnya gimik ataupun cerita-cerita ala *Bollywood* yang kebanyakan berakhir dengan *happy ending* itu sudah acap kali kedengaran. Ia sebenarnya tidak lebih daripada strategi ataupun propaganda untuk menghidupkan isu Anwar. Bagus bukan tidak bagus, tetapi kadang-kadang strategi dipihak Anwar melampau menjadikan ia *over-kill*. Tidak payah disebut, masing-masing dapat memahami sendiri apa yang sudah berlaku.

Sesiapa pun yang cintakan keadilan, sayangkan kebenaran dan membenci kezaliman serta kejahatan mahukan seorang yang tidak bersalah dibebaskan. Apa lagi

Anwar yang disanjung, dilihat berakhlik dan didoa untuk menjadi pemimpin. Tetapi realitinya pembebasan itu bukan sesenang yang diharapkan. Mahathir menggadaikan nyawa dan kuasa politik untuk mengurungkan Anwar, tidak semudah itu beliau bersedia membebaskan Anwar.

Anwar tidak akan bebas ditangan Mahathir! Tangan yang menyelak pintu penjara biasanya tidak akan membukanya balik, sebab mereka (Anwar – Mahathir) berada dalam alam pertarungan di antara hidup dan mati. Dr Mahathir dan Anwar berada ditahap demikian. Membebas Anwar seperti mana yang dihebohkan itu bermakna Mahathir mengaku kalah.

Kalau Mahathir hendak berbuat demikian, sudah lama. Anwar tidak sampai duduk dalam penjara hingga kurus kering dan sakit belikat. Allahyarham Datuk Fadzil Mohd Noor pernah mengunjungi Mahathir dan bermohon agar beliau membebaskan Anwar, namun tidak berhasil. Saking sayang dan kesiankan kepada sahabatnya itu atas dasar persahabatan Fadzil Noor sanggup menggadaikan maruah menemui Mahathir. Dalam pertemuan itu Fadzil Noor memohon pembebasan Anwar dengan menyatakan *benefit* yang diperolehi Mahathir.

Dalam kunjungan bersama Dr Tan Seng Giaw dan Ab. Rahman Yusuf, ahli Parlimen Kemaman, Fadzil menjelaskan kepada Mahathir sekiranya Mahathir membebaskan Anwar, beliau akan memperolehi kredit yang besar. Seluruh rakyat akan menyanjungi beliau. Tetapi apa reaksi Mahathir? Katanya, tidak mengapalah kalau pun rakyat tidak memujanya, sebab selama ini pun beliau dianggap dengan berbagai anggapan buruk dan keji, termasuk Firaun dan sebagainya.

Tempelakan yang sangat mengecewakan arwah Fadzil Noor itu jelas menunjukkan Mahathir tidak bersedia untuk

memantulkan cahaya ke penjara untuk Anwar atas belas ihsan. Beliau tidak akan menggunakan kuasa yang ada kepadanya untuk memberi kebebasan seperti mana beliau menggunakan kuasanya untuk mengurung Anwar.

Sinopsis dan natijah pertemuan itu adalah kemuncak kepada segala usaha untuk membebaskan Anwar. Kalau rayuan daripada seorang sahabat, yang juga ketika itu selaku ketua pembangkang tidak diendahkan, maknanya bagi Mahathir kesalahan Anwar sangatlah besar.

Berdasarkan kepada *back ground* dan kejadian itu juga saya seperti mana majoriti pendapat tetap meyakinkan Anwar tidak akan bebas selagi Mahathir berkuasa. Justeru bagi mereka yang memimpikan Anwar bebas, baik simpan mimpi itu dan jangan cuba mengharapnya kerana ia boleh mengecewakan diri sendiri.

Bila bercakap mengenai pembebasan Anwar hari ini, kita hanya boleh bersabar dan menanti sahaja. Perkara paling baik ialah menunggu ketiadaan Mahathir. Berdoalah supaya Mahathir mengotakan janjinya pada Oktober 2003 itu kerana penunaian itu mempercepatkan pembebasan Anwar.

Bagi saya, saya melihat Anwar berpeluang untuk bebas apabila negara ini dipimpin oleh Abdullah Badawi. Walaupun setengah pihak mengatakan Pak Lah akan turut mengikut langkah Mahathir dalam berhadapan dengan Anwar, tetapi saya mempunyai pandangan lain. Pada saya Pak Lah tidak sekejam dan sezalim Mahathir. Sementara beberapa tokoh Pas pula membuat spekulasi dan prejudis Pak Lah akan bertindak lebih kejam daripada Mahathir. Anggapan demikian terlalu emosional dan beramarah.

Ada satu kejadian ataupun *experience* yang boleh diambil iktibar ataupun perbandingan bagi membuat justifikasi ke atas keyakinan saya ini. Ingatkah kita kepada apa yang

berlaku kepada bekas MB Selangor Datuk Harun Idris? Harun di penjara atas tuduhan melakukan rasuah. Tuduhan itu sengaja diadakan, dan seluruh dunia mengetahui Datuk Harun tidak menggunakan wang berkenaan untuk kepentingan dirinya. Dia disumbat ke dalam penjara di atas motif politik dan dendam.

Harun di penjara di zaman Datuk (Tun) Hussein Onn. Tetapi beliau dibebaskan di zaman Mahathir. Apakah hal yang sama juga akan berlaku kepada Anwar? Harun dibebaskan pada zaman pemerintah yang tidak mempunyai dendam kepadanya. Mungkin kalau Hussein masih terus memerintah Harun masih tetap berada di dalam penjara?

Kita semua sangat mengetahui bagaimana hubungan Pak Lah dengan Anwar. Sejarah politik masa lalu Anwar, menyebabkan Pak Lah ada terasa hati. Namun insiden itu bukan satu beban besar kepada Pak Lah dalam meghadapi Anwar. Tindakan memanjarakan, memecat dan mendakwa Anwar bukan kerja Pak Lah. Ia adalah kerja Mahathir. Dalam erti kata lain Pak Lah tidak ada apa-apa 'kelukaan' dengan Anwar. Kes yang berlaku bukan menyebabkan Pak Lah. Mahathirlah yang bertanggungjawab sepenuhnya.

Nasib yang diterima Anwar mungkin bagi Pak Lah sebagai kifarah perbuatan dan egois Anwar kepadanya sewaktu Anwar berada dalam Umno dan menjawat jawatan Timbalan Perdana Menteri dahulu.

Urusan awal untuk memenjarakan Anwar, Pak Lah tidak ada *sher*. Pak Lah cuma gembira kerana kejadian itu boleh memberi peluang kepadanya sedangkan peluang itu sudah dikira tertutup apabila Anwar menduduki tempat yang diduduki Pak Lah hari ini. Itulah keuntungan diperolehi Pak Lah di atas angkara menimpa Anwar. Namun kalau hendak dituduh Pak Lah adalah salah seorang konspirator adalah

tidak benar.

Sebagai manusia Pak Lah masih ada ehsan, masih ada simpati dan masih ada rasa kemanusiaan. Insaniah. Meskipun hubungan kepartian di antara Pak Lah dengan Anwar sudah terputus, tetapi hubungan politik dan kemanusian masih hidup dan mengalir. Pemikiran Anwar tetap menguasai idelisme Pak Lah dan sebaliknya, kesantunan dan keikhlasan Pak Lah berlegar di dalam jantung hati Anwar.

Jika dilihat kepada raut muka, Pak Lah tidak menyimpan sebarang dendam politik kepada Anwar. Beliau seorang yang bersifat *tawakkal tulillah* – menyerahkan kepada Allah. Pak Lah lebih mengambil pendekatan berdamai daripada berkonfrantasi, ini dapat dilihat kepada sikapnya yang cuba mengelakkan dari membuat kenyataan yang kontroversi.

Sebagai seorang yang yakin dengan *qada* dan *qadar* Allah, Pak Lah tidak menerima Anwar sebagai penghalang untuknya menjadi Perdana Menteri. Bagi Pak Lah takdir dan ketetapan Tuhanlah yang akan menjadi penghalangnya. Dari dulu hingga kini Pak Lah tidak berlawan dengan sesiapa. Beliau hanya berhadapan dengan takdir. Sekiranya beliau berjaya menewaskan takdir, maka beliau akan menjadi PM, ke lima.

Tidak ada sebab untuk beliau terus memerapkan Anwar di dalam penjara. Anwar tidak berdosa kepada cucu Abdullah Fahim itu. Dan sekiranya pembebasan Anwar di atas tangan Pak Lah, apakah Anwar tergamac untuk melupai budi? Tidak. Anwar kini bukan Anwar 20 tahun lalu, atau 30 tahun lalu. Anwar hari ini adalah Anwar baru. Anwar sedang menjalani proses keinsafan dan kelahiran baru untuk menjadi manusia dan seorang pemimpin *mutaqqim*.

Anwar boleh melupai apa-apa yang beliau lakukan ke atas

Pak Lah. Kalau pun untuk tidak datang memohon maaf dan berterima kasih, tetapi jauh di sudut hatinya beliau mesti berbuat demikian. Setinggi mana ego manusia apabila ia ditimpakan taufik dan hidayah ia akan mengaku kalah juga. Sekeras-keras hati Syaidina Omar al-Khattab akhirnya lembut juga apabila mendengar ayat-ayat al-Quran yang dibaca oleh adindanya.

Para penyokong Anwar tidak dapat menyelami perasaan halus ini. Jika Anwar bebas mereka tentu akan mengampungkan Anwar untuk menjadi syarikat baru yang akan di senaraikan di bursa saham politik. Tujuannya untuk menentang Pak Lah. Mereka mengira Pak Lah adalah kacang bagi Anwar. Kemungkinan ini tidak dapat tidak akan berlaku.

Jika pencaturan ini dapat diterima, maka Anwar harus memberi *signal*/kepada orang-orangnya agar membantu Pak Lah agar selamat naik takhta. Andaian ataupun ulasan politik yang mengatakan Pak Lah lebih rakus, haruslah diketepikan. Jangan meletakan prejedis itu di tengah-tengah kepala kita sebaliknya memerengkan sedikit. Bab kata orang bercakap biarlah berlapik, bercakap siang pandang-pandang bercakap malam dengar-dengar!

Bagai mana proses pembebasan Anwar boleh dilakukan? Di sini bukan saya hendak mengemukakan teori atau kaedah bagaimana pembebasan itu boleh dilakukan. Tetapi ini adalah satu pendapat dan kemungkinan boleh dilakukan dan ianya sangat fantastik sekali.

Ramai orang membayangkan Anwar akan mendapat pengampunan, seperti bekas MB Selangor Harun Idris dan bekas Menteri Belia dan Sukan, Mokhtar Hashim. Tetapi kita sedia maklum, demi menjaga maruah, Anwar tidak akan mahu proses pembebasannya beracuan demikian. Kalau sebelum ini Anwar benar kononnya menolak tawaran

kompromi Mahathir, masakan dia bersedia pula untuk menerima pembebasan berbentuk ehsan itu.

Justeru ada cara lain. Seorang penulis veteran yang kuat menyokong Pak Lah tidak setuju apabila saya ingin menulis sebuah artikel berjudul 'Pak Lah Bebaskan Anwar'. Katanya tajuk itu begitu bombastik dan ia boleh menimbulkan masalah kepada Pak Lah. Saya rasa Pak Lah pun akan bebaskan Anwar, dan saya setuju *you* tulis. Tetapi bukan dalam bentuk begitu jelas seperti *you* bayangkan itu, katanya.

Saya rasa lebih lunak kalau, *you* timbulkan pembebasan menerusi mahkamah, iaitu perbicaraan semula. Selepas Mahathir undur nanti, peguam Anwar kemukakan rayuan untuk mengadakan perbicaraan semula. Saya rasa kalau diadakan perbicaraan semula, Anwar lepas, tambahnya.

Maksud *you* perbicaraan sebelum ini tidak adil? Tanya saya. Kita tidak boleh bercakap apa-apa mengenai mahkamah dan keputusan yang telah dibuat (*contempt of court*). Silap hari bulan *you* dan / akan bersama Anwar, di Sungai Buluh. Dia ketawa terkekeh macam tupai tua gatal betina.

Saya seronok, sebab orang Pak Lah ini menyedari akan perjalanan perbicaraan Anwar. Maksud *you* perbicaraan itu tidak adil? Agah saya lagi. Macam mana hendak adil, saksi di sebelah Anwar tidak boleh dipakai, barang-barang bukti ditolak. Banyak aspek dan teknikal menunjukkan perbicaraan itu berat sebelah. Perbicaraan itu pada saya tidak adil sama sekali.

Jika diadakan perbicaraan segala keterangan saksi pihak pendakwa diambil semula dan segala fakta yang disembunyikan ditimbulkan semula, barulah perbicaraan dijalankan dengan penuh keadilan. Dan masa inilah keputusan mahkamah boleh berubah.

Sungguh menarik pandangan penulis veteran ini. Saya rasa dia juga adil dalam membuat penilaian. Sebab dia tidak ada kepentingan apa-apa dengan Anwar tetapi seorang yang berpegang kepada prinsip Islam. Gaya hidupnya tidaklah mencerminkan dia Islam, seratus peratus tetapi dia begitu kejap memegang prinsip agamanya.

Sebenarnya banyak *benefit* ataupun kebaikan yang bakal diperolehi Pak Lah sekiranya Anwar dibebas ataupun mendapat pengampunan di era beliau. Sudah tentu Pak Lah tidak akan dilihat sebagai seorang berdendam, sebaliknya beliau dipandang seorang ikhlas dan adil. Beliau tidak cuba mengambil kesempatan untuk mengukuhkan kedudukannya dengan terus menyulitkan Anwar. Pak Lah boleh memenjarakan Anwar atas dasar untuk memantapkan kedudukannya. Tetapi kita tidak fikir dia akan lakukan begitu. Tidak mungkin Pak Lah turut sama mengamalkan kaedah (sistem) politik menghalkan cara.

Bukan jenis Pak Lah melakukan kekejaman kepada orang lain semata-mata untuk menyelesakan kedudukannya. Stail politik balas dendam tidak ada pada Pak Lah. Orang-orang Anwar yang sebelum ini memperlekehkan Pak Lah juga akan sedar dan insaf akan tindak tanduk mereka sebelum ini. Hatta Anwar sendiri akan berterima kasih banyak.

Untuk menerima perkara ini Anwar tidak seharusnya prejudis kepada Pak Lah. Beliau kena menerima peluang ini dengan sebaik-baiknya demi untuk dirinya sendiri. Peluang ini juga boleh dijadikan jambatan yang menghubungkan semula di antara Kepala Batas dengan Cheruk Tok Kun. Dan lebih nostalgik lagi menghubungkan semula tali silaturahim sesama Islam.

Kalau berlaku keadaan itu Pak Lah sedar apakah risiko yang bakal menimpanya. Sebagai seorang pejuang Anwar

tidak boleh diamkan diri. Segala cita-cita dan idealismenya tidak terlaksana beliau akan berjuang. Pak Lah amat menyedarinya. Tetapi Pak Lah tidak perlu takut kepada kemungkinan itu. Anwar pula boleh menahan diri untuk tidak menganggu kerajaan Pak Lah. Anwar kenalah berikan peluang kepada Pak Lah setidak-tidaknya untuk dua atau tiga tahun sebagai ufti yang tidak dipinta.

Sikap memberi dan menerima, mengenang budi bolehlah harus ada di antara keduanya. Kejernihan di dalam politik bangsa Melayu perlu ada dalam suasana kita sedang menghadapi berbagai ancaman ini. Perpaduan itu dapat dicapai sekiranya pemimpin masa depan yang berkaliber seperti Anwar, Pak Lah dan Haji Hadi duduk semeja. Mereka berdua ini adalah aset negara yang tidak ternilai!

Kalaularah Dr Mahathir gagal dan Allahyarham Fadzil Noor pula tidak berkesempatan untuk mengharmonikan Melayu Umno dan Pas biarlah agenda agung itu diteruskan oleh Pak Lah, Haji Hadi dengan menjadikan Anwar Ibrahim sebagai obor penyatuan itu.

Itu dan begitulah satu proses bagaimana Anwar boleh dibebaskan! Pada saya apa yang paling indah ialah selepas Pak Lah, Anwar yang akan mengambil alih teraju pemerintahan negara. Heararki ini juga nampak tersusun apa lagi jika dikira dari segi usia dan pengalaman Pak Lah dahulu makan garam berbanding Anwar. ©


UNDURKAH MAHATHIR?



NAJIB: Pak Lah / nak tanya sikit. Bila *you* jadi PM nanti apakah *you* akan bebaskan *brother* Anwar Ibrahim? / harap Pak Lah tidak mudah lepaskan dia. Kalau dia keluar habislah kita. Pak Lah bukan tidak tahu pengaruh Anwar tu banyak dan dalam Umno hari pun masih ada orangnya. Cuma mereka selindung macam burung puyuh, kepala lindung ekor tertungging. Saya benar-benar bimbang hal ini Pak Lah.... Satu perkara lagi, / nak sebut dekat Pak Lah, kalau Pak Lah tak ambil saya jadi timbalan pun tak mengapa. Saya tak kisah kalau Pak Lah nak ambil Muhyiddin ke, Mat Taib ke... tetapi satu sahaja harapan / janganlah Pak Lah terus pinggirkan saya. Satu lagi kalau ada orang kata saya nak *team-up* dengan Tengku Razaleigh seandainya berlaku apa-apa perlawanan dalam Umno itu usahlah dengar, semua itu fitnah.

PAK LAH: (Merungut dalam hati) Eh budak ni pasal apa pula cakap yang bukan-bukan ni...

UNDURKAH MAHATHIR?



ALMARHUM Ustaz Fadzil Mohd Noor sewaktu hayatnya masih ada telah berusaha untuk membebaskan sahabatnya Anwar Ibrahim. Fadzil bukan sahaja berusaha dengan cara mendesak Anwar diberikan keadilan, tetapi turut juga menyertai demonstrasi bersama rakyat. Kemuncak kepada usaha almarhum ialah apabila beliau dikatakan mengunjungi Mahathir meminta jasa baik agar memberi keadilan seterusnya membebaskan Anwar Ibrahim. Namun usaha almarhum itu tidak berhasil. Mahathir tetap juga berkeras dengan tindakannya. Sukar untuk dibayangkan apakah sekiranya Dollah Badawi yang duduk di tempat Mahathir hari ini beliau akan menerima rayuan almarhum Fadzil Noor dan memberi keadilan kepada Anwar? Kita sama-sama tunggu...



Mustahil Anwar bebas 14 April!

3

TEGASNYA selagi Anwar Ibrahim tidak dibebaskan, selama itulah orang akan bertanya mengenainya. Mereka yang simpati dan mendokong perjuangan serta kagum dengan stail kepimpinannya akan terus berdoa dan berjuang untuk membebaskannya. Mereka tidak akan berhenti.

Walaupun dahulu ratusan ribu yang berjuang untuk membebaskan Anwar dan kini tinggal puluhan ribu sahaja kerana pelbagai hambatan dan tekanan, namun mereka tetap juga akan memperjuangkannya. Mereka tetap akan terus bersama isteri dan anak-anak Anwar.

Sisa-sisa penyokong Anwar yang tinggal hari ini tidak lagi begitu ghairah mengharap Anwar menjadi Perdana Menteri. Penerusan perjuangan mereka kini lebih sifat peri kemanusiaan (humaniti). Bagi mereka cukuplah kalau Anwar

dibebaskan untuk membolehkan beliau bebas dan menjalani kehidupan seperti orang biasa bersama isteri dan keluarganya. Anak-anaknya begitu haus kasih sayang dan cintanya. Paling minimum yang mereka harapkan, setakat itulah.

Bagaimana pun, bukan begitu apa yang terbuku di hati Anwar. Anwar tidak berubah walaupun setapak. Semangatnya tidak luntur walaupun secalit. Selaku pejuang Anwar tidak akan mudah lemah. Penjara Sungai Buloh mengentalkan semangatnya. Sekiranya beliau keluar, beliau akan tetap menjadi Anwar seperti tahun 1974 dan Anwar pada tahun 1998 – seorang pejuang rakyat. Seorang pejuang yang bersedia menggadaikan seluruh kehidupannya demi manusia lain. Yang menggadaikan masa depannya untuk sebuah kebenaran dan keadilan menerusi apa yang disebut sebagai reformasi.

Anwar adalah dewa yang tidak boleh melihat ketidak-adilan bermaharajalela melata di hadapan matanya. Anwar adalah dewa yang tidak tergemark untuk sama-sama bersekongkol dengan kejahatan dan kebejatan yang menggongong harta dan hak rakyat. Anwar tetap sebagai makna namanya itu Anwar bererti "bercahaya".

Seorang ulama dari Indonesia menyifatkan nasib yang menimpa ke atas diri Anwar hari ini adalah takdir Allah yang disengajakan. Anwar menjalani hukuman itu sebagai satu proses untuk mematangkan akal politiknya serta menguatkan keimanan dan ketakwaannya. Katanya proses itu perlu dijalani Anwar kerana keimanan dan ketakwaannya sebelum ini hanya setipis kulit bawang. Kalau Anwar diangkat menjadi pemimpin pada waktu nilai keimanannya setipis itu, pasti dia akan gagal juga. Sebagai manusia pemimpin Islam Anwar seharusnya memiliki keimanan yang lebih tebal. Nah, penjara

itu adalah proses menebalkan keimannnya. Demikianlah kata kiyai keramat itu.

Iya Anwar akan terus bereformasi. Itulah janji dan sumpahnya. Tidak ada guna beliau diberikan nafas oleh Tuhan kalau bukan untuk berjuang. Saya yakin dan tetap yakin mengenai itu. Sebagai seorang Islam yang mengenal hakikat diri dan kenapa dia dihidupkan Anwar tidak akan surut ke belakang. Beliau sudah mengorbankan lebih daripada separuh kehidupannya untuk perjuangan. Masakan apabila sampai digaris kemuncak beliau berhenti! Sepatah kata Almarhum Buya Hamka; *hidup ini adalah untuk perjuangan!*

Justeru demikian diri dan kehebatan Anwar, maka orang-orang yang sayangkan kepada Anwar terus berjuang. Mereka terus menanti penuh kesabaran. Mereka tetap yakin Anwar satu hari akan keluar juga dari kurangan. Anwar seperti sang bayi dalam kandungan ibu, apabila genap sembilan bulan sembilan hari, dia akan keluar dengan sendiri. Ketika itu tidak ada desakan, tidak ada paksaan, tidak ada siapa boleh menahannya, dia tetap akan keluar atas fitrahnya sebagai seorang makhluk dan khalifah Allah s.w.t.

Berpegang kepada fitrah itulah mereka berkeyakinan bahawa Anwar akan keluar dan menerajui semula kepimpinan negara ini. Anwar akan muncul bersama gelombang baru yang lebih bermakna lagi. Anwar akan membawa obor untuk bangsa Melayu dan agamanya, seterusnya obor untuk Malaysia seluruhnya. Bagi mereka, mereka tidak tampak lagi sesiapa selain Anwar yang benar-benar layak untuk mengibarkan panji bangsa di abad ke 21 ini.

Firasat ahli kitab yang mengatakan bahawa akan bangkit seorang mujadid (pembaharu) di sebelah Timur di akhir abad ini, telah disangkutkan ke atas bahu Anwar. Anwar dilihat

sebagai mujadid berkenaan. Demikian tinggi dan agungnya pengkultusan mereka terhadap Anwar. Memang kalau dilihat kepada kualiti pemimpin yang ada, Anwar layak untuk memenuhi atau menerima gelaran itu. Dan jika dibandingkan dengan beberapa tokoh, jelas sekali bahawa Anwar memiliki segala itu. Semisalnya diperbandingkan di antara bekas-bekas Timbalan Perdana Menteri, Musa Hitam, Ghafar Baba dan Abdullah Badawi, Anwar jauh lebih berwibawa dan mempunyai pengaruh yang melaut.

Jika diukur baik dari sudut latar belakang dan ilmu Islam serta iltizam untuk melaksanakannya, Anwar jauh lebih prihatin dan mempunyai komitmen untuk mendaulahkan Islam berbanding mereka. Disebabkan terlalu vokal untuk membangunkan Islamlah maka beliau disabotaj. Penghinaan ke atas diri Anwar adalah sebotaj paling dasyat. Perbuatan itu dilakukan oleh mereka yang anti Islam. Benar Islam Anwar agak lewes (longgar) tetapi yang jelasnya beliau mempunyai bingkai atau *frame* Islam sendiri. Istilah madani, insan kamil, rabbani dan lain-lain adalah sinonim dengan Islam Anwar.

Masih ingat seorang penyokong kuat Anwar bernama Mustafa Taib pernah memartabatkan Anwar sebagai mujadid di abad ini. Sewaktu orang bernama Mustafa ini sedang mengagungkan Anwar, beliau membelek kitab-kitab lama sebagai hujah untuk menguatkan pendapatnya bahawa Anwar adalah seorang mujadid. Dan sewaktu Anwar dalam keadaan kritikal untuk ditendang dari Umno, Mustafa inilah juga orang yang menjajah ke seluruh Pattani menemui Tok Imam, Bilal, Siak, orang alim dan sebagainya meminta mereka berdoa dan bersembahyang hajat agar Anwar tidak dipecat. Khabarnya sebanyak RM70,000.00 telah diperuntukkan untuk tujuan itu. Tetapi sayang iman perjuangan orang bernama Mustafa Taib (tahi) ini tidak kuat.

Apabila beliau ditayangkan VCD lucuh Anwar beliau terus terbalik menentang Anwar. Kini beliau telah digelar Datuk!

Kita tidak menolak bahawa apa yang disebutkan itu ada kebenarannya. Berdasarkan kepada beberapa ciri yang dimiliki oleh mujadid-mujadid sebelum ini, Anwar termasuk di dalam senarai sebagai seorang mujadid. Di antara ciri-ciri mujadid ialah, seorang berpandangan jauh, mempunyai idealisma yang hebat dan mendapat sokongan orang ramai.

Kalau didasarkan kepada ciri-ciri itu jelas Anwar salah seorang yang boleh diketogorikan sebagai mujadid atau reformis. Jika diperhatikan kepada alur pemikiran Anwar untuk membangunkan masyarakat, beliau memang mempunyai pandangan dan landasan yang kukuh. Masyarakat madani yang hendak diwujudkan itu adalah sebagai satu pandangan atau gagasan beliau. Sementara itu gerakan reformasi yang dicetuskan itu, membuktikan beliau mempunyai pengaruh atau kuasa gerak-massa yang sungguh hebat.

Tidak pernah berlaku perhimpunan rakyat yang begitu besar pada satu masa di negara ini sebelum ini. Tetapi ia menjadi satu sejarah pada 20 September 1998 apabila Anwar turun dari masjid negara ke Dataran Merdeka untuk menggayang dan mendesak Mahathir berundur. Perhimpunan itu adalah sejarah dan satu mercu tanda kekuasaan Anwar dan kecintaan rakyat kepadanya perjuangannya.

Bukan sebarang orang dapat mengejutkan rakyat sebegitu besar. Membina lautan manusia di tengah-tengah kota raya. Tanpa diupah, diundang, mereka datang sendiri di atas rasa dan sikap untuk bersama Anwar. Yang hadir bukan golongan politik marhain, tetapi teknokrat, profesional juga turut menyatu diri melaungkan perkataan *undur Mahathir undur!*

Hari ini sudah hampir genap empat tahun beliau menjalani hukuman penjara di Sungai Buloh. Empat tahun satu detik mungkin panjang bagi Anwar, tetapi lagi lama bagi orang di luar yang merinduinya terutama anak-anak dan isterinya. Bagi mereka yang mencintainya sudah tidak tertahan untuk melihat beliau bebas dan berada bersama rakyat. Kini beliau diharapkan akan keluar secepat mungkin. Pengumuman Mahathir untuk berundur Oktober ini menjadi orang sasau menanti keluarnya Anwar. Yang lebih emosionalnya, mereka mahukan Anwar mengambil alih tempat Mahathir? Peminat dan pendokong Anwar merasakan mereka tidak kecukupan masa untuk berusaha agar Anwar keluar dalam waktu tidak sampai sembilan bulan lagi.

Ghairah itu menyebabkan tanpa disedari sudah ada semacam kempen mengenai pembebasan Anwar pada April ini. Golongan yang berkempen ini begitu yakin sekali Anwar akan bebas. Ada beberapa asas yang mereka letakkan Anwar akan keluar pada 14 April ini. Pertamanya kononnya ada semacam persefahaman di antara Mahathir dengan Anwar. Kedua ialah kebetulan tempoh hukuman penjara selama enam tahun sudah genap setelah ditolak 1/3. Setiap banduan berhak mendapat potongan sebanyak 1/3 daripada tempoh sebenar tahanan sebagai ganjaran kerana berkelakuan baik. Sementara hukuman penjara sembilan tahun, adalah hukuman berasing, dan hukuman berkenaan boleh dijamin.

Sekiranya Anwar benar-benar mendapat hak potongan 1/3 kerana berkelakuan baik serta polis bersedia memberi jaminan ke atas kes kedua, (penjara sembilan tahun) ini bermakna Anwar ada harapan untuk bebas dan dapat menyedup udara bersih pada 14 April hadapan.

Penantian dan andaian ini sudah agak lama tersebar. Ia menjadi semakin meluas sebulan dua ini. Pihak Parti

Keadilan Nasional (keADILan) sendiri sedang giat berusaha ke arah pembebasan itu. Dalam satu program di Taman Melewar pada 6 Mac seorang peguam Anwar secara optimis telah menyebut kononnya waran pembebasan Anwar pada 4 April telahpun berada ditangannya. Sejauh mana ianya benar atau tidak walahu dalam kerana peguam berkenaan sebelum ini pun bercakap lebih lajuk dari laju. Banyak fakta ataupun maklumat terkini mengenai Anwar tidak betul dan cerita-ceritanya melampau sehingga tidak munasabah langsung dan memakan diri sendiri.

Manakala asas yang digunakan kononnya kedua 'negarawan' — Mahathir dan Anwar ada persefahaman ialah apabila, Mahathir dikatakan telah menarik balik bankrupsyi ke atas Anwar Ibrahim. Mereka berpendapat, jika tidak ada apa-apa masakan bankrupsyi itu akan berlaku. Penarikan balik bankrupsyi ke atas Anwar oleh Mahathir itu dilihat sebagai satu petanda seumpamanya terbitnya anak bulan Ramdhan untuk umat Islam memulakan puasa!

Pada saya, saya tidak nampak sedemikian. Penarikan balik bankrupsyi ke atas Anwar bukan hujah yang kuat. Mahathir tidak mudah untuk berbuat demikian. Sekali dia mencincang seseorang dia tidak akan memberi peluang orang itu hidup lagi. Itu perangai Mahathir. Mahathir seorang pendendam. Apa yang berlaku kepada Tengku Razaleigh Hamzah boleh dijadikan ikhtibar.

Demikian hujah seorang yang menyakini akan perkembangan itu. Saya percaya dia juga adalah di antara orang yang sedang mengatur perdamaian di antara Anwar dengan Mahathir. Selain itu perkara itu dijadikan hujah, perubahan sikap beberapa orang sahabat Anwar yang belum tiba-tiba kini berubah dengan mengirimkan surat dan kad Hari Raya kepada Anwar juga turut dijadikan pedoman,

kononnya Anwar berada di ambang pembebasan. Mereka itu cuba berbaik dengan Anwar semula setelah mendapat isyarat pembebasan Anwar!

Saya bukan pesimis dalam soal ini malah ikut sama berdoa untuk melihat Anwar bebas. Memanglah umat Melayu dan rakyat negara ini akan mendapat manfaat besar kalau kedua mereka berbaik. Apa lagi kalau Mahathir memulangkan Anwar kepada rakyat sebagai orang bakal mengambil alih jawatan PM. Bangsa Melayu khususnya dan rakyat Malaysia amnya boleh berkenduri. Mereka berdua juga mendapat rahmat besar di sebalik perdamaian itu.

Anwar menikmati kebebasan hidup sementara Mahathir mendapat sanjungan rakyat. Perdamaian itu menyebabkan Mahathir berhak menerima piala sebagai pemimpin sejati Malaysia. Kebencian rakyat kepada Mahathir sebelum ini juga akan hilang dan berganti dengan rasa bangga dan sayang yang setingginya.

Tetapi apa yang disampaikan itu adalah perkara di luar dugaan. Saya tidak fikir semudah itu bagi mewujudkan perdamaian di antara kedua mereka. Mahathir telah mengumumkan bahawa Pak Lah akan mengambil alih tempatnya. Mahathir tidak akan bertindak seperti orang bodoh begitu. Tidak! Saya memberi pandangan bahawa Anwar tidak akan keluar dari tangan Mahathir. Mahathir tidak sesekali akan membuka pintu penjara Sungai Buloh.

Di bawah ini saya turunkan rencana kecil dialog saya dengan salah satu kumpulan yang berusaha untuk mendamaikan Anwar dengan Mahathir. Mereka memberi hujah kenapa Anwar perlu dibebaskan sewaktu Mahathir masih menjadi Perdana Menteri, dan membuat perhitungan karier politik Anwar akan berakhir kalau beliau dibebaskan selepas Pak Lah menjadi Perdana Menteri.

UNDURKAH MAHATHIR?

Saya ingin menanyai ustaz (saya), apa pandangan ustaz mengenai Pak Lah? Sejauh manakah Pak Lah mampu untuk menjadi Perdana Menteri. Aktivis pencari jalan untuk membebaskan Anwar itu menyoal saya. Dia meletakkan soal kemampuan Pak Lah menyebabkan Mahathir mencari orang lain untuk mengambil alih tempatnya. Ironisnya orang itu bagi dia ialah Anwar Ibrahim.

Kalau 20 orang kita tanya mengenai peluang Pak Lah, 21 orang menjawab Pak Lah tidak berkemampuan dan tidak akan menjadi Perdana Menteri. Kalau Khalid Jafri memberi 50 dalil mengapa Anwar tidak boleh menjadi PM, maka bagi Pak Lah pula ada 51 dalil, jelas saya.

Aktivis itu ketawa berdekah-dekah dia cukup seronok dengan ejekan dan analogi saya kepada Pak Lah itu. Tiga orang kawan yang ada sama turut ketawa mendengar ejekan itu. Semua mereka adalah penyokong kuat (*hard core*) Anwar.

Itulah, ustaz sendiri nampak perkara ini, tekannnya. Tetapi saya tidak menjadikan itu sebagai alasan. Dr Mahathir tidak akan mempedulikan soal mampu atau tidak Pak Lah menerajui kepimpinan negara. Dia mahu pamit kepada Malaysia dalam situasi jiwanya tenang. Pak Lah adalah pilihan terakhir yang terpaksa beliau lakukan. Soal mampu atau tidak untuk Pak Lah memikul tugas sebagai PM perkara itu subjektif. Pak Lah masih belum berpeluang menunjukkan keseluruhan kemampuannya. Beliau berada dalam batas kuasa dan lingkungan suasana yang menjadikannya sangat berhati-hati.

Seperti mana ujar Annuar Musa bekas Menteri Pembangunan Luar Bandar apabila ditinjau pendapatnya mengenai Pak Lah. Katanya, Pak Lah belum mempunyai kuasa sepenuhnya. Apabila beliau mendapat kuasa penuh nanti disitulah baru kita dapat menilai sejauh mana

kemampuannya. Dalam keadaan sekarang ini Pak Lah tidak boleh berbuat apa-apa, beliau masih timbalan PM. Menilai dalam keadaan kuasa 50 peratus tidak adil.

Jadi *you* yakin Anwar akan bebas ditangan Mahathir? Ini bermakna pandangan kita berbeza. Saya tetap yakin Anwar akan bebas tahun 2004 dan tahun 2006 dia akan jadi Perdana Menteri. Tetapi yang membebaskannya ialah Pak Lah bukan Mahathir. Teori atau penemuan kita kontra, kata saya. Aktivis itu menggelengkan kepala lalu berhujah; tidak Anwar tidak akan bebas ditangan Pak Lah. Seboleh-boleh beliau hendak bebas di masa Mahathir. Sekiranya bebas di zaman Pak Lah, karier politik Anwar akan habis, ujarnya yakin.

Mengapa? Bukankah ramai orang berpendapat lebih senang Anwar aktif di zaman Pak Lah? Siapalah Pak Lah bagi Anwar? Seluruh orang melihat Pak Lah adalah seorang ketua yang lemah dan tidak mempunyai kekuatan diri seperti Mahathir. Pak Lah tidak mungkin dapat menandingi Mahathir. Keadaan itu menyenangkan Anwar untuk kembali duduk di atas semula, saya menghujah dan pohon ualasan daripada mereka.

Tidak Anwar harus berusaha melepaskan diri ataupun mendapat pembebasan di zaman Mahathir. Masanya sungguh singkat sangat. Sebab itu kita berkeyakinan Anwar akan bebas pada April ini. Perdamaian di antara keduanya sedang berjalan! Aktivis itu mengemukakan teorinya, sekiranya Anwar dibebaskan sebaik Pak Lah naik, bermakna bintang politik Anwar akan suram dan malap.

Lalu beliau membuat ulasan ringkas bagaimana kehancuran Anwar. Katanya sebaik Pak Lah menjadi PM, beliau akan memenuhi tuntutan Anwar dan desakan rakyat sebelum ini, iaitu membenarkan Anwar pergi berubat di luar negera. Kali pertama Pak Lah mempengerusikan mesyuarat

kabinet beliau tidak menyentuh sedikitpun mengenai Anwar. Tetapi mesyuarat kali kedua beliau akan membuat pengumuman mengejutkan. "Mesyuarat kabinet telah bersetuju dan mengambil keputusan untuk membenarkan bekas TPM Datuk Seri Anwar Ibrahim pergi mendapat rawatan di luar negeri. Seluruh perbelanjaan rawatan dan permergian keluarganya akan ditanggung oleh kerajaan..." itulah pengumuman Pak Lah, katanya.

Apa yang ustaz fikir waktu itu? Apakah Anwar hendak tolak? Dan kita semua hendak tolak? Sebab selama ini itulah yang kita perjuangan – agar *brother* kita itu mendapat rawatan di luar negeri. Anwar dan keluarganya sendiri beberapa kali memohon untuk mendapat rawatan. Apabila Pak Lah telah membenarkannya Anwar tidak boleh tolak lagi.

Hendak tak hendak Anwar kena pergi. Keadaan ketika itu kalau tidak pergi rakyat akan menyalahkan Anwar. Bagi Pak Lah pula apapun keputusan yang Anwar buat dia sudah mendapat kredit daripada rakyat. Rakyat akan melihat betapa baik dan ikhlasnya Pak Lah sebagai seorang pemimpin.

Anwar kena pergi. Dan apabila beliau balik semula, beliau akan kena menyambung hukuman penjara. Di sinilah politik Anwar akan *khalas, habis!* Simpul aktivis itu dengan mudah sambil tersenyum lebar membanggakan teorinya sendiri.

Saya mengulum bibir sambil memikir dimanakah logiknya teori itu. Memang benarlah kalau andaian itu berlaku bermakna kerier politik Anwar berakhir. Tetapi saya tetap mempunyai keyakinan bahawa Anwar tidak akan mengakhiri perjuangannya selagi nafasnya berdenyut dan selagi darahnya mengalir dalam urat sarafnya. *Jasad tuan di dalam penjara, Jiwa tuan di hati hamba; Api reformasi terus menyala, Tidakkan padam sebelum berjaya.* Itulah pantun saya untuk Anwar.

Mungkin kerana menerima teori itulah maka aktivis atau pendokong Anwar yang sudah kepatahan semangat itu beriya berikhtiar mahukan Anwar bebas segera. Bebas di zaman Mahathir berkuasa. Saya cuba menghalang pendapat mereka dengan bertegaskan Dr Mahathir tidak mungkin berbuat begitu berpandukan kepada beberapa hujah. Di antaranya untuk apa Mahathir memanjarakan Anwar kalau beliau mahu membebaskannya semula.


Saya tidak nampak Dr Mahathir akan melakukan kerja bodoh. Para aktivis itu tidak bersetuju dan masih cuba mempengaruhi saya. Katanya sudah nampak tanda-tanda awal bahawa jalan ke arah perdamaian akan berlaku. Selain apa yang disebut di atas tadi, beliau menyebut kata-kata Mahathir ketika mesyuarat Barisan Nasional baru-baru ini. Dakwanya Mahathir ada menyebut di dalam mesyuarat itu sebelum berhenti beliau akan selesaikan segala masalah termasuklah masalah yang orang fikir tidak mungkin diselesaikan. Masalah yang dimaksudkan itu ialah masalah Anwar Ibrahim?

Lebih ironi lagi masalah Anwar itu akan diselesaikan dalam tempoh percutian Mahathir selama dua bulan bermula Mac hingga April. Mereka meramalkan sebaik sahaja Mahathir meninggalkan negara untuk bercuti maka berlakulah perkara ini. Proses pembebasan itu akan berjalan seperti mana dirancangkan itu. Begitulah dakwa aktivis itu begitu serius sekali. Saya hanya mendengar dan berfikir. Jauh di sudut hati masih tetap mempertahankan bisikan hati (resa) saya, bahawa Anwar akan bebas tahun 2004 ditangan Pak Lah dan bukannya ditangan Mahathir.

Perihal pentingnya kenapa Anwar perlu bebas berdasarkan pengakuan Tok Guru Nik Aziz Nik Mat, katanya; Anwar adalah seorang pemimpin yang berbakat, kita sukar untuk mendapat

UNDURKAH MAHATHIR?

seorang pemimpin berjiwa Islam seperti Anwar. Apa yang Mahathir lakukan itu tidak kena, ana tidak setuju dengan cara Mahathir itu. Anwar tidak sepatutnya dilakukan begitu, dia seorang berbakat dan telah pun menunjukkan jasanya kepada Islam dan negara ini. - ©



BANGUNAN Sultan Abdul Samad merupakan bangunan bersejarah dan di antara bangunan tertua di negara ini. Ia dibina di zaman British. Bangunan ini menjadi kompleks mahkamah negara ini. Di sinilah tempat mantan TPM Anwar Ibrahim berusaha mendapatkan keadilan!

UNDURKAH MAHATHIR?



KALAU mengikut adat dan perhitungan orang yang waras, pada 14 April ini genaplah tempoh hukuman penjara enam tahun ke atas Anwar Ibrahim bagi kesalahan pertama bersabit dengan liwat. Besar harapan rakyat mahu melihat penjara memberi keadilan kepada bapa reformis itu. Para penyokong Anwar telah melancarkan kempen pembebasan Anwar sejak beberapa lalu. Sebenarnya soal pembebasan Anwar bukan lagi didasarkan kepada keadilan dan kebenaran. Pembebasan Anwar diambil kira kepada kesan dan risiko kepada parti memerintah jika beliau dibebaskan. Ramai orang berkeyakinan selagi Dr Mahathir menjadi Perdana Menteri Anwar tidak akan bebas. Apakah Anwar akan bebas setelah Dollah Badawi menjadi PM?



UMNO Pasca Era Mahathir

4

POLITIC is the possible game – demikian ungkapan Palco Machiavelli bapa politik Yunani. Memahami akan ungkapan demikian dunia politik penuh dengan serba mungkin. Maknanya tidak ada sesuatu pegangan, taktik, atau strategi yang statik di dalam politik. Undang-undang politik tidak seperti hukum atau perintah Allah s.w.t. yang bersifat *rigid*. Ia boleh berubah mengikut masa dan keadaan. Digerak mengikut tuntutan dan keperluan semasa. Mengikut kehendak nafsu dan amarah pemainnya. Justeru apakah janji-janji di dalam gelanggang politik tidak boleh dipercayai?

Falsafah atau pegangan demikian amat bertentangan dengan ajaran Islam. Islam menggariskan dengan jelas mengenai sesuatu subjek. Islam disebalik bertolak ansur namun ia juga tegas. Kalau sesuatu itu dikatakan haram maka

haramlah ia. Sampai hari kiamat pun ia tidak akan menjadi halal. Sebab itu bagi penganut Islam mereka tidak akan bertolak ansur. Muhammad s.a.w. pernah mengatakan; *sekiranya anakku Fatimah yang mencuri nescaya tangannya akan ku potong*. Demikian tegas dan kerasnya perintah dan hukum Allah. Ia tidak ada kompromi dengan sesiapa pun meski dengan darah daging sendiri.

Bukan seperti dengan undang-undang atau hukum karma alam dan hukum karma politik. Ia boleh berubah dan orang yang memiliki kuasa sanggup melakukan pengubahan mengikut kehendak-kehendaknya.

Berdasarkan ungkapan demikian maka begitulah juga apa yang akan berlaku dalam dunia politik negara khususnya di dalam Umno selepas pengunduran Dr Mahathir bin Mohamad. Setiap apa yang digariskan oleh Dr Mahathir tidak mustahil ianya akan kekal dan diikuti oleh orang terkemudian. Pepatah Melayu juga ada mengatakan sekali air bah, sekali pasir pantai akan berubah.

Sesiapa pun tidak akan menjamin setiap apa yang dibentuk ataupun dibangunkan oleh Mahatahir ia akan tetap dan kekal abadi. Pemerintahan yang akan bangkit selepasnya tentu mempunyai perbezaan dan kelainan. Orang yang mengganti Dr Mahathir mesti melakukan perubahan ataupun islah (pembaharuan). Walaupun sebaik sahaja memangku jawatan Perdana Menteri Pak Lah berjanji untuk meneruskan Wawasan 2020 namun ia tidak terlepas dari pola-pola politik yang hidup atau berubah. Kenyataan Pak Lah itu dilihat sebagai mengampu Mahathir. Kata Pak Lah "*Wawasan Dr Mahathir telah menjadi wawasan saya dan wawasan seluruh rakyat Malaysia. Kita tidak perlu mimpikan yang lain...*"

Dalam konteks hari ini tokoh yang bakal mengambil alih tempat Mahathir ialah Datuk Seri Abdullah Badawi. Tidak

mustahil Pak Lah akan merombak ataupun membetulkan beberapa dasar yang pincang di zaman Mahathir. Pak Lah akan mengemukakan pandangan dan ideanya sendiri sesuai dengan kehendak dan zamannya. Yang jelas meskipun Pak Lah berada di bawah satu parti (Umno) dengan Mahathir tetapi mereka tetap ada perbezaan. Sama tetapi tidak serupa. Warna dhamir Pak Lah berbeza dengan warna dhamir Mahathir. Perbezaan itulah nanti menjadikan setiap apa yang dicanang atau menjadi peraturan Mahathir tidak akan diikuti oleh Pak Lah.

Perbezaan paling jelas mengenai latar belakang pendidikan serta iltizam mengenai agama Islam. Pegangan dan falsafah politik serta budaya keduanya berbeza. Mahathir dilihat sebagai seorang tegas dan keras dengan kemahuannya walaupun perwatakan sebagai sifat seorang doktornya lembut, namun hatinya keras. Ini sangat berbeza dengan Pak Lah, yang lembut serba serbi. Mengenai Islam pula, Islam Pak Lah lebih menjurus kepada apa yang gariskan dalam kitabullah (tradisional) berbanding dengan Mahathir yang suka melakukan pentafsiran baru mengenai Islam mengikut logikal akalnya.

Disebabkan Mahathir memiliki sekeping hati yang keras dan bersikap enggan menerima pandangan orang lain serta berpaksikan kepada akal semata-mata menjadi sepanjang tempoh perkhidmatannya selama 22 tahun penuh dengan kontroversi. Penuh dengan gelombang dan penuh dengan tanda tanya. Sesungguhnya bangsa Melayu di era Mahathir walaupun dilihat sebagai meraih banyak kemajuan dan pembaharuan namun bangsa Melayu berada dalam gedung kecemasan sepanjang masa. Ciri-ciri kejatian dan ketulenan Melayu terhakis sedikit demi sedikit.

Cubalah kita membelek lembaran sejarah lebih dua dekad

pemerintahan Mahathir. Setiap satu dekad ada perubahan yang fatal dan vokal yang dilakukannya, di mana perubahan itu begitu kontras dengan jiwa orang Melayu. Mahathir mempunyai hujah (*political will*) untuk membina Melayu. Namun nawaitu baiknya dengan taktik dan pendekatan agresif tidak banyak mengubah masa depan ummah Islam, khususnya dalam mengentalkan ketauhidan dan keimanan umat Islam. Dari sudut-sudut tertentu ummah Islam seperti dalam keadaan keliru oleh fatwa-fatwa agama bikinan para 'penasihat 20 persen' Mahathir.

Tahun 1980an, Mahathir memulakan satu tindakan berani dengan meminda perlembagaan negara. Pindaan itu menyebabkan timbul krisis dengan raja-raja Melayu. Tindakan itu dikira satu *gambling* (perjudian) nasib politik Mahathir yang cukup mencemaskan. Dari kerangka politik beliau menang di dalam usahanya itu, tetapi orang Melayu tidak menerima sepenuhnya dengan apa yang beliau reform.

Selepas itu beliau melakukan beberapa tindakan politik 'rimbalisme' untuk mengukuhkan kedudukannya. Kemuncak kepada tindakan politik beliau ialah apabila memecat timbalannya yang ke tiga, Datuk Seri Anwar Ibrahim. Implikasi dari pemecatan ini menyebabkan berlaku gerakan reformasi besar-besaran menuntut beliau berundur. Pemecatan itu walaupun ia membabitkan masalah peribadi di antara keduanya, tetapi ia mengheretkan politik orang Melayu dalam keadaan kucar kacir.

Sengketa peribadi mereka turut sama mengheret rakyat. Berbulan-bulan berlaku reformasi di ibu negara dan beratus rakyat pula ditahan dan didakwa di mahkamah atas kesalahan berhimpun secara haram dan engkar larangan polis.

Tindakan itu memberi kesan jiwa politik yang besar kepada beliau. Tindakan itu juga membakar hangus keseluruhan

UNDURKAH MAHATHIR?

kehebatannya sebelum ini terutama dalam merapatkan ukhwah Melayu menerusi Umno. Hakikat ini dapat di lihat kepada pencapaian partinya Barisan Nasional (Umno) di dalam pilihanraya 1999.

Peratus undi yang diperolehi Umno/BN dalam pilihanraya umum 1999 membuktikan pengaruh Umno merosot. Belum pernah dalam sejarah pilihan raya Umno menghadapi kemerosotan undi yang begitu ketara di negeri-negeri Pantai Barat. Apa yang berlaku di Selangor, Pahang dan Wilayah Persekutuan sesuatu yang tidak terjangkakan sama sekali. Umno dan BN kehilangan undi popular begitu ketara.

Di Selangor undi popular kurang 22 peratus, Wilayah Persekutuan KL 8.6 peratus, Perak 13.8 peratus, Kedah 8.8 peratus, Pahang 14.2 peratus, Negeri Sembilan 10.8 peratus, Melaka 11.2 peratus, Perlis 12.3 peratus, Pulau Pinang 8.4 peratus, Terengganu 13.5 peratus, Johor 6.5 peratus, Kelantan 4.8 peratus dan Sarawak 12.4 peratus.

Dalam sejarah pilihan raya, 1999 memberi satu impak paling besar kepada Umno. Dr Mahathir sendiri merasai akan bahana ini apabila beliau sanggup menebalkan muka mengajak Pas untuk membincangkan soal perpaduan Melayu. Mahathir menggunakan soal perpaduan Melayu untuk memulihkan reputasinya.

Sebenarnya apabila Pas enggan memenuhi permintaan Mahathir, (Pas tolak sebab kecewa dengan tindak tanduk Mahathir), beliau kecewa besar. Beliau seolah sedang menghadapi saat-saat untuk jatuh dengan hina di dalam politik. Beliau sudah merasai akan lembah yang bakal membungkus dirinya. Namun sekali lagi beliau bernasib baik, tragedi 11 September serangan ke atas menara berkembar (WTC) di Washington DC di Amerika Syarikat telah menyelamatkan beliau. Disebabkan peristiwa itu momentum

perubahan yang mula berlaku dalam pilihan raya 1999 seperti terhenti semula.

Berbalik kepada mauduk yang sedang dibahaskan, apa yang hendak difokuskan di sini ialah mengenai Umno selepas beliau berundur. Apakah Umno akan menghadapi satu lagi gelodak pergolakan ataupun akan menjadi senyap untuk beberapa ketika. Apakah selepas penguduran Dr Mahathir yang telah menjadi "tuhan" kepada parti itu, parti itu akan berkubur? Apakah Umno akan mendapat tulang belakang baru untuk menempuh gelombang atau untuk menghayunkan hayatnya? Itulah persoalannya yang tersimpul di kepala umum hari ini. Orang ramai menanti apakah warna ataupun corak Umno selepas Dr Mahathir tidak lagi menjadi Presiden parti itu.

Terimalah bahawa selepas Oktober ini Dr Mahathir berhenti. Berhenti dengan baik tanpa ada pementasan sandiwara baru yang penuh emosi dan buraihan air mata lagi. Maka Pak Lah pun akan naik menjadi Perdana Menteri. Maka tersenyumlah Cik Endon. Bermulalah satu era baru. Hendak tidak hendak ia memulakan era Umno pasca Mahathir. Era Umno di bawah Pak Lah, era Malaysia di bawah Pak Lah. Di saat inilah baru Pak Lah menjadi seorang jantan sebenarnya.

Kejantanananya akan teruji pada masa ini. Dan nama Che Det yang diagung dan dipuja itu pun akan perlahan-lahan tergeser dan meminggir daripada minda rakyat Malaysia. Lama kelamaan dia pun menjadi seperti orang biasa, seperti nelayan di Kuala Kedah, atau pengayuh beca di Kota Bharu ataupun pemungut sampah di Kuala Kemaman, Terengganu. Di kala itu Che Det tidak ada gah dan tidak ada pamor dan keramat lagi.

Sebaik memegang tampuk pemerintahan negara, cabaran awal kepada Pak Lah ialah dalam membentuk kabinetnya.

Pembentukan kabinet ini merupakan cabaran atau "testimoni" pertama buat Pak Lah. Tidak boleh tidak beliau kena hadapi perkara ini. Tentunya Pak Lah ada penasihat di dalam hal ini. Pak Lah tentu akan mencari pakar rujuk atau penasihat dalam memerintah Malaysia. Musa Hitam adalah di antara tokoh yang dikaitkan menjadi tempat rujuk Pak Lah. Namun kesemua tanggung jawab itu akan terletak di atas bahunya.

Pak Lah tidak boleh mengekalkan kabinet yang dibentuk oleh Mahathir. Apa yang dibuat oleh Mahathir adalah menurut citarasanya. Pak Lah tentu ada cita rasanya sendiri. Ada selera sendiri dan ada kesukaan sendiri. Seharusnya semua menteri dan timbalan menteri yang dilantik oleh Mahathir meletakkan jawatan seperti mana yang disarankan oleh Ling Kheng Yeik tempoh hari.

Presiden parti Gerakan itu telah meminta semua menteri berhenti sebaik sahaja Mahathir berundur. Sementalahan pula beberapa menteri kabinet yang ada hari ini dilihat tidak lagi bersih apabila setengahnya dikaitkan dengan rasuah dan penyalahgunaan kuasa yang lebih busuk daripada apa yang dituduhkan ke atas Anwar. Beberapa orang menteri perlu disamak (disucikan) oleh Pak Lah jika tidak mereka tidak layak duduk dalam satu masjid bersama Pak Lah.

Pembentukan jemaah menteri tidak mengundang masalah banyak kepada Pak Lah. Beliau boleh mengekal *status quo*. Atau menggantikan yang sudah kerepot kepada muka baru. Tetapi apa yang menjadi masalah sedikit ialah melantik timbalannya. Jawatan timbalan bukan seperti menteri kerana ia bakal menentu pemimpin masa hadapan. Itulah yang akan ditengok oleh orang ramai kelak. Lagipun jawatan ini seperti ada perebutan kecil.

Setakat ini dua nama disebut-sebut bakal menjadi timbalan Pak Lah. Pertama Muhyiddin Mohd Yassin, Menteri

Hal Ehwal Pengguna dan Najib Razak, Menteri Pertahanan. Pak Lah dikatakan cenderung kepada Muhyiddin namun tidak dapat berbuat demikian dalam saat sekarang ini, kerana Mahathir telah menunjukkan calonnya iaitu Najib Razak.

Tindakan Pak Lah dalam hal ini agak berani apabila beliau tidak mengumumkan timbalannya seperti mana yang dihasratkan Mahathir. Sebaliknya Pak Lah mengatakan beliau ada pilihan sendiri. Pak Lah mulanya hendak mengumumkan calon TPM piliahannya selepas pilihan raya kecil Pendang dan Anak Bukit, Kedah. Tetapi sesudah enam bulan pilihan raya itu berlalu beliau masih belum mengumumkan. Pembisuan ini menjadikan orang berteka-teki bahawa beliau memang mahukan Muhyiddin. Cuma untuk mengumumkannya malu alah kepada Mahathir yang beriya mahukan Najib menjadi TPM.

Sah Pak Lah tidak mahukan kepada Najib! Sekiranya Pak Lah mahukan Najib, sudah tentu dia akan mengumumkan nama Najib. Dari sumber dalaman Umno, kironnya dua kali Mahathir meminta Pak Lah umumkan Najib. Namun Pak Lah membisu. Ini menunjukkan Pak Lah tidak mahu kepada Najib dan mahu kepada Muhyiddin. Sejauh manakah benar walhulam. Harus dipersoalkan apakah berani bagi Pak Lah untuk membantah kehendak Mahathir?

Jika Pak Lah hendakkan Muhyiddin tentulah ada sebab-sebab tersendiri. Tentu ada sesuatu yang istimewa yang ada kepada Muhyiddin dan tidak ada kepada orang lain. Apakah yang menjadi perhitungan Pak Lah menyebabkan beliau mahukan kepada Menteri Hal Ehwal Pengguna dan tidak mahukan kepada Menteri Pertahanan? Meskipun Menteri Pertahanan itu dilihat lebih macho untuk jawatan itu. Apakah kerana pengaruh kedua tokoh berkenaan, ataupun keperibadian di antara kedua bekas MB? Muhyiddin adalah

bekas MB Johor sementara Najib bekas MB Pahang. Bagi Pak Lah beliau tentu ada alasan atau hujah sendiri mengapa dan kenapa?

Ada pendapat liar mengatakan Pak Lah lebih tertarik dengan Muhyiddin kerana mengenangkan pengaruh dan hubungan Muhyiddin dengan Anwar Ibrahim. Kononnya Pak Lah takut kepada kebangkitan kedua Anwar Ibrahim selepas dibebaskan dari penjara kelak. Jadi untuk memastikan bahawa Pak Lah tidak akan diganggu Anwar beliau memerlukan Muhyiddin sebagai jambatan di antara beliau dengan Anwar. Hubungan baik Muhyiddin dengan Anwar, akan digunakan oleh Pak Lah untuk menenangkan zaman pemerintahannya.

Hubung kait pengaruh Anwar dengan Muhyiddin tidak boleh dinafikan. Kemenangan Muhyiddin untuk jawatan Naib Presiden dalam pertandingan tahun 1999 dikatakan kerana pengaruh Anwar di dalam Umno. Walaupun ketika itu Muhyiddin 'keseorangan' tetapi saki baki pengaruh Anwar banyak membantunya. Kemenangan Muhyiddin itu mencerminkan bahawa roh dan jasad Anwar masih ada dalam Umno.

Begitu juga kemenangan beberapa ahli MT lain, seperti bekas Ketua Pemuda, (lupa nama) Hassan Ariffin dan lain-lain adalah di atas tempias pengaruh Anwar di dalam Umno.

Menurut teori liar itu apabila Pak Lah mengambil Muhyiddin, Pak Lah dapat memantapkan pengaruhnya di dalam Umno. Sudah tentu Muhyiddin dan orang-orang Anwar yang menyelit dan memendap di dalam Umno akan memberi sokongan bulat kepadanya. Pak Lah tidak akan menghadapi *trauma* diganggu oleh bayangan Anwar.

Pak Lah amat tidak selesa kalau dikatakan Anwar akan bangkit semula di dalam politik selepas keluar penjara. Apa

lagi jika tindakan Anwar selepas bebas seperti harimau luka terkeluar dari kandang. Pak Lah tidak berdaya dan tidak mampu untuk membendung pengaruh Anwar seperti yang dilakukan Mahathir. Lagipun bukan stail Pak Lah untuk bergasak merebut kedudukan.

Lantaran itu pendekatan politik berdamai dengan Anwar dan orang-orangnya akan dilakukan Pak Lah.

Dan untuk merealisasikan itu Pak Lah dikira bersedia untuk memberi tempat dan melayani orang-orang Anwar dengan baik. Mengambil Muhyiddin sebagai TPM dan bukannya Najib adalah sebagai petanda yang Pak Lah mahu berkompromi dengan pengaruh Anwar.

Tentang Muhyiddin adalah orang Anwar tidak disangkal kan lagi. Sewaktu Anwar menghadapi musibah dipecat oleh Mahathir, hanya Muhyiddin sahaja menteri yang sanggup ke rumah Anwar atas dasar kawan, sementara kawan-kawan lain semuanya menikus.

Saya masih ingat tepukan gemuruh dan laungan *Allahu kabar* bergema di rumah Anwar apabila Anwar mengumumkan kehadiran Muhyiddin. Kedatangan beliau ke rumah Anwar pada waktu itu dilihat betapa setia dan simpatinya beliau sebagai sahabat ke atas apa yang menimpa Anwar.

Untuk lebih mampat lagi Pak Lah boleh memanggil semula dan memberi tempat kepada tokoh-tokoh yang diketepikan oleh Mahathir kerana mereka bersimpati kepada Anwar, seperti Datuk Afifuddin Omar, Fauzi Rahman, Kamal Salleh, Latif Mirasa, Dr Ibrahim Saad, Rohani Ahmad dan lain-lain.

Apakah Pak Lah tidak takut kepada Najib? Jika ditanya pengaruh siapakah yang paling banyak di antara tiga Naib Presiden Umno sekarang semua orang bersetuju

mengatakan, Najib Razaklah Naib Presiden paling berpengaruh. Betapa berpengaruhnya Najib, beliau dikatakan boleh menghalang Jamaluddin Jarjis daripada melantik setiausaha politiknya. Jamaluddin dikatakan telah pun menamakan seorang tokoh pemuda Perlis untuk menjadi setiausaha politiknya, tetapi terpaksa tangguh kerana bantahan Najib. Jamaluddin adalah orang Najib.

Di kalangan ahli Umno di bawah umur 45 tahun mereka akan memilih Najib sebagai timbalan hatta Perdana Menteri berbanding dengan Pak Lah jika diadakan undian.

Apakah keistimewaan Najib menjadikan beliau begitu? Jawabnya cukup senang, anak perdana menteri kedua itu bijak dalam bermain politik. Beliau bersikap *play save* di dalam setiap gelombang dan ribut badai yang menimpa Umno. Beliau begitu berhati-hati dalam menentukan dirinya apabila timbul sebarang keadaan kritikal.

Dalam satu segi orang jenis Najib tidak layak untuk menjadi pemimpin utama yang memerlukan keberanian, ketegasan dan kesetiaan. Dalam menentukan kem Najib sering kali berdolak dalih dan mencari tempat yang selamat. Orang macam Najib, orang yang tidak sanggup menanggung risiko dan beban. Begitulah dasar anak bangsawan suka mengutip ikan selepas sungai dikeringkan, ataupun memakan masakan yang telah tersedia di hidang.

Dalam konteks seorang PM, hatta jika mengambil iktibar dari suka-duka politik Mahathir, Najib tidak layak sama sekali. Dalam satu apsek Mahathir berhempas pulas untuk mendapat tempat dalam parti itu sebelum berjaya menjadi pemimpin nombor satu. Demikian juga dengan Pak Lah, beliau terpaksa diperap dan dijera lebih tiga tahun.

Najib tidak melalui jalan dan ranjau itu sulit dan penuh kerikil itu semua. Najib sebenarnya tidak pernah diuji baik

kesetiaan dan keberanian. Untuk mengatakan Najib seorang ahli politik, jujur, setia dan berani tidak boleh kerana beliau tidak diuji. Sedangkan ujian itu amat penting. Dalam Quran ada disebut; tidak dinamakan beriman seseorang itu selagi ia tidak diuji. Jika berpandu kepada ayat itu, jelas Najib belum boleh dikategorikan sebagai seorang ahli politik yang *rengam* (masak).

Memang benar Najib banyak pengaruh. Jika ditinjau pengaruh dan kekuatan yang ada kepada Najib bukan yang ampuh atau sejati. Beliau dilihat kuat kerana adanya unsur-unsur kontra – *give and take*. Ada tawaran-tawaran lain. Beliau dikeliling bagaikan seorang putera raja. Sifat feudal masih tebal di dalam otak dan kepala orang kita. Kekuatan atau pengaruh seperti itu tidak menggerunkan. Ia bukan satu pengaruh berasaskan fundamentalis. Cuba kalau Najib menghadapi masalah mereka tidak akan mengelilingi Najib seperti mana berlaku kepada Anwar.

Menyedari itu maka Pak Lah tidak perlu merasa gerun. Pengaruh peribadi Najib tidak boleh menandingi pengaruh peribadi Anwar di dalam Umno. Pak Lah tidak bimbang kepada Najib, sebab itulah beliau tidak mempedulikan kepada masa depan Najib. Pak Lah lebih pasti kena sekat ataupun setidak-tidaknya meredakan pengaruh dan sentimen Anwar di dalam Umno. Mungkin kerana membuat perkiraan begitulah maka beliau lebih cenderung untuk memberi sokongan kepada Muhyiddin.

Itulah alasan-alasan kenapa Pak Lah lebih mirip kepada Muhyiddin. Selain itu hubungan anta-isteri juga perlu diambil kira. Di kalangan mak datin dan puan seri tahu bagaimana hubungan Cik Endon dengan Cik Rosmah. Keduanya perempuan dan mempunyai keinginan dan kemahuan yang lebih. Baik Pak Lah maupun Najib tidak boleh mengenepikan

begitu sahaja pandangan ataupun naluri isteri masing-masing. Bukankah wanita penegak kerukunan rumah tangga? Nasfu perempuan lebih tinggi dari akal!

Satu aspek lagi kenapa Pak Lah berminat kepada Muhyiddin mungkin kerana Pak Lah dapat menilai bagaimana kerja Muhyiddin. Jika diukur di antara karismatik dan ilmu, Muhyiddin lebih menawan buat Pak Lah. Muhyiddin seorang menteri yang kerja kuat. Sebagai PM, Pak Lah tidak me merlukan seorang popular dan berpengaruh, tetapi beliau memerlukan seorang yang berkerja kuat dan senyap. Sifat ini ada kepada Muhyiddin. Jika keduanya PM dan TPM sama-sama mempunyai pengaruh ia akan menimbulkan masalah. Apa yang berlaku kepada Mahathir dan Anwar adalah contoh yang perlu diambil kira oleh Pak Lah. Pepatah Cina pula ada mengatakan tidak boleh ada dua ekor harimau di atas satu bukit.

Orang akan mengira pula bagi mana sikap atau pun penerimaan Najib jika beliau tidak dipilih oleh Pak Lah? Tindakan Najib mungkin berbeza dengan Muhyiddin. Muhyiddin tidak akan melakukan apa-apa kalau pun beliau tidak dilantik menjadi timbalan. Hari ini pun jika diperhatikan kepada Muhyiddin beliau semacam tidak kisah kalau dia tidak dipilih menjadi timbalan.

Apakah Najib akan bertindak? Ada orang mengatakan Najib tidak akan duduk diam. Najib tidak akan menjadi defensif seperti Muhyiddin. Jika Pak Lah tidak mengambilnya dia akan melakukan sesuatu. Seorang broker politik berseloroh, sekiranya Najib tidak dipilih, Pak Lah akan menghadapi musim gerhana. Akan berlaku undi tidak percaya kepada Pak Lah di MT Umno. Mudah buni teori broker politik itu. Kemungkinan undi tidak percaya kepada Pak Lah akan berlaku, katanya? Beliau seorang yang kuat menyokong

Najib.

Atas dasar sifatnya sebagai seorang *play save*, Najib tidak berbuat demikian. Walaupun pengaruhnya kuat, seperti dikatakan ia bukan pengaruh sejati. Orang bersama Najib adalah mereka yang menunggu umpan dan projek. Bukan kerana idealisme atau sahsyiah Najib. Berdasarkan itu Najib tidak akan berganjak. Lebih baik baginya menanti tahun 2004 di mana berlaku pemilihan beliau akan bertanding Timbalan Presiden Umno, memenuhi tempat yang dikosongkan Pak Lah.

Di kala ini akan berlaku pertandingan dengan Muhyiddin atau sesiapa sahaja yang bakal dilantik oleh Pak Lah menjadi timbalannya. Ada juga pendapat mengatakan kalau Pak Lah beriya benar dengan Muhyiddin, kemungkinan Najib akan *team-up* semula dengan Ku Li. Dalam perhimpunan tahun 2004 Ku Li akan bertanding lawan Presiden, manakala Najib akan merebut tempat timbalan? Bersediakah untuk Ku Li *team-up* dengan Najib sedangkan tahun 1987 dulu Najib sudah kencing anak raja Kelantan itu.

Gambaran kemungkinan ini akan berlaku sudah pun ada. Semasa Sultan Kelantan pergi makan nasi di rumah Mustapa Mohamed baru-baru ini, Najib ada sama. Yang hadir di rumah Mustapa itu nampaknya tidak berapa ramai orang Pak Lah. Ku Li pun ada sama. Apakah majlis itu sebagai tanda bahawa kemungkinan akan berlaku *team-up* di antara Ku Li dengan Najib? Majlis makan malam di rumah Mustapa itu perlu ditafsirkan oleh Pak Lah sebaik mungkin.

Kalau inilah berlaku ini bermakna, team bangsawan akan berjumpa dengan team anak ustaz di dalam Umno. Pak Lah dan Muhyiddin kedua-duanya anak ustaz manakala Ku Li dan Najib dari golongan bangsawan.

Lainlah kalau Najib masih terus penakut dan mendiamkan

UNDURKAH MAHATHIR?

diri, kemungkinan ini akan dapat dielakkan. Najib mengharap kepada kemenangan itu, sebab kemenangan itu nanti akan menjadikan hujah ataupun kuasa untuk beliau menuntut tempat di belakang Pak Lah.

Sekiranya Najib menang dalam merebut jawatan timbalan Presiden, Pak Lah terpaksa juga akur meskipun jauh di sudut hatinya tidak dapat menerima Najib. Orang seperti Pak Lah dilihat tidak akan bersedia untuk menyanggah arus di dalam Umno seperti mana Mahathir melantik Musa dan bukannya Ku Li pada tahun 1982. Segala kemungkinan berlakunya pergolakan itu boleh dihindarkan sekiranya Umno bersedia.

Kesimpulannya politik selepas pengunduran Mahathir penuh dengan variasi, penuh dengan tanda tanya dan penuh dengan suspen. Apakah senario itu akhirnya akan melemahkan Umno atau sebaliknya sama-sama kita melihat apakah ragam Umno selepas ini! - ©



MUHYIDDIN dikatakan menjadi orang pilihan Dollah Badawi untuk menjadi Timbalan Perdana Menteri. Betul ke? Kalau ya pun takkanlah Mahyuddin sampai galak (gembira) begitu sekali sampai angkat jempul! Kalau Najib tenguk lagak Muhyiddin ini tentu Najib cemburu. Muhyiddin pun jangan sedap sangat dengan spekulasi itu. Beliau kena hati-hati, nasib di dalam politik serba mungkin. Ia tidak sestabil berada di atas motosikal bertongkat. Maka dinasihatkan Muhyiddin berhati-hatilah sikit agar tidak terjatuh. Sebenarnya ramai yang sedang menanti untuk menyorak Muhyiddin jatuh terutamanya mereka yang baik dengan Rosmah bini Najib.



Mungkin Anwar sertai UMNO

5

PERISTIWA yang paling pahit yang bakal dihadapi oleh pendokong reformasi (Anwar) baik didalam Pas atau Parti Keadilan Nasional atau bagi mereka yang membenci Umno seratus peratus ialah apabila Anwar Ibrahim menyertai semula Umno. Kenyataan ini merupakan satu petaka besar dan seboleh-bolehnya ia tidak mahu didengari dan didoakan agar tidak menjadi kenyataan.

Terutamanya orang Pas yang sebelum ini pernah merasakan kegetiran di atas tindakan Anwar menyertai Umno tahun 1982, tidak dapat terima sama sekali pengembalian semula Anwar ke dalam Umno?

Cubalah bercakap kemungkinan itu di Taman Melewar, Gombak ataupun di kedai Jaafar Rawas di Kota Bharu. Kalau tidak ada yang menyanggah jangan panggil nama saya,

Sayuti. Orang Pas tidak dapat menerima hakikat itu. Bagi mereka untuk terjun ke dalam lubang yang sama buat kali kedua dalam kes Anwar ini tidak sanggup sama sekali. Khabar-khabar mengenai kemungkinan itu bagaikan sebilah pisau yang dihayun ke tengah gelap malam.

Beberapa orang yang diselorohkan dengan pertanyaan itu penuh emosional mengatakan dia akan meludah muka Anwar kalau Anwar menyertai Umno. "Saya akan meludah muka Anwar dan melawannya sampai ke bila-bila." Jawaban ini keluar dari mulut orang kuat Keadilan sendiri apabila diduga pendiriannya mengenai perkara itu.

Tetapi bolehkah mereka yang tidak mahu Anwar menyertai semula Umno menyekat mantan Timbalan Perdana Menteri itu? Apakah Anwar bersedia untuk akur kepada bantahan dan desakan para penyokongnya nanti? Di antara kuasa dan penyokong yang fanatik, mana satu yang harus Anwar tunduk? Sedangkan keduanya adalah saling kait berkaitan di antara satu sama lain. Anwar tidak akan memperolehi kuasa kalau beliau tidak ada penyokong. Naiknya seseorang itu ialah kerana penyokong.

Tetapi politik selalunya dimainkan secara rasional. Secara realiti dan bukannya secara pasif. Politik adalah kaedah ataupun teknik yang sentiasa hidup untuk mendapatkan kuasa. Keluar masuk parti adalah satu taktik dan strategi! Politik ialah mencari kekuasaan untuk membolehkan seseorang menjanakan segala idealisme yang ada di dalam kepalanya. Perjuangan seseorang itu tidak akan sampai ke kemuncak selagi ia tidak mendapat kuasa bagi melaksanakan apa yang dicita-citakan.

Selepas dibebaskan nanti Anwar tidak mungkin akan mendiamkan diri atau pun bersara. Beliau akan bangkit meneruskan perjuangan. Pejuang dan seorang orator seperti

beliau tidak tahu duduk diam. Untuk merealisasikan perjuangan kuasa diperlukan. Apabila dibebaskan nanti Anwar memerlukan kuasa. Beliau memerlukan kedudukan dan kuasa bagi membolehkan beliau meneruskan apa yang digagas sebelum ini. Cita-citanya memang banyak, hebat, global dan holistik khususnya mengenai Islam. Bagaimana untuk beliau merealisasikan itu kalau beliau tidak memiliki kuasa? Kuasa sepertilah kenderaan alat digunakan untuk bergerak!

Dalam politik demokrasi kuasa akan dicapai menerusi parti, organisasi. Untuk itu Anwar akan mencari organisasi yang kuat bagi membolehkan dia berkuasa. Dan realiti penganut politik Malaysia yang berbagai majmuk hari ini, hanya parti yang mengamalkan konsep pencampuran atau konsep *multi-race* sahaja yang akan mendapat dokongan semua bangsa. Parti yang berjuang bersendirian ataupun hanya memperjuangkan sesuatu kelompok tidak akan mendapat tempat dalam komuniti majmuk.

Berdasarkan kepada hakikat itu, maka Anwar tidak ada jalan lain untuk berkuasa melainkan menerusi parti yang mengamalkan amalan demikian. Dalam konteks hari ini parti terbesar yang mengamalkan konsep seperti itu ialah bekas partinya Umno. Anwar tidak ada pilihan lain sekiranya beliau gagal untuk menyuburkan Parti Keadilan. Beliau perlu membesarkan keanggotaan parti Keadilan sekiranya beliau mahu menjelma menjadi pemimpin tanpa menerusi Umno.

Sekiranya beliau gagal memajukan Parti Keadilan, beliau tidak ada pilihan, dia kena kembali kepada Umno semula. Mentaklikkan reformasi dan rujuk kepada Umno. Umnolah yang bakal membawa Anwar berkuasa semula. Kalau memang badan Anwar dipenuhi dengan tahi lalat bertuah atau urat telapak tangannya menyatakan dia menjadi orang

besar, hanya Umnolah yang akan meletakkan Anwar di atas tampuk kekuasaan itu, bukannya parti lain.

Parti Keadilan, PRM dan Pas tidak mampu untuk menolak Anwar naik ke atas. Sempadan dan garis-garis yang vartikal di dalam parti itu tidak mungkin dapat mengangkat Anwar naik ke atas. Manakala parti Keadilan pada masa ini masih kecil dan lemah untuk memikul perjuangan global Anwar. Walaupun Keadilan memperjuangkan *multi-race* tetapi ia mengambil masa untuk berkembang subur, sedangkan masa itu tidak terkejar oleh Anwar. Dalam usia menjangkau separuh abad lebih Anwar dikira sudah terlewat untuk membentuk sebuah organisasi baru. Sementara PRM berada dalam keadaan lebih kecil dan lemah berbanding Keadilan walaupun para pemimpinnya mempunyai teras dan prinsip yang tuntas.

Satu hakikat yang perlu disedari bahawa, seseorang hendak menjadi Perdana Menteri di negara ini mestilah mendapat dokongan daripada semua bangsa. Kehadiran bangsa asing dinegara ini tidak boleh diketepikan begitu saja. Mereka tetap menjadi pengukur ataupun kuasa penentu kepada mana-mana pihak yang mempunyai ambisi untuk berkuasa.

Konsep bekerjasama yang diasaskan oleh Tunku Abdul Rahman sudah menjadi piagam politik yang canggih dan mantap. Piagam itu tidak mungkin dapat dirombak atau ditukar dengan piagam lain sekurang-kurang untuk satu abad akan datang. Piagam itu sudah dijadikan kunci atau pun aqidah perpaduan kepada rakyat negara ini. Bahkan diterima oleh peringkat antarabangsa.

Menyedari hakikat itulah maka Pas yang sebelum ini dilihat kurang memberi pandangan kepada kewujudan bangsa asing tetapi sejak dua dekad ini telah melakukan pendekatan baru, berbaik-baik dengan bangsa asing. Dulu agak mustahil untuk

melihat Haji Abdul Hadi atau Nik Aziz duduk berdekatan dengan Lim Kit Siang ataupun Karpal Singh tetapi hari ini bukan sahaja berdekatan tetapi Hadi sudah berpelukan dengan Lim Kit Siang. Majlis dialog dengan masyarakat Cina juga kerap diadakan. Lebih ironis lagi pemimpin Pas di zaman sebelum Asri secara terang-terangan menolak kerjasama dengan puak bukan Islam atas alasan mereka kafir.

Kalau Pas menyedari akan realiti itu apa lagi Anwar yang mempunyai pandangan dan politik lebih terbuka dan rasional daripada pemimpin Pas amatlah memahaminya. Sewaktu menjawat jawatan TPM dahulu Anwar pernah menegaskan di Singapura bahawa Melayu tidak mungkin berkuasa tanpa kerjasama dengan bangsa Cina. Anwar cukup arif dan menyedari akan realiti itu. Mungkin sebab itulah beliau memilih Umno berbanding Pas meskipun jiwanya jauh lebih lama berada di dalam Pas.

Bagaimana kalau Anwar benar menyertai Umno? Dan apakah Anwar sanggup kembali semula kepada parti yang menyingkirkannya itu? Inilah dua persoalan yang perlu dikupas dan perlu diperhatikan oleh umum khususnya para pendokong Anwar. Mungkin terlalu awal untuk membuat spekulasi mengenai perkara ini, dan ianya suatu subjek yang kurang disenangi buat masa ini tetapi ia bukan satu mauduk yang boleh dikesampingkan ataupun tidak munasabah. Perbincangan awal mengenai kemungkinan itu juga perlu bagi mengelakkan timbul ketegangan dan kontroversi di hari kemudian.

Bagi mereka yang celik politik dan amat arif mengenai sepak terang politik tidak akan merasa pelik kalau Anwar kembali semula kepada Umno. Malahan tindakan Anwar itu adalah sebaik-baik tindakan. Tempat Anwar untuk menabur khidmat dan bakti kepada negara ini ialah menerusi Umno.

Islam Anwar yang lebih progresif dan liberal sifatnya amat serasi dengan Islam Umno dan bukannya Islam Pas.

Satu perkara yang perlu diketahui Umno tidak pernah bermusuh dengan Anwar. Begitu juga Anwar dengan Umno. Hanya beberapa kerat pemimpin yang sudah semakin tidak laku sahaja bermusuh dengan Anwar. Mereka yang bergelar konspirator sahaja yang alergik dengan Anwar. Orang-orang itulah yang mempengaruhi Mahathir agar menyingkirkan Anwar. Mereka ini berbuat begitu kerana ada agenda tersendiri.

Berdasarkan situasi itu Anwar tidak ada halangan untuk menyertai Umno. Dalam perkara ini pendokong Anwar harus waras dan berpijak di bumi nyata. Mereka harus mengetahui segala hukum hakam dalam politik.

Saya cukup optimis selepas Mahathir memberi lambaiannya akhir kepada Umno suasana di dalam parti itu akan berubah. Pandangan dan tanggapan orang-orang Umno kepada Anwar sebelum ini juga berubah. Mereka yang sebelum ini menjadi bisu disebabkan takut atau kerana tidak mahu menghadapi tekanan Mahathir akan bangkit bersuara. Mereka akan mengeluarkan isi hati mereka selama ini terhadap apa yang berlaku.

Banyak ahli Umno yang mengizinkan dalam paksa menerima penjelasan buruk mengenai Anwar. Mereka tidak berani untuk membantah meskipun mereka mempunyai bukti-bukti yang jelas mengenai kepalsuan tuduhan ke atas Anwar. Ahli Umno lebih memikirkan soal dirinya daripada soal perjuangan untuk bangsa, agama dan tanah air. Bahana yang berlaku ke atas orang yang engkar kepada Mahathir sangat menghantui hidup ahli Umno.

Sebenarnya tidak sukar bagi Anwar untuk bertapak semula di dalam Umno. Harus ingat saki baki pengaruhnya masih

ada. Cuma bagai manakah cetusan yang akan berlaku untuk membawa balik Anwar ke dalam Umno? Sebenarnya cetusan ia tidak sulit. Sikap pemimpin Umno akan berubah dengan tiba-tiba apabila Mahathir sudah tidak ada. Ketika inilah nanti akan ada suara-suara dari mereka yang menyayangi Anwar akan mempelawa Anwar menyertai Umno. Mereka akan berusaha untuk membawa balik Anwar ke dalam Umno. Mereka sangat memerlukan segala kepandaian, kehebatan serta ketokohan yang ada kepada Anwar. Kemampuan dan kredibiliti Pak Lah selaku Pemangku Perdana Menteri juga akan dijadikan alasan kenapa Anwar perlu dibawa semula.

Seperti dikatakan tadi jalan untuk Anwar kembali ke dalam Umno, tidak payah dan terlalu sulit. Tetapi apa yang harus didepani Anwar ialah risiko ataupun kesan selepas tindakan beliau itu. Seperti diawal saya katakan tadi, orang tidak dapat menerima tindakan Anwar itu. Terutama orang-orang Pas dan reformasi. Mereka akan marah. Mereka akan kecewa dan merasakan tertipu. Mereka tertipu bukan oleh Anwar tetapi oleh impian mereka sendiri dengan congakan politik mereka yang terlalu obses.

Kalau bayangan buruk ini berlaku dan menjadi kenyataan, sekali lagi orang-orang Pas akan melakukan penentangan ke atas Anwar. Anwar akan dicemuh dan dimaki hamun. Peristiwa tahun 1982 dahulu akan berulang semula. Tentangan yang nampak hari ini bukan sahaja dari kalangan Pas tetapi daripada mereka yang ikhlas dan tulus membela Anwar. Yang membenci kepada Umno di atas apa yang dialami Anwar. Penentangan kali ini secara terbuka dan lebih hebat dari dahulu.

PRM yang sebelum ini kelihatan begitu intim, setia dan ikhlas membela Anwar akan turut sama mengenepikan diri daripada bersama Anwar. Berlainan dengan DAP, walaupun

mereka tidak dapat menerima, namun kerana mereka memahami peraturan politik mereka terpaksa akur dengan tindakan demikian. DAP akan menyuluh langkah Anwar itu demi mengukuhkan bangsanya.

Implikasi ini yang harus difikir semasak-masak oleh Anwar. Beliau harus meletakkan perasaan orang-orang ini lebih penting daripada nalurinya dan agenda peribadi kawan-kawannya yang mahu melihat beliau menjadi Perdana Menteri. Sekiranya Anwar terbuka hati dan masih mempercayai sistem politik sekular Umno, elok kalau beliau mendapat nasihat daripada para penyokongnya terlebih dahulu. *Reforandum* – pungutan suara untuk menentukan perkara itu di kalangan parti alternatif dan reformasi mungkin perlu diadakan.

Sekiranya Anwar menyertai Umno tanpa mengambil kira pandangan dari pelbagai sumber dan puak menyebabkan beliau akan dipulau. Anwar harus ingat mereka yang menyokong reformasi anjurannya adalah terdiri daripada mereka yang ikhlas dan setia. Mereka ini tidak oportunist seperti beberapa kerat bekas pemimpin Umno yang pernah menjadi sahabatnya sebelum ini. Mereka benar-benar ikhlas memperjuangkan nasib Anwar serta idealisme. Mereka tidak pernah mengharap apa-apa ganjaran ataupun balasan. Pada mereka apabila Anwar bebas itulah kemenangannya bagi mereka.

Persoalannya bergantung kepada Anwar. Sekiranya beliau meletakkan kepentingan dirinya untuk menjadi pemimpin dia akan bersedia menanggung segala risiko itu. Sebaliknya kalau beliau berpegang kepada prinsip dan ingin menjaga hati mereka yang berdemonstrasi deminya, kepada Pas yang membela keaibannya, kepada PRM yang ikhlas berdiri mempertahankan perjuangan kemanusiaannya, Anwar

mungkin tidak mudah untuk kembali semula kepada Umno.

Beliau mungkin sahaja akan memperkasakan Barisan Alternatif untuk menentang Umno yang berselindung di sebalik Barisan Nasional. Itulah yang diyakini sehingga hari ini. Namun dalam pada itu kita tidak menolak kemungkinan itu dengan berpegang kepada *politic is the possible games*. Dalam planet politik apa-apa sahaja boleh terjadi. Cuma kita harapkan apa-apa yang bakal terjadi nanti jangan tersasau jauh dari moral dan peradaban manusia. Sama ada hendak menyertai Umno ataupun tidak, itulah dilema yang akan dihadapi oleh Anwar.

Persoalan itu bukan sesuatu yang positif ketika ini namun setidak-tidaknya kemungkinan ini boleh difikir oleh Anwar demi menyegarkan akal politiknya dan menyuburkan harapannya untuk terus berperanan dalam persada politik negara.- ©



ADA usaha golongan tertentu untuk membebaskan Anwar. Mereka juga berusaha untuk membawa balik Anwar ke dalam Umno. Kononnya Anwar tidak akan boleh menjadi PM menerusi parti lain selain Umno. Sebenarnya golongan ini orang yang lemah semangat dan tidak yakin dengan perjuangan mereka sendiri. Golongan ini tidak meletakkan asas yang kuat dalam perjuangannya. Perjuangan untuk merebut pangkat ataupun kedudukan adalah perjuangan kobendaan. Bagi mereka yang inginkan benda sepatutnya mereka menukar haluan hidup (politik) balik kampung menanam sayur ataupun menternak ayam itik. Sandainya Anwar bebas dan beliau disuakan agenda untuk pulang ke dalam Umno, Anwar harus berfikir banyak kali. Tidak mustahil agenda itu akan diserahkan kepadanya sebaik beliau bebas. Pun begitu kita tetap yakin Anwar tidak mudah terpedaya dengan segala tawaran-tawaran berbentuk duniawi begitu.



BA selepas ketiadaan Mahathir

6

PENGUNDURAN Dr Mahathir pada Oktober akan datang turut sama menggembirakan pihak pembangkang, Barisan Alternatif (BA). BA merasakan dengan tiadanya Mahathir hasrat mereka untuk menawan Malaysia menjadi lebih mudah. Sebelum ini tanpa mengakui secara terbuka pembangkang sulit untuk meluaskan pengaruhnya. Kebijaksanaan Mahathir serta kepimpinannya yang berkesan menjadi usaha pembangkang tidak mendapat perhatian rakyat. Kejayaan demi kejayaan yang diraihkan oleh Mahathir menyebabkan rakyat melihat pembangkang semakin kecil dan tidak berkupayaan.

Apa yang dilalui atau menimpa *Democrat Action Party* (DAP) satu bukti yang sangat jelas. Satu masa dulu DAP

menjadi sebuah parti pembangkang terhebat dan disegani di negara ini. Parti itu juga berpotensi untuk merampas Pulau Pinang. Tetapi disebabkan keunggulan Dr Mahathir mengemudikan Barisan Nasional kecemerlangan DAP kian tahun kian merosot. Dalam pilihan raya ke lapan (1990) DAP masih lagi dapat mempertahankan pengaruhnya, namun dalam pilihanraya ke sembilan (1995) pengaruhnya terus menirus.

Pilihan raya ke 10 (1999) menjadi kemuncak kepada kejatuhan DAP. Parti *chauvinist* Cina itu bukan sahaja gagal dengan projek 3Pnya - untuk menawan Pulau Pinang tapi lebih sedih lagi mereka juga kehilangan jaguh-jaguh mereka di parliment apabila Pengerusinya Lim Kit Siang dan Naib Pengerusinya Karpal Singh tewas. Ekoran kekalahan itu menyebabkan peranan ketua pembangkang yang dipegang DAP selama ini bertukar kepada Pas (Melayu).

Harapan pembangkang untuk menawan Malaysia mula membenihkan semula apabila melihat pengaruh dan kekuatan Mahathir semakin menurun sejak kebelakangan ini. Mahathir mula menghadapi kekurangan pengaruh sejak meletusnya reformasi yang digerakkan oleh Anwar Ibrahim. Pergaduhan Mahathir dengan Anwar menjadikan pengaruh Mahathir mengecil dan beliau dicemuh rakyat. Semacam berlalu anti klimeks di dalam pemerintahan Mahathir.

Selain itu kemerosotan pengaruh Mahathir disebabkan usianya sudah lanjut disamping telulu lama berkuasa. Orang tidak dapat menerima seorang pemimpin yang begitu lama berada ditampuk kekuasaan. Mahathir sudah menjadi Perdana Menteri 22 tahun. Rekod ini mengatasi perdana menteri sebelum ini. Bukan saja Mahathir sesiapa pun kalau

sudah terlalu lama akhirnya akan dicemuh. Nasi kalau lama di atas dapur pun akan hangit. Sesuatu yang sedap dan mengasyikkan kalau terlalu lama sangat akhirnya cemuh juga. Begitulah dengan Mahathir rakyat akan merasa muak dan mereka mahu mencuba sentuhan pemimpin baru pula.

Perkembangan ini menyebabkan pembangkang merasakan lawan atau batu penghalang (*handicap*) kepada usaha mereka sudah tiada apabila Mahathir berhenti dengan rasminya pada Oktober ini. Keadaan ini memudahkan pembangkang untuk memberi pukulan kepada Barisan Nasional (BN). Dengan perginya Mahathir, pihak BA merasakan mereka mendapat sinar baru dalam perjuangan mereka!

Pas adalah pembangkang yang memasang cita-cita tinggi untuk menawan Malaysia. Bagi PAS selepas ketiadaan Mahathir, kerja mereka menjadi mudah. Pada perkiraan Pas peneraju BN atau Umno selepas ini tidak memiliki kebijaksanaan dan ilmu politik selicik Mahathir. Pas dan pembangkang juga melihat peluang mereka itu sangat cerah sekiranya Anwar tetap membaikot Umno atau berada bersama mereka.

Sejauh manakah benarnya? Atau Pas beretorik ataupun berperasaan mengenai perkara ini. Entah-entah selepas ketiadaan Mahathir Umno dan BN menjadi makin kuat. Sesuatu yang mungkin dilupai Pas mereka sudah ketiadaan pemimpin *versatile*, Fadzil Noor. Sekiranya teori yang mengatakan kemerosotan undi BN dalam pilihan raya lalu ialah disebabkan Mahathir satu kebenaran, ini bermakna selepas ketiadaan Mahathir Umno akan menjadi pulih. Pergolakan ataupun isu yang meletus di dalam parti itu

disebabkan Mahathir akan selesai bila Mahathir tidak lagi menguasai Umno. Bukanakah pemulihian itu menyebabkan Pas dan pembangkang sukar untuk menggugat BN? Dan sesuatu yang mungkin dilupai Pas bahawa mereka sudah ketiadaan pemimpin *versatile*, Datuk Fadzil Mohd Noor. Tidak siapa dapat menolak kemajuan Pas diawal alaf baru ini adalah sedikit sebanyak hasil kreatif dan prihatin kepimpinan ulamak moden Almarhum Fadzil Noor.

Bekas Menteri Pembangunan Luar Bandar Datuk Annuar Musa menyakini nasib buruk yang diterima Umno dalam pilihan raya lepas ialah disebabkan Mahathir. Menurut pendapatnya kekalahan Umno itu disebabkan Dr Mahathir. Katanya sekiranya Umno mahu menang Mahathir hendaklah berundur. Rupanya Annuar Musa dapat mencari dimanakah puncanya menyebabkan undi Umno merosot.

Cuma sayang pandangan ikhlas Annuar itu tidak boleh diterima Mahathir. Merah padam muka Mahathir apabila mendengar pendapat Annuar itu. Natijah daripada itu Annuar tidak diberi apa-apa jawatan selepas kalah dalam pilihan raya. Mahathir terkeduh hati dan terkilan dengan pandangan ikhlas Annuar Musa.

Kejadian ini berlaku semasa Mahathir memanggil beberapa pemimpin tertinggi Umno ke rumahnya untuk membuat *post mortem* mengenai kekalahan BN dan Umno. Dalam pertemuan itu Mahathir meminta pandangan pemimpin Umno mengenai kekalahan parti itu. Kata Mahathir; "kita mesti buat sesuatu kalau mahu tegok Umno terus berkuasa. Kalau tidak inilah kali terakhir Umno akan menjadi kerajaan." Dengan beranggapan Mahathir ikhlas meminta pendapat, maka itulah Annuar tanpa prejudis dan memberi

pendapatnya itu.

Jikalau pandangan bekas timbalan ketua Umno Kelantan itu relevan ini bermakna Umno akan menjadi kuat semula apabila ianya tidak akan dipimpin oleh Mahathir. Tetapi perlu diingatkan juga ada dikalangan Umno sendiri membuat pandangan berlainan. Menurutnya sekiranya Umno tidak dipimpin oleh orang setanding Mahathir, kemungkinan parti itu akan lemah dan hancur. Menurut pemimpin itu Umno dalam keadaan sukar mendapat pemimpin setanding Mahathir. Mereka tidak terfikir Pak Lah mampu menggerakkan semangat Umno menjadi sekuat sebelum 3 September.

Dalam hal ini mereka melihat bekas TPM Datuk Seri Anwar Ibrahim dilihat sebagai pengganti yang sesuai. Sekiranya Umno tidak mengundang Anwar Ibrahim semula ke dalam Umno, ianya boleh menyebabkan parti itu menjadi senasib seperti parti LDP di Jepun, Kongres di India ataupun Golkar di Indonesia. Dimana parti berkenaan merupakan parti pemerintah unggul di negara-negara berkenaan tetapi akhirnya satu persatu hancur dan lebur. Umno juga berada dalam period yang sama menunggu giliran untuk hancur.

Pas bercita-cita sejak lama dahulu untuk menujuhkan kerajaan. Cita-cita itu menjadi berkobar-kobar apabila berjaya merampas balik Kelantan pada tahun 1990. Semangat ini menjadi meluas apabila berjaya pula merampas Terengganu dan memenangi beberapa kerusi di Pahang, Selangor, Perlis, dan Perak. PAS juga hampir-hampir menawan Kedah dalam pilihan raya 1999. Kejayaan cemerlang Pas didalam pilihan raya lepas meletakkan parti itu menjadi penting. Pas kini dilihat sebagai sebuah parti alternatif kepada BN.

Penyingkiran Anwar Ibrahim secara tidak langsung

memberi satu kelabaan di atas angin kepada Pas. Tindakan Mahathir ke atas Anwar menyebabkan rakyat negara ini terutamanya dari golongan menengah (teknokrat, birokrat dan korporat) hilang keyakinan kepada Umno. Mereka juga rasa begitu terkilan dengan apa yang berlaku ke atas Anwar. Fenomena itu memberi keuntungan kepada PAS apabila ramai pendokong dan rakan baik Anwar telah menyertai Pas. Mereka di antaranya seperti Kamaruddin Jaafar, Hassan Ali, Ismail Kamus dan lain-lain.

Walaupun setengah mereka merupakan simpatis dengan perjuangan Pas, tetapi sebelum ini mereka hanya berada dipinggiran. Sebaliknya bila berlaku tragedi penyingkiran Anwar mereka terus aktif dalam parti, sama ada menyertai Keadilan maupun Pas. Penyertaan mereka baik menerusi Pas maupun Keadilan dilihat sebagai satu tindakan protes kepada Mahathir.

Perkembangan itu sangat menggembirakan Pas. Ramai golongan profesional seperti *lawyer*, akitek, jurutera, doktor menyertai Pas. Kalau dahulu mereka ragu-ragu untuk menyertai Pas kerana Pas dilihat sebagai parti kampungan tetapi kini mereka secara terang-terangan memberi sokongan. Setengahnya menjadi ahli Pas seumur hidup. Lebih mengejutkan lagi sudah ada di antara mereka mula mendapat tempat di dalam jawatan-jawatan penting termasuk jawatankuasa agung. Tokoh-tokoh seperti Dr Hassan Ali, Kamaruddin Jaafar, Dr Wahab Ismai, Datuk Hishamuddin Yahya adalah muka-muka baru dalam Pas. Tindakan ini menyebabkan Umno terpukul. Dalam pada itu juga Umno tidak boleh lagi memandang remeh dan melihat Pas sebagai parti kampungan yang dipimpin oleh guru-guru SAR seperti

dahulu.

Perkembangan itulah menjadikan Pas bertambah yakin. Apa lagi kerjasama Pas dengan parti Keadilan, PRM dan DAP ianya benar-benar mencabar BN. Pas menerusi BA (Barisan Alternatif) bisa muncul menjadi parti alternatif kepada BN yang berkeupayaan membentuk kerajaan pada masa akan datang.

Tidak salah kalau dikatakan kejayaan Pas di dalam pilihan raya lepas adalah kemuncak kepada kejayaan parti berkenaan dalam tempoh 42 tahun. Walaupun pada tahun 1969 Pas berjaya menawan Kelantan dan Terengganu serta menang beberapa kerusi di Kedah dan Perak beberapa tahun kemudian, namun kejayaan tahun 1999 adalah lebih besar.

Jika diukur kepada jumlah kerusi di mana PAS memperolehi 27 kerusi Parlimen dan 93 kerusi Dewan Undangan Negeri. Apa yang paling menarik ialah apabila Pas mula mendapat kerusi di Selangor dan Pahang yang sebelum ini tidak terjangkau oleh Pas. Keupayaan calon Pas di Pekan yang hampir-hampir menewaskan Naib Presiden Umno paling popular dewasa ini Najib Razak sesuatu yang cukup membanggakan.

Tidak dapat dinafikan kejayaan Pas itu dilihat hasil kerjasama dengan Barisan Alternatif. Seandaianya Pas bersendirian kejayaan itu mustahil dicapai oleh Pas. Apa yang membantu kemenangan Pas ialah disebabkan isu Anwar. Isu Anwar telah memberi kelebihan kepada Pas dan Alternatif untuk menggugat BN. Hal ini tidak dinafikan. Umno sendiri menerima perkara ini, bahawa isu mengenai Anwar menyebabkan mereka kehilangan banyak kerusi. Mahathir menyifatkan pembangkang telah memperalatkan poster si

mata lebam.

Kemenangan itu dilihat oleh umum sebagai landasan kepada Pas khasnya untuk mengorak langkah lebih jauh dalam mengejar cita-cita jihadnya. Pencapaian tahun 1999 adalah cukup baik dan memberangsangkan. Kemenangan itu menjadikan Pas mendabik dada mengakui bahawa mereka boleh menjadi parti alternatif kepada orang Melayu. Kemenangan itu menjadikan Pas merasakan mereka berkeupayaan untuk membentuk kerajaan pada suatu hari nanti.

Bagaimanakah pula dengan pilihan raya umum akan datang ini? Apakah Pas dapat mengekalkan prestasinya atau tidak? Ataupun akan berlaku *up-set* yang mengejutkan kepada Pas dan BA dalam pilihan raya ke 11 ini?

Dengan perkembangan politik dalaman Umno yang masih belum menentu, adalah terlalu tipikal untuk membuat analisis mengenai sejauh manakah kemampuan pembangkang khasnya Pas pada pilihan raya akan datang. Keputusan ataupun pencapaian pilihan raya lalu tidak boleh dibuat perbandingan yang tepat. Apa yang harus diketahui *mood* atau semangat sewaktu pilihan raya lalu cukup baik. Rakyat pada waktu itu benar-benar mahu merubah keadaan. Isu Anwar Ibrahim menjadikan rakyat seperti hilang akal untuk melakukan sesuatu pengajaran kepada BN.

Adalah satu kesilapan kalau Pas menjadikan pencapaian lalu sebagai ukuran tepat untuk melihat kejayaan pada masa akan datang. Apa yang berlaku pada pilihan raya 1999 belum tentu berulang pada pilihan raya ke 11 (2004). *Mood* tahun 1999 belum tentu dapat dibawa ke tahun 2004. Orang Melayu pula terkenal dan dikenali sebagai bangsa yang mudah

berubah *mood* dan lemah semangat.

Hakikat yang tidak dapat ditolak sambutan rakyat kepada pilihan raya lalu sangat hebat. Gerakan reformasi yang meletus menjelang pilihan raya telah membantu menghangatkan suhu pilihan raya. Kebetulan pula semangat itu bertompok kepada pembangkang disebabkan masalah yang berlaku dalam Umno. Kehebatan atau pun penyertaan rakyat dalam pilihan raya 1999 tidak pernah terjadi dalam pilihan raya sebelum ini.

Cuma apa yang dapat dikatakan, sekiranya *mood* dan semangat pilihan raya 1999 dapat dikekalkan tidak mustahil pembangkang khasnya Pas dapat mengekalkan kerusi-kerusi yang dimenangi hari ini. Kalau dalam pilihan raya akan datang Pas dapat mengekalkan Kelantan dan Terengganu serta mengekalkan beberapa kerusi di Kedah, Pahang dan Selangor ia sudah dianggap sebagai satu kejayaan besar.

Umno lekas bangkit memperbetulkan keadaan. Sebagai parti yang unggul dan lama Umno berpengalaman dalam hal ini bagaimana untuk memperbetulkan persepsi rakyat. Inilah kelebihan Umno, dengan kemudahan (jentera kerajaan) yang ada mereka terus bertindak. Contoh apa yang berlaku di Selangor. Umno Selangor sebenarnya cukup bimbang dengan pengaruh Pas. Justeru mereka terus menggayang pengaruh Pas.

Semua pemimpin pembangkang dilarang menggunakan surau atau masjid di negeri itu. Pemimpin Pas, Haji Hadi, Nik Aziz dan sesiapa dilarang 'naik' ke masjid di Selangor. Surau ataupun markas yang menjadi pusat aktiviti Pas diroboh dan dihalang. Apa yang berlaku di Bangi baru-baru ini adalah salah satu contoh keberanian Umno Selangor

bertindak untuk melemahkan Pas. Cara Umno bertindak membendung pengaruh Pas begitu berani, keras dan tegas. Ada kalanya sesetengah tindakan MB Mohd Khir Toyo seperti Toyol!

Lantaran itu saya masih belum berani untuk meramalkan Pas akan memerintah Malaysia dalam waktu terdekat ini. Tanpa melihat kepada realiti dan budaya-tradisi politik Malaysia tidak relevan jikalau parti itu memasang angan-angan untuk memerintah Malaysia. Di dalam hal ini Pas harus melihat kepada realiti dan hakikat politik di Malaysia. Pas tidak akan berjaya untuk menawan Malaysia secara bersendirian tanpa ada kerja sama dengan lain-lain parti istimewanya yang mempunyai pelbagai bangsa.

Tidak salah kalau Pas berangan untuk menakluki Malaysia. Tetapi ia haruslah melihat kepada alam sekeliling. Kata orang Pas harus mengukur badan sendiri untuk membeli baju. Pas harus memperhebatkan usaha ke arah itu. Sesuatu perkara penting ialah dengan menakluki sebuah demi sebuah negeri. Atau Pas boleh bentuk zon-zonnya tersendiri seperti zon Timur, zon Selatan, zon Tengah dan zon Timur jauh.

Untuk permulaan Pas cuba menakluki negeri di dalam zon Uatra dan Timur. Negeri dalam zon utara seperti Kedah, Perlis dan Perak. Zon Tengah, Selangor, Negeri Sembilan, dan sebahagian Perak. Dan zon Selatan, Johor dan Melaka. zon Timur jauh, Sarawak dan Sabah.

Apa yang wajar dilakukan Pas hari ini ialah dengan memberi tumpuan kepada negeri-negeri yang majoritinya orang Melayu, seperti Kelantan, Terengganu, Kedah, Perlis dan Pahang. Buat masa ini Pas tidak perlu gelojoh cuba untuk menawan Malaysia dalam satu masa.

Kita bukan menghalang Pas untuk memerintah Malaysia. Tetapi apa yang rasional dilakukan Pas ialah berkongsi kuasa dan tidak boleh berangan-angan sendirian. Pakatan menerusi BA masih belum kuat dan semantap BN. Sekiranya para pemimpin BA khasnya PAS ingin mengecapi kedudukan sebagai menteri Pas tidak ada pilihan lain melainkan bergabung dengan Umno seperti mana terwujud tahun 1972 membentuk kerajaan campuran. Untuk tujuan ini Pas boleh kosentrek di negeri-negeri yang majoriti Melayu. Jika Pas menang di negeri berkenaan, Pas boleh bertarik tali (*demand*) dengan Umno. Waktu itu Umno terpaksa akur dengan kehendak Pas. Dan ketika inilah PAS boleh membentuk kerajaan bersama dengan Umno.

Cara ini juga boleh menjimatkan masa, tenaga dan kewangan. Tenaga, masa dan wang yang ditumpukan di negeri-negeri Sabah, Sarawak itu boleh digunakan untuk negeri-negeri Melayu. Sebaliknya fardu kifayah untuk berdakwah boleh diteruskan. Tetapi jangan meletakkan angan-angan untuk mendapat kerusi di negeri berkenaan.

Dewasa ini pengaruh Pas atau BA di Sabah dan Sarawak masih lemah. Walaupun Pas cuba menaburkan benihnya namun tanah negeri di bawah bayu dan negeri bumi Kenyalang itu terlalu gersang untuk Pas. Pas memerlukan masa 30 tahun lagi untuk menguasai beberapa kerusi di kedua negeri berkenaan. Apa yang Pas harus lakukan hari ini ialah 'meoksidakan' tanah di kedua buah negeri tersebut bagi menyesuaikan dengan biji benih Pas.

Selalunya wap ataupun iklim politik di negeri Sabah dan Sarawak akan mengikut apa yang berlaku di Semenanjung. Justeru Pas harus menakluki beberapa negeri di

Semenanjung terlebih dahulu sebagai umpan atau daya tarikan kepada rakyat di kedua negeri berkenaan. Kita yakin kalau Pas dapat menawan Kedah, Pahang, Perlis serta mengekalkan Kelantan dan Terengganu, akhirnya Pas tidak mustahil akan dapat menawan Sabah dan Sarawak.


Di dalam pilihan raya umum akan datang PAS harus berkerja keras untuk menawan negeri-negeri berkenaan di samping mengekalkan kekuasaan di Kelantan dan Terengganu.

Kejayaan mengekalkan prestasi baik di negeri-negeri berkenaan serta kejayaan mengekalkan Kelantan dan Terengganu akan menjadi petunjuk kepada Pas ke arah menggapai cita-cita mereka untuk memerintah Malaysia pada masa akan datang. Sesuatu yang dibimbangkan di dalam pilihan raya kelak Pas hanya mampu mempertahankan Kelantan sebaliknya gagal mengekalkan Terengganu serta beberapa kerusi yang dimenangi di negeri-negeri lain.

Perkara itu tidak mustahil berlaku jika Pas meletakan harapan yang tinggi dengan berpandukan kepada pencapaian dalam pilihanraya tahun 1999 lalu dan merasakan mereka berada dalam selesa.. Sesuatu yang pasti dan perlu disedari kemerosotan undi BN/Umno itu menjadikan parti itu bingkas untuk memperkasakan semula kedudukannya. Demi itu Umno akan melakukan apa saja dan tindakan ini tentulah menyulitkan Pas atau BA. - ©



KEMENANGAN Pas di Terengganu dalam pilihan raya 1999 adalah hasil usaha dan azam kuat Pas untuk berkuasa di negeri penyatu. Gelombang reformasi telah membantu kemenangan di Terengganu. Kekalahan UMNO di Terengganu menyebabkan Umno menangis tidak berlagu. Bekas MBnya membawa hati nun jauh di Arab Saudi. Kekalahan itu benar-benar menyakitkan Umno. Hari ini Umno Terengganu seperti keadaan harimau yang terluka. Umno akan melakukan apa saja untuk menawan Terengganu. Salah satu agenda tersusun Umno ialah memburukkan imej Haji Hadi sebagai ustaz. Penarikan balik royalti minyak merupakan 'peluru berpandu' Umno untuk menghancurkan kerajaan Pas Kelantan. Mampukah Haji Hadi, Mustapa Ali dan rakan-rakan mempertahankan Terengganu?



KAMARUDDIN JAAFAR adalah kroni akrab Anwar Ibrahim. Beliau menyertai Pas apabila Anwar dipecat dari Umno. Sebaik memasuki Pas Kamaruddin terus mendapat tempat tanpa banyak lobi atau berkempen. Pemilihannya berdasarkan kepada personaliti dan syaksiahnya yang bersih. Beliau kini adalah salah seorang ahli jawatankuasa agung Pas. Dalam pilihanraya lalu beliau diberi kepercayaan bertanding di kawasan parlimen Tumpat. Kehadiran Kamaruddin di dalam Pas memberi semangat kepada rakyat serta membantu mengubah Pas menjadi sebuah parti yang lebih profesional. Pun begitu sesuatu yang perlu dilingatkan kepada golongan profesional dan muka baru di dalam Pas mereka jangan mudah lupa asal usul perjuangan Pas. Uslub atau teknik perjuangan boleh dilubah mengikut kesesuaian masa namun harus dilingat 'keasliannya' itulah kelsttimewaan dan bezaanya Pas dengan Umno.



Dilema Pak Lah Satukan Melayu

7

BAGI mereka yang mengamalkan pendekatan politik sederhana dan cenderung kepada siasah Islam akan memberi sokongan bulat kepada Abdullah Ahmad Badawi menjadi Perdana Menteri. Jika diambil kira kepada semangat perjuangan Umno, Pak Lah adalah pemimpin sangat cocok selepas ketiadaan Mahathir. Kekosongan yang bakal ditinggalkan Mahathir sangat relevan diisi oleh Pak Lah apabila calon *favourite* untuk menggantikan Mahathir masih dalam kurungan.

Memang benar jika diukur dari segi *talent* ataupun kredibiliti sebagai Perdana Menteri Pak Lah tidak terlawan dengan Mahathir. Beza di antara mereka seperti *flat* dengan kondominium! Malahan jika dibandingkan dengan tiga Perdana Menteri sebelum ini Pak Lah masih duduk ditangga

bawah.

Tetapi ada sesuatu yang istimewa kepada Pak Lah yang tidak ada kepada bekas PM dahulu dan juga yang PM sedang menjadi PM sekarang ini. Keistimewaan itu ialah mengenai personaliti Pak Lah sebagai orang Melayu dan penganut Islam. Walaupun Pak Lah tidak dipanggil ustaz seperti kebanyakan pemimpin Pas, namun beliau menampakkan imejnya sebagai seorang Islam. Latar belakang hidup keluarganya serta martabat dan *maqam* datuknya sebagai ulamak terkenal mempengaruhi persekitaran Pak Lah. Tentang kehebatan dan kealiman datuk Pak Lah tidak perlu dinukilkan, semua orang mengenalinya.

Keistimewaan ini boleh digunakan oleh Pak Lah untuk menandingi PM sebelum ini. Pak Lah boleh menjadikan imej Islamnya itu sebagai aset untuk memimpin Malaysia selepas ini. Dan adalah lebih baik kalau aset itu bukan sahaja digunakan untuk menobatkan dirinya sebagai PM tetapi turut sama mengamalkan ilmu serta amalan agama orang tuanya ke dalam pentadbirannya nanti.

Mungkin disebabkan imej tersebutlah menyebabkan orang bersorak girang apabila Dr Mahathir mengumumkan hendak berundur pada 22 Jun 2002. Orang-orang yang berjiwa Islam dan melihat Mahathir sebagai anti Islam merasakan mereka sudah menang bila mana akhirnya Mahathir mengaku kalah untuk berundur.

Misalnya tanpa banyak orang mengetahui, Tok Guru Nik Aziz Menteri Besar Kelantan awal-awal lagi telah menulis surat untuk mengucapkan tahniah kepada Pak Lah. Sebaik sahaja beliau mendengar berita Mahathir ingin berundur, beliau terus menulis surat. Tetapi malangnya surat itu tidak sempat diposkan kerana Pak Lah 'tidak jadi' menjadi PM.

"Saya telah siap surat mengucapkan tahniah awal-awal

kepada Pak Lah, saya gembira kalau Pak Lah menjadi Perdana Menteri, tetapi malang surat itu tidak kesampaian sebab Pak Lah masih belum menjadi Perdana Menteri. Saya ingat dia dah jadi PM dah, bila mana Mahathir menangis-nangis tidak mahu dipujuk," begitulah beritahu Nik Aziz dalam satu percakapan dengannya. Katanya surat itu masih ada dan tersimpan di dalam begnya hingga ke hari ini.

Tok Guru itu tidak mengulas kenapa beliau membuat surat itu terlebih awal sebelum Pak Lah mengangkat sumpah! Tetapi dari situ dapat ditafsirkan betapa Tok Guru bertubuh kecil molek itu sangat mengalu-alukan Pak Lah. Beliau mungkin dapat merasakan Pak Lah akan dapat melakukan sesuatu jika cucu Abdullah Fahim itu menjadi pemimpin besar negara ini. Sebagai orang berpendidikan agama, beliau tentu dapat merasakan apa yang akan dilakukan oleh cucu Sheikh Abdullah Fahim itu.

Bagi Tok Guru Nik Aziz sudah tentu beliau bukan mengharap itu saja tetapi mengharapkan sesuatu yang lebih jauh dari itu daripada Pak Lah. Setidak-tidaknya Pak Lah akan berfikir panjang untuk memburuk atau memfitnah Pas secara hidup-hidup. Pak Lah mempunyai sedikit *sentimental value* berbanding dengan Perdana Menteri sekarang terhadap Pas, kerana bapanya Ahmad Badawi pernah menjadi ketua Dewan Pemuda Pas yang pertama.

Sudah tentu isu Sekolah Menengah Agama Rakyat (SAR) yang riuh rendah baru-baru ini tidak akan timbul kalau Pak Lah menjadi PM. Walaupun ada cadangan agar penilaian semula di buat ke atas SAR namun tindakannya tidaklah sampai memberhentikan bantuan perkapital ke sekolah itu. Pak Lah tidak akan tergamak untuk menganiaya SAR. Sekurang-kurangnya sebelum beliau bertindak menghentikan bantuan beliau akan terkenang kepada datuk dan bapanya

sebab mereka juga di antara polopor SAR di negara ini.

Keprihatinan Pak Lah kepada perkembangan Islam tidak boleh dinafikan. Sebaik sahaja beliau memangku jawatan Perdana Menteri beliau terus membuat pengumuman agar bahasa Arab dijadikan mata pelajaran wajib di sekolah. Langkah itu menunjukkan komitmen beliau kepada Islam amat tinggi kerana kita tahu bahasa Arab adalah bahasa al-Quran. Pak Lah tidak direct untuk memberi penekan kepada Islam, tetapi perwajiban ke atas bahasa Arab itu adalah simbolik kepada keinginan beliau kepada Islam.

Seperti yang telah saya tulis di dalam buku 'Sandiwara Belum Selesai' tugas Pak Lah takkala memimpin Umno nanti sangatlah besar. Satu tugas yang perlu diutamakan ialah beliau kena *re-engineering* balik Umno. Pak Lah perlulah membawa Umno balik kepada perjuangan asalnya, iaitu berteraskan Melayu dan Agama. Umno di era Mahathir selama 22 tahun telah banyak rosak kerana ia terlalu obses pada pembangunan kebendaan sehingga melalaikan pembangunan insan (manusia).

Ada tiga perkara asas yang saya sebutkan didalam buku itu di bawah tajuk 'Harapan Kepada Pak Lah' yang perlu diberi perhatian oleh Pak Lah sesudah beliau menjadi PM. Dan saya sebut semula di sini sebagai peringatan serta perhatian Pak Lah.

1. Membina semula tamadun bangsa Melayu.

Pak Lah harus meletakkan bangsa Melayu di atas tempatnya yang sebenar iaitu sebagai bangsa yang menerajui dan tuan asal kepada negara ini. Pak Lah harus memperkasakan politik orang Melayu di samping cuba menguatkan kuasa ekonomi. Untuk ini di antara caranya ialah Pak Lah kena pastikan bangsa Melayu tidak banyak

berpolitiking dan berpecah sesama sendiri.

Sejajar dengan itu Pak Lah harus pulihkan imej orang Melayu yang sudah hilang jati diri kerana bangsa Melayu dipandu ke arah untuk mengejarkankekayaan (secara melampau). Kesan daripada ini menyebabkan bangsa Melayu sudah hilang rasa maufakat, hormat menghormati dan menukarkannya dengan hidup mementingkan diri sendiri serta berfikiran bobrok.

2. Bidang pendidikan.

Pak Lah juga harus merangka satu plan tindakan ke atas dunia pendidikan hari ini. Pendidikan kepada lebih mereng kepada dunia hari ini tidak banyak menyumbangkan kepada intergeriti dan kebaikan kepada negara. Pendidikan yang bertunjangkan duniawi melahirkan generasi yang liar, ego dan sompong serta bersifat individualistik.

Dalam hubungan itu jurang pendidikan di antara bandar dengan luar bandar perlu dirapatkan. Jurang pendidikan bandar dengan luar bandar begitu jauh sehingga menjadikan hanya sebahagian rakyat sahaja yang maju sementara yang lain masih bodoh dan primitif. Perlu disedari masyarakat luar bandar majoritinya umat Melayu. Keterpisahan atau jurang inilah nanti akan menyebabkan wujudnya dua entiti Melayu yang kontras.

3. Ekonomi Islam.

Dasar atau konsep ekonomi yang dipraktikan hari ini iaitu ekonomi kapatilis Yahudi hendaklah dibuang perlahan-lahan dan diganti dengan dasar ekonomi Islam yang adil dan bersifat berkebajikan. Dasar ekonomi jugalah yang menjadi penyebab wujudnya jurang perbezaan di antara kaum serta mengkelompokkan yang kaya dengan yang miskin.

Itulah tiga perkara pokok yang perlu mendapat perhatian Pak Lah. Kita tahu bukan senang untuk beliau melaksanakan semua itu kerana situasi dan geo-politik yang ada di dalam negara ini. Bahkan di dalam Umno juga tidak semua akan bersetuju dengan pendekatan demikian. Di sinilah yang akan menguji sejauh manakah kemampuan dan keberanian Pak Lah. Golongan sekular, mereka yang mencari makan dalam Umno tentu tidak akan bersetuju kerana dengan dasar atau prinsip itu merugikan mereka. Mereka akan memandang Pak Lah surut ke belakang. Di sinilah dilema yang akan dihadapi Pak Lah.

Selain tiga asas itu ada seperkara lagi yang patut dilakukan Pak Lah. Perkara ini ditunggu-tunggu oleh semua orang apabila orang mengaitkan Pak Lah sebagai seorang pemimpin berimej Islam dan berintisarikan Melayu tulen. Perkara itu ialah soal perpaduan Melayu, khususnya di antara Melayu Umno dengan Melayu Pas.

Tanpa disedari Melayu Umno dan Melayu Pas juga berada dalam garis selari yang seperti tidak ada titik temunya. Jika dilihat perjuangan Umno dan Pas sama, keduanya menggunakan slogan berjuang untuk agama, bangsa dan tanah air. Tetapi anehnya dalam kesamaan itu mereka sukar untuk duduk semeja. Pas dan Umno menjadi seperti landasan (rel) kereta api yang selari tetapi tidak bertemu dihujungnya.

Menjadi tanggungjawab Pak Lah untuk menemukan dua batang rel yang selari itu. Orang Melayu yang waras sangat yakin perpaduan Melayu Pas dan Umno boleh dilakukan. Itu terserah kepada kebijaksanaan dan sejauh manakah fatanahnya kedua pemimpin parti berkenaan. Almarhum Datuk Asri dan Tun Razak telah melakukan perkara ini kira-kira 30 tahun lalu. Sebenarnya penyatuan Pas dan Umno pada masa itu bukan saja disebabkan oleh peristiwa 13 Mei

tetapi ia berlaku kerana kesungguhan, keikhlasan serta prihatinya pemimpin kedua parti dewasa itu.

Dengan latar belakang pendidikan agama yang baik kedua pemimpin Umno dan Pas hari ini dapat melakukan perpaduan itu. Apabila Pak Lah dan Haji Hadi sah menjadi presiden parti masing-masing mereka mempunyai kesempatan terbaik bagi merealisasikan agenda berkenaan.

Untuk melaksanakan agenda ini sekali lagi orang akan melihat sejauh mana keberanian dan keikhlasan Pak Lah. Jika agenda ini ada tersemat dalam minda Pak Lah tidak dapat tidak sekali lagi beliau akan ditentang. Saat inilah Pak Lah akan berada dalam dilema samada untuk akur kepada kehendak parti ataupun tuntutan atau aspirasi umat Melayu.

-© 31 Mac 2003.



SHEIKH ABDULLAH FAHIM ialah datuk kepada Dollah Badawi. Beliau seorang ulamak terbilang dan tersohor di negara ini. Darah yang mengalir dalam tubuh Dollah Badawi adalah darah Sheikh Abdullah yang disaring oleh malaikat daripada noda dan kekotoran syaitan. Orang yang sudah sampai ke martabat *mutmainah* susah untuk mengejinya dan memburukkan orang lain termasuk lawannya.



Percutian Mahathir ujian buat Pak Lah

8

DR MAHATHIR memilih tanggal 6 Mac untuk beliau mula bercuti selama dua bulan. Mulai tarikh itu Perdana Menteri akan bercuti sehingga pada 5 Mei. Rancangan percutian itu dibuat sewaktu beliau kalut hendak berundur akhir tahun lepas lagi. Mahathir nampaknya benar dan mengotakan apa yang dikatakan.

Sebelum berlepas untuk bercuti Mahathir merakam ucapan terima kasih kepada warga Kuala Lumpur kerana sama-sama membantu menjayakan Persidangan Negara-Negara Berkecuali (NAM) akhir bulan lepas. Cara Mahathir memberi ucapan itu begitu sentimental sekali menggambarkan beliau seolah-olah akan meninggalkan jawatan dan negara ini dalam tempoh terdekat. Sayu juga hati membacanya.

Sementara dalam satu kenyataan lain Dr Mahathir menjelaskan sepanjang percutiannya, jawatan PM akan dipangku oleh Datuk Seri Abdullah Ahmad Badawi. Perkara itu telah dimaklumkan kepada YDP Agung.

Ke manakah tempat beliau bercuti kali ini? Beliau hanya ada menyebut sepanjang percutiannya beliau akan melawat Brazil dan Jedah. Dalam percutian dahulu beliau ke Itali, bermain bot di pulau Ischia bersama keluarga di sana. Apakah kali ini semasa di Brazil beliau bersama isterinya akan belajar menari samba di sana? Ataupun semasa di Jedah akan melawat ladang temakan unta sebagai persiapan projek beliau apabila bersara nanti?

Biarlah Dr Mahathir bercuti selepas penat berkerja untuk negara. Biarlah beliau mendapat sedikit ketenangan. Jangan sesiapa dendki atau irihati kepadanya. Beliau memang berkerja kuat untuk negara. Kini pemerhatian orang ialah kepada Pak Lah yang memangku jawatan Perdana Menteri. Dalam tempoh percutian Abdullah Badawi akan menjalankan urusan Perdana Menteri dan juga Menteri Kewangan. Nampaknya Pak Lah akan menjalankan tiga tugas sekaligus, selain Perdana Menteri dan Menteri Kewangan beliau juga adalah Menteri Dalam Negeri.

Dengan penyerahan itu Pak Lah mempunyai kuasa penuh. Kalau di zaman Anwar Ibrahim dahulu, apabila beliau (Anwar) diberi tugas memangku jawatan PM beliau telah membentang Akta Rasuah (pindaan) ke parlimen dan diluluskan. Kelulusan itu menimbulkan rasa kurang senang Dr Mahathir. Gara-gara itulah juga dikatakan Mahathir mula tidak senang dengan Anwar. Kerana akta itu dikatakan bakal memakan diri Dr Mahathir dan para kroninya sendiri!

Apakah Pak Lah akan melakukan perkara sama? Membuat kejutan seperti mana yang dilakukan Anwar?

Beranikah Pak Lah? Banyak masalah negara yang belum selesai yang boleh dibereskan oleh Pak Lah dalam tempoh dua bulan.

Beberapa kes mahkamah dan siasatan BPR masih tertangguh ataupun belum selesai. Antara kes-kes itulah kes bekas Menteri Pembangunan Luar Bandar Annuar Musa, laporan kes rasuah Menteri Besar Selangor, Khir Toyo yang dibuat oleh Ahmad Lutfi Othman. Kes siasatan ke atas kerugian Perwaja Steel, kes penyelewengan wang Tabung Haji, kes KWSP.

Kes Perwaja Steel sudah masuk tahun ke lima namun BPR masih juga belum mendakwa orang yang dikatakan terlibat dengan kerugian itu. Pengarah Eksekutifnya Eric Chia masih bebas dari sebarang tindakan undang-undang.

Menurut Rais Yatim kes itu baru boleh dibicarakan apabila satu akta dibentangkan di Parlimen. (Bila bang Rais wei?) Kes Perwaja Steel yang melibatkan kerugian terkumpul kira-kira RM9 billion menyebabkan Perwaja Steel hampir tutup dan terpaksa diselamatkan syarikat lain dengan bantuan kerajaan. Menghairankan juga kes ini kerana sekejap *on sekejap off*. Walhasilnya tidak ada apa-apa hasil.

Apakah Pak Lah berani untuk memecut kes-kes melibatkan kepentingan nasional ini agar disegerakan? Sekiranya Pak Lah benar tidak suka kepada rasuah dan penyelewengan tidak ada sebab untuk beliau terus memendam kes-kes berkenaan. Lagipun siasatan oleh BPR ke atas sesetengah kes-kes itu sudah hampir ke penghujung. Kita percaya BPR sudah bersiap sedia untuk membawa kes itu ke mahkamah cuma menunggu lampu hijau dari kerajaan sahaja. Mengapa kes Perwaja ini amat sulit sangat? Apakah kerana ia turut melibatkan para kaloi dan jerung?

Demikian juga dengan kes Annuar Musa. Khabarnya BPR

dan polis sudah pun selesai membuat penyiasatan. Sudah beberapa kali fail kes bekas Menteri Pembangunan Luar Bandar itu ditutup dan dibuka. Annuar juga sudah dua kali dipanggil untuk siasatan. Kini orang ramai sedang menanti apakah Annuar akan didakwa ataupun tidak. Sekiranya Annuar Musa bersih, Pak Lah hendaklah memberi tahu orang ramai dan jangan memerapkan sahaja. Tanpa ada keputusan konkret sama ada hendak dakwa atau tidak ia boleh menyebabkan Annuar Musa sakit jantung.

Pada masa ini Annuar Musa sangat perlu dibaptiskan semula untuk membolehkan beliau turun ke bawah mengganyang Pas di Kelantan. Disebabkan kesnya masih tergantung menjadikan Annuar malu-malu untuk bersua dengan rakyat. Ke mana beliau pergi beliau merasakan seluruh biji mata mencerlun (memandang) ke arahnya.

Pengguguran jawatan Timbalan Ketua Umno Kelantan sudah cukup untuk menyenakkan perutnya. Adalah tidak adil kalau semasa beliau dikaitkan dengan kes itu seluruh akhbar arus perdana menyiarkannya, dan apabila kes itu tutup ia didiamkan sahaja. Sekiranya Annuar tidak akan dihadapkan ke mahkamah, akhbar yang menyiarkan pembabitannya dahulu hendaklah menyiarkan berita mengenai pembersihannya itu. Takkanlah dengan sesama kroni pun ada diskriminasi!

Begitu juga dengan laporan terhadap MB Selangor Khir Toyo yang dikatakan telah melakukan rasuah dan menyalahgunakan kedudukannya seperti mana yang dibuat oleh penulis politik Ahmad Lutfi Othman. Walaupun pihak BPR seperti menafikan laporan Lutfi tetapi bagi orang ramai ia masih belum selesai. Bukti-bukti yang dikemukakan oleh Lutfi kemas dan jelas. Pak Lah hendaklah membuat pengumuman terbuka mengenai tuduhan ke atas Khir Toyo itu. Jangan

pula kerana Khir menunjukkan sokongan kepada Pak Lah maka laporan kepada BPR itu boleh ditutup begitu sahaja. Tidak ada istilah kroni dalam masalah rasuah.

Bagai mana pun di antara banyak-banyak kes itu yang menarik ialah kes rayuan Anwar Ibrahim terhadap hukuman penjara enam tahun kerana penyalahgunaan kuasa dan sembilan tahun kes liwat ke atasnya. Apakah kes ini akan berlangsung sewaktu ketiadaan Mahathir? Apakah Pak Lah memberi lampu hijau untuk menyelesaikan kes rayuan yang beberapa kali ditangguhkan itu.

Kes Anwar adalah perkara paling menarik dan paling unik dalam tempoh percutian Mahathir ini. Apa lagi orang selalu melihat apabila Mahathir bercuti maka adalah sesuatu yang akan berlaku dalam negara. Penyerahan tugas PM kepada Pak Lah, mungkinkah ianya satu arahan agar Pak Lah menyelesaikan kes Anwar? Sekurang-kurang itulah persepsi orang-orang Keadilan.

Pada 18 dan 24 Mac ini dijangka semakan dan rayuan kes Anwar akan didengar. Orang ramai sedang memerhati apakah akan berlaku dengan kes berkenaan. Anwar awal-awal lagi telah meminta supaya Pak Lah menghormati mahkamah dan jangan cuba mencampuri urusan keadilan.

Puak Anwar cukup yakin mereka akan memperolehi kemenangan. Rayuan itu akan diterima. Dan lebih optimis lagi ada yang meramalkan kes itu akan dismis (buang kes). Jika rayuan dan ikat jamin itu diterima bererti Anwar kena dibebaskan. Begitulah yang berlaku.

Namun secara peribadi saya berani mengatakan impian dan harapan itu tidak akan berlaku. Perergian Mahathir ke luar negeri saya tidak nampak sebagai satu escape untuk membebaskan Anwar! Percutian Mahathir tidak ada kena mengena dengan pembebasan Anwar. Dan Pak Lah tidak

dapat berbuat apa-apa bersabit Anwar selagi jawatan PM disandang oleh Mahathir.

Selain kes-kes rasuah berkenaan yang mencabar wibawa Pak Lah sebagai pemangku Perdana Menteri ada beberapa kes lagi yang perlu disemak semula oleh Pak Lah. Sekurang-kurangnya dua kes yang masih membelenggukan pemikiran rakyat. Kes itu ialah mengenai pembabitan Rafidah Aziz dalam tender yang melibatkan menantunya. Walaupun Peguam Negara telah rasmi menutup fail mengenai kes ini tetapi penyelesaian muktamad terhadap kes itu belum selesai kerana orang ramai masih lagi tertanya-tanya.

Begitu juga dengan kes rasuah bekas Ketua Menteri Melaka, Rahim Tamby Chik. Penutupan siasatan kes itu menimbulkan tanda tanya. Apakah Pak Lah berani untuk membuka semula kedua kes berkenaan?

Selain dari masalah rasuah, pergolakan di dalam parti MCA juga menjadi satu ujian buat Pak Lah. Masalah itu mencabar sejauh mana kemampuan Pak Lah untuk menyelesaikan masalah dalaman parti kerabat Barisan Nasional itu. MCA yang merupakan parti kerabat BN terbesar sedang dilambung gelora. Presiden dan timbalannya bercakaran sesama sendiri. Masalah didalam MCA nampaknya tidak mudah untuk reda, malahan ia berpotensi untuk merebak. Perkembangan terbaru mengenai wujud kongsi gelap di dalam MCA makin mengeruhkan lagi keadaan.

Kewibawaan Pak Lah akan teruji dengan masalah MCA ini. Selaku orang bakal menjadi Presiden BN Pak Lah harus memastikan percakaran itu tidak akan merebak. Bukan itu sahaja penyelesaian mengenai MCA ini sangat perlu memandangkan pilihan raya umum hampir tiba dan kian dekat. Pak Lah harus sedar kalau masalah dalam MCA tidak

dapat diatasnya ia boleh menjasakan peluang BN untuk menang. Kemenangan BN adalah penting bagi Pak Lah menjadi Perdana Menteri.

Kedudukan dan karisma Pak Lah akan teruji. Sekiranya MCA gagal mencari penyelesaian dalam tempoh dua bulan ini ia boleh dikira sebagai kegagalan Pak Lah. Kedudukan Pak Lah selaku Pemangku PM dan orang bakal menjadi Presiden BN tidak dihormati. Dengan apa cara pun Pak Lah harus menyelesaikan pergolakan di dalam MCA dan pergolakan ataupun masalah lain di dalam badan kerabat BN sebelum Mahathir pulang.

Melihat kepada ujian ataupun perkembangan semasa menyebabkan peluang Pak Lah memangku jawatan PM adalah sungguh penting dan sangat mencabar. Dua bulan memangku jawatan PM boleh dianggap sebagai percubaan terakhir kepada Pak Lah. Jika diibaratkan kepada budak sekolah, ini adalah ujian akhir. Sekiranya ujian ini berjaya, maka layaklah Pak Lah untuk menjadi Perdana Menteri selepas Oktober depan.

Seandainya beliau gagal kemungkinan peluang itu akan dibatalkan. Pak Lah akan *cancel* daripada menjadi Perdana Menteri. Apakah seorang calon lain akan dikemukakan untuk pertimbangan. Percutian Mahathir adalah satu ujian kepada Pak Lah.

Sewaktu Mahathir bercuti sebulan tidak lama lalu, Pak Lah telah menjalankan urusan Perdana Menteri. Namun ia tidak dibenarkan memangku jawatan PM. Dalam siri percubaan sebelum ini Pak Lah dikatakan gagal untuk menjawab beberapa "kertas soalan" yang diberikan oleh Mahathir. Konfrence ekonomi di Korea adalah kegagalan besar Pak Lah. Pak Lah telah melakukan mistik besar kepada negara apabila beliau bercakap pasal kuasa China dan

Amerika Syarikat. Pak Lah tersasau mengatakan Korea tidak perlu takut kepada Amerika kerana China sudah muncul sebagai kuasa besar. Khabarnya Mahathir kurang senang dengan ucapan Pak Lah.

Begitu juga dengan masalah air dan pulau Batu Putih yang dipertikaikan di antara Malaysia dengan Singapura. Pak Lah dihantar khasnya ke Singapura untuk menyelesaikan perkara itu agar ianya tidak dibawa ke ICJ. Apa yang diingini biarlah Singapura menyerahkan pulau berkenaan kepada Malaysia. Demikian masalah air yang dipertikaikan sehingga sekarang. Namun kunjungan Pak Lah ke Singapura tidak membawa hasil. Dalam erti kata lain Pak Lah gagal. Masalah tuntutan pulau Batu Putih terpaksa dibawa ke ICJ.

Selepas itu Pak Lah dihantar pula ke Indonesia. Satu rombongan perdagangan yang disertai oleh ahli-ahli dagang dan saudagar yang mula berjinak dengan beliau. Antara lain tujuannya untuk membawa para pelabur luar yang tidak yakin dengan Jakarta datang ke Kuala Lumpur. Sekali lagi usaha Pak Lah itu tidak berbaloi. Tidak banyak pelabur berminat ke Kuala Lumpur, sebaliknya mereka tertumpu ke Singapura terutamanya pelabur Cina. Kedatangan Pak Lah ke Indone-sia itu juga gagal.

Jadi tempoh dua bulan mendatang ini adalah saat paling mencabar. Kalau Pak Lah gagal ataupun tidak menunjukkan apa-apa kejayaan, tidak mustahil hajat Mahathir untuk berundur akan ditarik balik. Apabila Menteri Kewangan turut sama dilepaskan kepada Pak Lah ia adalah satu ujian besar kepada Pak Lah. Umum mengetahui bahawa Pak Lah tidak mempunyai apa-apa kemahiran dan kepakaran di dalam bidang kewangan sebelum ini. Dengan peluang yang ada apakah Pak Lah akan melakukan sesuatu? Menurutnya beliau

akan mengumumkan pakej ransangan ekonomi penghujung bulan ini. Pengumuman itu tentu menjadi perhatian kerana orang ingin tahu bagai manakah sentuhan Pak Lah dalam bidang kewangan. Apabila pakej itu diumumkan berapa indeks di BSKL akan naik?

Pak Lah perlu berhati-hati dalam melalui tempoh ujian ini. Sekiranya Pak Lah gagal, Mahathir akan menggunakan kegagalan itu sebagai alasan untuk mengcancelnya. Dan orang-orang yang tidak mahu Mahathir melepaskan jawatan itu kepada Pak Lah kerana ada kepentingan peribadi akan mendesak Mahathir agar jangan berhenti dahulu. Kegagalan Pak Lah akan disambut dengan tepuk sorak oleh kumpulan itu dan dijadikan alasan untuk mengekalkan Mahathir.

Kejayaan dan kecemerlangan Mahathir mengendalikan Persidangan Negara-Negara Berkecuali (NAM) pada 20 hingga 25 Februari lalu akan dijadikan alasan untuk menahan Dr Mahathir. Tidak siapa dapat nafikan akan kehebatan Dr Mahathir semasa mempengerusikan mesyuarat NAM semua dunia *salute* kepada Mahathir. Kejayaan Malaysia menjadi tuan rumah meletakkan Mahathir menjadi lebih muda 10 tahun dan semangatnya untuk berkerja bertambah berlori-lori.

Keberanian dan kelantangan menghentam kuasa-kuasa besar menjadi pembuka semangat kepada negara-negara lain. Dunia melihat suara Malaysia tidak setanding dengan keluasan geografi negaranya. Dr Mahathir berjaya meletakkan Malaysia khasnya dan NAM sebagai satu pakatan baru yang berwibawa. Tidak salah kalau dikatakan, Mahathir adalah jelmaan Sukarno baru. Perjuangan Sukarno disambung oleh Mahathir.

Adalah amat mustahil bagi Mahathir berundur dalam dunia memintanya terus maju ke hadapan. Tempoh tiga tahun

Malaysia diberi mandat menjadi Pengerusi perlulah diisi dengan seberapa banyak tindakan untuk kesejahteraan dan kemajuan NAM. Apa lagi resolusi telah disepakati supaya NAM tidak beretorik tetapi bertindak.

Untuk memenuhi hasrat NAM itu ia memerlukan seorang pemimpin berani dan babil seperti Mahathir. Dengan keberanian, kebencian konsisten Mahathir kepada kuasa Barat yang menindas negara kecil menjadikan Mahathir bukan sahaja mampu, tetapi benar-benar berminat untuk menyerang kuasa besar dunia. Apa lagi Dr Mahathir syok kalau beliau dilabelkan sebagai pemimpin dunia ketiga yang lantang. Selepas berjaya menjadi seorang Perdana Menteri, tentulah *title* pemimpin dunia pula hendak diraih.

Keperluan dan tuntutan-tuntutan itu meletakkan Mahathir dalam keadaan sukar untuk berhenti. Memang benar Pak Lah boleh meneruskan tugas sebagai Pengerusi NAM, tetapi apakah Pak Lah mampu untuk bergerak dan bertindak seperti Mahathir serta memenuhi hasrat NAM? Kesukaran itulah menjadikan Mahathir tidak akan berundur. Sekurang-kurangnya beliau akan terus didesak untuk menjadi PM tiga tahun lagi sebaik tamat tempoh Malaysia menjadi Pengerusi NAM.

Sebenarnya juga Dr Mahathir suka kalau dunia meminta beliau terus menjadi PM. Dr Mahathir pula tidak sukar untuk mendapat sokongan dan desakan agar beliau terus menjadi Perdana Menteri. Sudah ada puak yang bersedia untuk melaung agar Dr Mahathir jangan undur. Puak-puak itu pun sudah menyiapkan sepanduk dengan berbagai kata-kata memuji dan memuja Dr Mahathir sebaik sahaja beliau memijak kaki di lapangan terbang setelah pulang bercuti dari luar negeri nanti. Desakan yang bakal berlaku di lapangan terbang itu kelak akan berpanjangan dan bersambungan

dengan usul meminta beliau membatalkan hasrat berundur ke dalam perhimpunan agung Umno pada pertengahan Jun nanti.

Keyakinan orang ramai bukan sahaja kerana merasakan perlunya Mahathir terus memimpin Malaysia untuk dua tiga tahun lagi. Keyakinan itu juga apabila melihat kepada telatah Dr Mahathir sendiri. Sikap Mahathir menunjukkan seolah-olah beliau tidak bersedia untuk berundur pada Oktober ini. Kenyataan dan janji untuk melepaskan jawatan kepada Pak Lah seperti tidak berapa ikhlas.

Sikap ini boleh dilihat kepada bantahannya kepada cadangan untuk mengadakan Perhimpunan Agung Umno pada bulan Oktober dan tidak pada bulan Jun. Ada suara yang mencadangkan agar perhimpunan diadakan pada Oktober kerana bulan itu beliau hendak berhenti. Biarlah perhimpunan itu menjadi nostalgia untuk Mahathir. Perhimpunan itu sebagai meraikan persaraan Mahathir seperti mana yang berlaku kepada Tun Hussein Onn.

Tetapi Mahathir tidak bersetuju dengan cadangan itu dan marah. Beliau mahukan perhimpunan tetap diadakan pada Jun seperti mana yang telah dijadualkan. Bantahan Mahathir ini menjadikan orang tertanya mengenai hasratnya untuk bersara. Khabarnya cadangan itu dikemukakan sewaktu Pak Lah mempengurusikan mesyuarat. Orang mempertikaikan kenapa beliau enggan perhimpunan di adakan pada bulan Oktober.

Orang mula mengira ketidaksetujuan itu kerana beliau tidak mahu berhenti. Sekiranya beliau ingin berhenti beliau menerima cadangan itu. Ataupun sememangnya beliau enggan bersetuju dengan cadangan sesiapa pun. Kerana sikap Mahathir tidak mudah untuk akur kepada cadangan ataupun kemahuan orang lain meskipun keputusan majoriti.

Detik dan waktu paling afdal untuk beliau memberi lambaian perpisahan ialah di perhimpunan agung Umno.

Apabila beliau menolak cadangan itu menyebabkan orang membuat hisab lain mengenai politiknya. Mengapa Mahathir tidak mahu perhimpunan diadakan pada bulan Oktober, sebab beliau menyebut untuk berhenti selepas Oktober. Jadi kalau perhimpunan diadakan pada Oktober hendak tak hendak beliau kena berhenti kerana perhimpunan itu dipinda semata-mata untuk meraikannya.

Semisalnya pelamin sudah dibuat, tarikh perkahwinan sudah ditetapkan, pengantin tidak dapat mengelak lagi daripada terus diijab kabulkan. Jadi Mahathir tidak mahu terperangkap dalam perhimpunan Oktober itu yang dilihat sebagai taktik untuk membuangnya.

Pandangan lain menjelaskan juga disaat-saat akhir beliau masih berkerja. Paling baru dan tugasnya paling akhir ialah mengenai pengumuman Ketua Menteri Sabah. Beliau telah membuat pengumuman Datuk Musa Aman dilantik menjadi Ketua Menteri Sabah disaat-saat hendak naik kapal terbang khas untuk ke Doha. Apalah salahnya kalau mengenai pengumuman itu beliau serahkan kepada Pak Lah. Biarlah Pak Lah mendapat kredit mengenai perlantikan Musa.

Tetapi Mahathir tidak berbuat demikian. Beliau lakukan sendiri. Tidak seperti mana apa yang berlaku kepada Anwar Ibrahim dahulu. Anwar mengumumkan perlantikan Datuk Abu Zahar Ithnin sebagai Ketua Menteri Melaka. Apakah itu menunjukkan Mahathir tidak mempercayai Pak Lah? Perkara ini terlihat juga sewaktu Mahathir memberi kenyataan akhbar di sidang NAM lalu. Ketika ditanya oleh wartawan mengenai hasratnya untuk berhenti Mahathir hanya tidak tegas dalam jawabannya dan mengatakan bahawa dia (Pak Lah) berada bersamanya.

Di sepanjang sidang NAM itu nampak jelas yang Mahathir tidak cuba untuk mempromosi penggantinya. Apalah salahnya semasa beliau mengakui bahawa beliau tetap akan berhenti pada Oktober, apabila disoal oleh wartawan beliau menyeru negara-negara NAM agar memberi sokongan padu kepada penggantinya yang akan mengambil alih tempatnya. Tetapi Mahathir tidak berbuat begitu. Cara Mahathir melayani Pak Lah di sepanjang persidangan itu seolah-olah Pak Lah tidak wujud. Peranan Syed Hamid Albar lebih besar dan menyerlah daripada Pak Lah.

Mahathir sedikitpun tidak memberi kredit kepada Pak Lah. Beliau seakan cuba menenggelamkan nama Pak Lah dalam hiruk pikuk NAM. Sekiranya beliau berkeyakinan beliau akan mempromok Pak Lah. Di masa itulah waktu terbaik untuk Mahathir memberi tahu dunia (NAM), siapa Pak Lah dan siapa penggantinya.

Itulah diantara alasan dan hujah yang sedang diperkirakan umum kini. Melihat kepada itu ia memberi gambaran yang Dr Mahathir tidak mahu berhenti pada Oktober ini. Beliau masih berminat untuk memegang sekurang-kurangnya tiga tahun lagi, sebaik genap tempoh Malaysia menjadi Pengerusi NAM.

Implikasi daripada kemungkaran janji Mahathir kali ini adalah besar. Mahathir boleh berbohong untuk beberapa kali sebelum ini. Tetapi kali ini beliau tidak dapat berbuat begitu lagi. Hasratnya untuk berhenti merupakan satu komitmen yang bukan main-main. Semua dunia mengetahui. Yang lebih terasa dan berat memikul menanti saat itu ialah Pak Lah. Apakah akan terjadi sekiranya Dr Mahathir tidak berhenti pada Oktober ini.

Pada saya pula Pak Lah tidak ada pilihan lain melainkan beliau kena berhenti. Pak Lah akan merasa malu yang amat

sangat. Sebagai seorang yang mempunyai maruah diri, Pak Lah tidak mungkin akan terus berada di bawah Mahathir untuk terus menanti janji-janjinya. Bukan sahaja anak cucu Pak Lah tetapi dunia akan metertawakan Pak Lah. Jadi untuk menjaga maruah dan moralnya Pak Lah akan berhenti. Kesimpulannya kalau Mahathir tidak berhenti pada Oktober, maka Pak Lah akan berundur pada November ini.

Dr Mahathir pula akan dikutuk oleh semua orang. Maruah dan moralnya juga akan jatuh serendah-rendahnya. Anggapan dan tuduhan beliau seorang diktator akan disahkan. Kemungkinan itu orang ramai akan menghina dengan seburuk-buruk hinaan kepadanya. Kemungkinan itu juga menyebabkan orang ramai akan hilang rasa hormat dan sanjungan kepada beliau sebagai seorang pemimpin hebat selama ini.

Apa pun semuanya ketentuan Allah s.w.t. "Setiap yang bergerak di atas muka bumi ini semuanya diatas ketentuan daripada Allah s.w.t. Tidak bergerak sesuatu itu kalau bukan di atas kehendak Allah." - ©

Amin untuk Pak Lah!



SEORANG suami sangat mengharapkan kerjasama dan sokongan padu daripada isteri dalam menentukan kejayaannya. Isteri adalah nakhoda kedua dalam sesebuah rumah tangga. Kata orang Isteri juga merupakan tiang seri dan penyokong serandang di dalam sebuah rumah. Sekiranya tiang seri tidak tegap ataupun serandang senget maka akan sengetlah rumah berkenaan. Tindakan Hendon Mahmood isteri Dollah Badawi turut terlibat dengan pelancaran kempen *1 Suami = 1 Isteri* baru-baru ini sedikit sebanyak mencemarkan imej Dollah sebagai pemimpin bersih dan berimej Islam. Walaupun mungkin Endon bukan seorang anti poligami tetapi apabila beliau terlibat dalam program berkenaan (melancarkannya) menyebabkan orang beranggapan Endon tidak suka kalau Dollah Badawi kahwin satu lagi. Barang kali Endon mahu Dollah dikenali sebagai bapa monogami?



WAAAA....waaaaa.... aku tidak mahu berundur, aku terus mahu menjadi Perdana Menteri. Tangisan Mahathir di perhimpunan agung Umno tahun lepas telah ditafsirkan dengan berbagai tafsiran. Ada yang mentafsirkan tangisan itu sebagai satu sandiwara atau taktik untuk menarik perhatian perwakilan supaya bersimpati dengannya. Ada juga mengatakan ia suatu yang benar. Susah juga untuk kita mendapat pengertian sebenar di atas tangisan bellau itu. Jika dilihat kepada gambar ini Mahathir menangis seperti seorang budak. Tangisan seorang budak lalah kerana mereka meminta sesuatu yang diingininya. Tangisan ini akan terjawab selepas Oktober hadapan. Kalau Mahathir masih lagi menjadi PM maka sahihlah tangisan ini adalah tangisan seorang budak! Malu...



Kelantan dalam genggaman PAS

9

ROMBAKAN besar-besaran Badan Perhubungan Umno Kelantan pertengahan Januari lalu adalah di antara strategi Umno untuk menawan Kelantan dalam pilihanraya akan datang. Rombakan itu mendapat ulasan, aluan dan liputan meluas media massa, seolah-olah ianya satu perkara besar. Semua pemimpin Umno besar kecil, tua muda memberi ulasan positif di atas rombakan itu. Melihat cara mereka mengulas, semacamlah Kelantan sudah jatuh ke tangan Umno.

Sepatutnya gembar gembur mengenai rombakan itu mengejut dan menakutkan Pas. Pas Kelantan sepatutnya sudah menjadi cacing kepanasan dengan perubahan kepimpinan Umno itu. Tetapi nampaknya keadaan jadi bertukar sebaliknya. Pas tenang dan releks saja sebaliknya

yang kelam kabut Umno sendiri. Pas menyambut perubahan itu dengan kibaran sepanduk, "Perubahan Sudah Bermula – Yang Tua Lawan Yang Muda."

Sementara 'tuan' negeri Kelantan dalam memberi reaksi ke atas rombakan itu menyifatkan Umno hanya menukar *body* saja tidak tukar enjin, hanya tukar tayar tapi tak ada minyak.

Begitulah ulas Tok Guru Nik Aziz begitu simplistik dan bersahaja sekali, tetapi ertinya cukup mendalam. Yang dapat faham, fahamlah, yang tidak dapat faham hanya melihat setakat luar sahaja mengenai ulasan tok wali moden itu.

Maknanya pertukaran itu tidak 'jadi apa benda', kata orang Kelantan. Tidak membawa natijah dan matlamat besar apa lagi menyebabkan orang Kelantan jadi terpegun dengan perubahan badan perhubungan Umno Kelantan tersebut. Ia adalah pertukaran biasa, wal hasil balik asal, wal asal balik hasil. Perubahan yang bukan bersifat berhijrah daripada kejahatan kepada kebaikan. Bukan perubahan menyalinkan pemimpin jahil kepada pemimpin beriman dan bertakwa. Perubahan yang bukan hakiki seperti mana yang dituntut oleh rakyat. Perubahan pi mai, pi mai tang tu juga!

Justeru Pas sedikit pun tidak merasa gentar ataupun takut dengan perubahan yang dibuat itu kerana mereka sudah arif akan keadaannya. Sebaliknya perubahan itu memberi kelebihan kepada Pas kerana ia meringankan kerja-kerja Pas untuk mempertahankan negeri Serambi Mekah itu. Perubahan bukan di atas kehendak Pas tetapi ia memenuhi citra politik Pas.

Berlainan dengan pihak Umno. Rombakan itu menimbulkan keributan di dalam parti kebangsaan itu. Rombakan itu seolah-olah seperti buah labu yang dibaiki oleh tikus. Bermacam cerita yang tersebar keluar dan menjadi pertuturan rakyat dengan perubahan itu. Khabarnya ada yang emosional

dan menangis kerana tidak dipilih dan ada yang sebak dan terkilan kerana digugurkan tanpa sebab-sebab tertentu dan tidak dimaklumkan terlebih dahulu.

Kalut juga di majlis pengumuman perubahan baru itu. Ada yang terjun tidak bertangga kerana tidak terpilih. Kalau sebelum ini Umno agak tenang dan tidak bergelombang, tetapi ekoran rombakan itu Umno kembali bergelora semula. Ketenangan sebelum ini terusik semula. Soal rasa sakit hati, pedih jantung dan berdesing (panas) telinga berlaku semula.

Sikap rumah siap pahat terus berbunyi masih kedengaran, belum 'lendek' sampai kini. Ada di antara yang gugur telah membuat perancangan tersendiri bagi mana untuk membalas dendam dan mengajar orang yang bertanggung jawab dengan perubahan itu. Rasa aib dan malu muka masih lagi belum dapat dihapuskan oleh mereka yang menjadi mangsa dengan rombakan itu.

Mungkin orang luar Kelantan yang mendapat maklumat menerusi akhbar merasakan perubahan itu sesuatu yang baik. Mentafsirkan perubahan itu sebagai tanda untuk Umno menawan Kelantan. Lagi pun tidak ada pun sebuah akhbar Melayu yang membuat laporan secara jujur. Menceritakan apakah sebenarnya yang berlaku atau sandiwara di sebalik rombakan itu. Semuanya bertindak menjadi 'belira' untuk menyedapkan bunyi. Laporan-laporan itu memberi keyakinan kononnya Umno mampu merampas Kelantan.

Dari luar rombakan itu memberi imej baru kepada Umno Kelantan. Rombakan untuk membersihkan Umno daripada dikelilingi oleh mereka yang *immoral*, rasuah kaki betina. Jadi rombakan itu adalah untuk membuang segala habuk, segala selut dan hama yang mencemarkan Umno. Itulah pandangan dari luar dan dari jauh, tetapi hakikatnya tidak begitu.

Jika dilihat secara keseluruhan, Umno masih tidak

berubah. Seperti kata Tok Guru Nik Aziz itu, enjin Umno masih enjin lama. Yang bertukar hanya *body* dan tayar. Makna imej dan perjuangan Umno masih lama. Matlamat dan konsep perjuangan Umno masih seperti dahulu; materialistik sifatnya, hendulistik budayanya, kapitalisma ekonominya dan sekularisma pendidikannya.

Setakat pembaharuan imej tidak akan memberi makna kepada rakyat Kelantan. Rakyat Kelantan cerdik dan tidak mudah terpesona dengan imej. Yang penting ialah semangat serta roh perjuangan. Imej baik kalau roh jahat, perjuangan tidak memenuhi kehendak rakyat Kelantan mereka akan tolak. Rakyat Kelantan tidak begitu terpesona dengan hal-hal keduniaan yang rakus dan brutal, mereka lebih mengimpikan kesejahteraan dan kedamaian. Naluri dan aspirasi ini tidak tersentuh oleh jiwa pemimpin Umno.

Kenapa Pas mendapat hati bagi rakyat Kelantan, sebab Pas memiliki dua imej serentak – enjin dan roh. Pas sudah menunjukkan ia sebagai sebuah parti berimej (mem perjuangkan) Islam dan ditambah pula pemimpinnya bersyaksiah Islam yang warak dan alim mengenai agama. Jadi Pas *perfect* sebagai sebuah wadah bagi rakyat Kelantan. Siapa boleh mencabar Nik Aziz di Kelantan? Tidak ada seorang pemimpin Umno pun di Kelantan boleh menandingi Nik Aziz baik dari segi ilmu, kewarakan, kezuhudan serta keberaniannya dalam mengatakan sesuatu yang *haq*. Di sinilah keberuntungan Pas.

Perkara ini bukan satu retorik atau pendewaan secara taksub oleh orang Pas terhadap Nik Aziz. Tetapi hakikat ini diakui sendiri oleh pemimpin besar Umno. Secara jujur mereka sedar selagi Kelantan diperintah oleh Tok Guru Nik Aziz, Umno jangan bermimpi hendak tawan Kelantan. Bekas hero tahun 80an Umno Kelantan Tengku Razaleigh Hamzah

sendiri mengakui hakikat bahawa Nik Aziz adalah pemimpin sebenar rakyat Kelantan. "Bagi rakyat Kelantan Nik Aziz adalah pemimpin sebenar bagi Kelantan", begitulah akui Tengku Razaleigh.

Susah untuk kita tawan Kelantan kalau Nik Aziz ada, cubalah demo pujuk dia agar kerjasama dengan Umno. Demikian akui pemimpin muda Umno yang baru mendapat tempat di dalam Umno Kelantan kepada saya. Kalau demo tak leh nak pujuk dia, biarlah dia jangan bertanding dalam pilihan raya akan datang. Katanya lagi melepaskan gusar dihati.

Kata-kata pemimpin itu mencerminkan kegusaran dan kebenaran. Hakikatnya Umno megakui dia tidak ada panglima untuk melawan Nik Aziz. Telah berbagai cara dicuba untuk merebahkan orang tua itu, tapi tidak berjaya. Nik Aziz tetap juga unggul. Itulah masalah dan halangan kepada Umno di Kelantan pada masa ini. Nik Aziz menjadi benteng kebal untuk Umno merampas Kelantan.

Kenapa Umno lihat Nik Aziz jadi penghalang. Apa kelebihannya? Tanya saya sengaja mahu mencari jawaban lain daripada pemimpin muda berkenaan. Demo tahuolah orang Kelantan, kalau berhadapan dengan tok lebai, tok guru mereka mudah rebah, katanya. Kenapa Umno tidak cari tok guru dan tok lebai untuk berlawan dengannya, balas saya pula. Kita bukan macam Pas, kita tidak jadikan agama sebagai alat! Dia cepat-cepat membantah. Bagi saya tidak salah kalau untuk kemenangan. Ujar saya lagi cuba memberi idea.

Dia membangkitkan amanat ayahnya. Menurut ayahnya dulu seorang Pas tetapi selepas melihat perjuangan Nik Aziz tidak betul dia meninggalkan Pas. Ayah kawan sudah pesan cara Nik Aziz itu salah, jadi mana boleh buat, balasnya. Saya

tidak mengerti dari sudut mana perjuangan Umno tidak munafik? Saya rasa pemimpin muda yang pernah kalah di kerusi DUN itu juga maha arif, tetapi ego dan sentimen politiknya sahaja tidak mahu mengakui itu.

Kenapa Umno gagal untuk melahirkan seorang tok lebai atau tok guru seperti Nik Aziz? Soal saya selepas beliau terus mempertahankan perjuangan Umno yang dianggap suci. Dia tidak memberi jawaban dan permintaan saya itu cepat-cepat dipintas dengan meminta saya mengambil order di Restoran di Hotel sebelah Petaling Jaya itu.

Sebelum ini beberapa orang ustaz telah dihantar untuk berlawan dengan Nik Aziz, tetapi akhirnya terpaksa pulang dengan tangan kosong. Beberapa orang ustaz Pas yang telah menyeberang mencari makan di dalam koloni Umno juga dijadikan perisai atau panglima oleh Umno. Tetapi mereka juga terpaksa pulang dengan tangan bergelombang dengan tahi.

Bekas Pengarah Pusat Islam, yang dianggap sebagai ulamak muktabar oleh Umno juga dihantar untuk merebahkan Nik Aziz, tetapi tidak juga berjaya, Nik Aziz tetap utuh, sebaliknya Pengarah itu yang rebah dan tersungkur makan debu sampai terberak kapur!

Kerajaan sendiri, saya kata 'kerajaan' kerana ianya sebuah agensi kerajaan iaitu Radio Televisyen Malaysia (RTM) cuba melucutkan serban dan jubah Nik Aziz dengan men campakkan imej buruk agar rakyat membenci beliau tapi tak berjaya. RTM telah memainkan isu Tuhan samseng, baruia dan sebagainya dengan tujuan untuk menampakkan Nik Aziz sebagai buruk, melampaui batas dan takabur namun tidak mendatangkan apa-apa kesan. Sebaliknya orang ber tanggungjawab kepada RTM dianggap sebagai baruia dan samseng oleh rakyat. Nik Aziz sedikitpun tidak 'ugah' apa-

apa malahan kedudukannya semakin mantap.

Tidak boleh. Setakat ini tidak ada orang yang boleh berlawan dengan Nik Aziz. Justeru itulah kekuatan yang ada kepada Pas. Pas bukan sahaja mempunyai rupa Islam, tetapi dipimpin oleh orang yang tahu mengenai Islam dan memakumatikan Islam pada dirinya. Rakyat Kelantan faham dan kenal perkara ini, masakan mereka akan meninggalkan Pas dan berduyun-duyun pergi kepada Umno. Tidak. Satu perkara yang perlu difikirkan oleh orang Umno Kelantan kenapa Allah s.w.t. memberi kekuatan dan keselamatan kepada Nik Aziz?

Seperti akui pemimpin muda Umno itu, Kelantan bukan senang untuk jatuh semula ke tangan Umno. Saya mengakui hal ini. Saya berani bertegas selagi Nik Aziz menjadi ketuanya, maka selama itulah Umno kena tunggu. Berlainan kalau tiba-tiba Nik Aziz pamit dan bersara. Mungkin kerja Umno menjadi senang. Sebab itulah Umno beriya mahu Nik Aziz berhenti atau berbalah dengan Ustaz Halim. Itu pun belum jamin lagi kalau pemimpin baru dapat menyambung perjuangan Nik Aziz, menerus pendekataan rendah diri, berilmu, Umno tidak boleh juga berangan-angan.

Pas Kelantan mempunyai dua bentuk pengaruh, pengaruh Pas dan pengaruh Nik Aziz. Pas dan Umno sejak dari dulu hingga kini mempunyai pengaruh sama banyak. Sekitar 40 hingga 55 peratus. Yang menentukan kemenangan ialah pengaruh peribadi kepada pemimpinnya serta peratus orang atas pagar. Nik Aziz dianggar mempunyai di antara 20 hingga 25 peratus pengaruh peribadinya. Kombinasi inilah yang menguatkan Pas.

Nik Aziz membina pengaruh (*image build*) bukan sahaja dengan ilmu agama yang tinggi tetapi melalui akhlaknya sebagai seorang wali. Walaupun sudah menjadi Ketua

Eksekutif namun beliau masih mengekalkan keperibadian walinya, seperti merendah diri, berzuhud, menjaga mulut daripada mencerca orang, berlaku adil dan saksama kepada semua orang dan bersedia mengakui kasalahannya. Walaupun beliau seorang menteri besar, tetapi beliau tidak meletakkan dirinya sebagai seorang yang penting. Beliau masih menjadikan dirinya seperti orang lain.

Bayangkan, adakah mana-mana Menteri Besar yang makan nasib bungkus bersendirian di pejabatnya? Tetapi perkara ini berlaku kepada Nik Aziz. Satu hari saya berkunjung ke pejabatnya untuk bertanya khabar dan menyampaikan amanah Syed Hussein Alattas agar menyerahkan sebuah buku kepada beliau. Hari itu kebetulan mesyuarat Exco. Sewaktu saya sampai beliau sedang melayani wartawan. Sementara itu saya masuk ke bilik Setiausaha Khasnya dan berbual dengan Haji Ayub yang mengganti Nik Azlan yang menunaikan Haji.

Apabila lampu di bilik persidangan akhbar sudah dimatikan Encik Ayub menyuruh saya menjenguk ke bilik Tok Guru. Sebaik buka pintu bilik (pejabat)nya gelap. Saya mencari-cari di mana Tok Guru. Saya bergegas keluar dan bertanya kaki tangan, sama ada Tok Guru dah turun atau belum. Belum, dia ada di bilik, balas salah seorang kaki tangan pejabat MB. Cuba masuk ke bilik persidangan akhbar, sarannya. Saya masuk ke bilik persidangan akhbar dan tidak ada sesiapa di situ. Lampu telah dipadamkan. Saya jadi cemas, kerana mungkin gagal untuk menemuinya.

Tak ada, dah turun barangkali. Saya bergegas ke lif, dan bertanyakan jaga ditingkat bawah. Belum turun lagi, keretanya masih ada. Saya berlari semula ke tingkat atas. Salah seorang pegawai yang simpati dengan saya masuk ke bilik persidangan akhbar untuk mencari Tok Guru. Tanpa

disuruh saya mengekori dari belakang. Pegawai itu menjenguk ke satu lagi bilik (sembahyang dan mini *kitchen*, mini bar kalau di pejabat menteri) dan memberi tahu, Tok Guru ada di dalam bilik tu sedang makan. Mendengar dia sedang makan saya jadi lega dan tidak mahu menggangunya. Jauh di sudut hati saya mengurut dada dan terbetik, betapa prihatinnya Tok Guru untuk makan pun padam lampu? Betullah beliau memimpin bukan sahaja dengan kata-kata tetapi dengan perbuatan dan teladan.

YB Haji Nordin Yaakob yang telah menganggapkan Tok Guru sebagai, guru, ayah dan sahabatnya, yang ada bersama mengajak saya masuk. Marilah kita masuk, Tok Guru tak apa? Makan nasi seorang? Sapa YB Haji Nordin. Tok Guru tersenyum menyambut kedatangan kami. Beberapa detik saya terpegun melihat apa yang berlaku di hadapan saya. Saya tidak mempercayainya. Seorang Menteri Besar bersendirian di dalam bilik sedang makan nasi bungkus. Beliau agak teralat dan rasa kurang selesa dengan keadaan itu. Ini nasi kerajaan, tak leh bagi. Ini untuk menteri besar sahaja, katanya bergurau.

Tanpa ada apa-apa air dan orang menemaninya. Selamba sahaja. Melihat keadaan itu saya terbayang kepada arwah datuk yang makan bekalan selepas penat berkerja di bawah bayangan pokok di bendang padi. Begitulah humblenya Tok Guru Nik Aziz.

Dulunya selepas setiap kali mesyuarat Exco kita adakan sedikit makanan dan jamuan, tetapi hari ini kita bagi nasi bungkus sebungkus seorang, untuk menjimatkan wang kerajaan. Tanpa diminta beliau menjelaskan apa yang kami saksikan. Mungkin disebabkan terganggu dan kedatangan kami, beliau menyudahkan makannya dan melayan kami sebelum bingkas untuk mendirikan solat Zohor.

Ana mari ni kerana bawa amanat orang Tok Guru, bukan amanah tetapi kiriman, iaitu Syed Hussein Alattas minta sampai buku ini kepada Tok Guru, ujar saya. Amanahlah tu, amanah ni tidak nanti perkara besar, perkara pesanan itu pun amanahlah. Jelas Tok Guru memperbetulkan tanggapan saya.

Beliau lalu terus memberi penjelasan, soal amanah ini, agama adalah amanah Allah kepada hambanya. Amanah itu adalah paling besar dan agung kerana ia pernah diberikan kepada gunung ganang, bukit bukau tetapi ditolak. Hanya manusia sanggup menerimanya.

Saya dan YB Haji Nordin mendengar. Nah begitulah sifat Tok Guru dalam keadaan seperti itu beliau sempat menyampaikan ilmu (berdakwah). Justeru itulah kadang-kadang bila sesekali berjumpa dengannya, menjadi lama. Ada kalanya hati bersungut nak projek, tetapi bila beliau bercakap bab ilmu, semua hajat keduniaan tadi tidak tersebut. Apakah ada menteri besar lain atau menteri yang bersedia mengambil kesempatan berdakwah dalam apapun keadaan seperti MB Kelantan itu?

Keadaan seperti hari itu bukan pertama kali saya melihatnya. Sekurang-kurang sudah tiga kali saya terserempak dengan "kerendahan" dirinya itu. Pertama di rumah Kelantan di Jalan Stonor Kuala Lumpur. Beliau makan bersendirian, tanpa ada sesiapa yang melayani meskipun penjaga rumah tamu kerajaan negeri itu ada. Mengambil air minum sendiri dan menuang ke gelas sendiri. Bukan tidak ada orang, setiausaha politiknya ada, malah sudah lama selesai makan. Sepatutnya setiausaha politiknya menemani atau membantu menuang air.

Kali pertama saya melihat sifat kehambaan dan rendah dirinya itu di satu majlis di kediaman Menteri Besar JKR 10,

sepuluh tahun lalu. Kalau tidak silap majlis hari itu adalah menyambut kemenangan Pas di Kelantan. Selepas menjamu selera, masing-masing bersiap sedia untuk mendirikan solat, Asar. Yang belum mengambil wuduk bergegas ke atas rumah untuk mengambil wuduk. Dalam celah-celah orang ramai sedang berduyun ke atas untuk mengambil wuduk saya ternampak Tok Guru terbongkok sedang mengambil wuduk di tepi longkang di bawah rumah itu.

Tidak ada sesiapa bersamanya. Mungkin tidak ada yang tahu bahawa di situ ada paip. Keadaan itu langsung tidak menggambarkan dia sebagai 'tuan rumah' ataupun Menteri Besar. Beliau buka paip sendiri, pegang paip sendiri dan berwuduk seolah-olah tidak ada apa kelebihan yang ada kepadanya. Beliau tidak sedikit pun merasakan yang dia adalah MB.

Bukan setakat itu beliau juga cukup senang dan mudah untuk ditemui. Beliau boleh ditemui di mana-mana dan bila-bila masa. Tidak ada had masa baginya kecuali sembahyang dan tidur. Selebihnya adalah untuk berkhidmat dan membantu orang.

Peristiwa paling baru ialah pada pagi 2 Februari lalu. Kawan saya Nasir baru mendapat anak baru. Kembar lelaki. Dia bercadang untuk memotong jambul anaknya di Kelantan. Seperti orang lain, dia begitu ingin upacara itu dilakukan Tok Guru untuk mendapat berkat. Kebetulan Tok Guru datang ke Kuala Lumpur kerana ada majlis ceramah. Saya cadangkan agar bawa kepada Tok Guru. Mulanya Nasir keberatan kerana mungkin mengenangkan kesibukan Tok Guru.

Beliau menghubungi Pegawai Peribadi Tok Guru, (Abang Ya) agar memaklumkan kepada Tok Guru. Tanpa banyak soal Tok Guru bersedia. Dan sebelum Subuh Nasir membawa

kedua anaknya untuk disempurnakan pemotongan jambul oleh Tok Guru.

Begitulah Nik Aziz simple dan 'mudah basa'. Beliau tidak sesekali meletakkan statusnya sebagai *vip* yang sukar untuk ditemui. Beliau bersedia menerima kedatangan sesiapa saja tidak kira masa. Padahal pagi itu, beliau begitu keletihan kerana semalam memberi ceramah dan ditambah pula kesuntukan masa. Beliau kena ke airport sebelum pukul 7.30 pagi untuk pulang ke Kota Bharu. Tetapi untuk tidak menghamparkan hajat orang dipenuhi juga.

Bolehkah pemimpin Umno lakukan begitu? Menemui rakyat di Subuh hari. Rasanya jarang sekali dan kalau ada pun nak minta agar cukur kepala budak bukan saja tidak ada masa tetapi tidak tahu melakukannya. Kalau suruh baca rawi atau memimpin salawat Nabi jauh sekali!

Kembali kepada angan-angan Umno untuk tawan Kelantan, rakyat Kelantan tidak akan tertipu dengan pembentukan imej baru itu. Apa lagi orang yang berselut dan bergelumang dengan miang masih juga wujud di dalam Umno. Mereka masih lagi menjadi orang penting di dalam bahagian. Pandangan serta peranan mereka boleh diguna pakai. Langkah Umno merombak barisan kepimpinan itu tak ubah seperti melindungkan yang berselut di sebalik karpet, untuk mengabui mata rakyat. Walaupun selindung tetapi wajah mereka masih kelihatan di cermin Umno.

Mengapa tidak, sungguh pun Umno mengugurkan Annuar Musa yang dibabitkan dengan penyelewengan wang PPRT daripada jawatan Timbalan Ketua Umno, namun Annuar masih menjadi Ketua Umno Bahagian Peringat. Perlu diingat Alwi Che Amat yang dilantik menjadi Ketua Penerangan adalah timbalan kepada Annuar Musa.

Begitu juga dengan Tuan Hashim Tuan Yaacob yang

digugurkan dari jawatan setiausaha masih menjadi Ketua Umno bahagian Kubang Kerian. Ismail Mamat masih menjadi Ketua Umno bahagian Machang. Manakala Dr. Awang Adek Husin dan Mohd Nawawi Mat Jusoh (kombinasi muka baru dan lama) adalah timbalan kepada bahagian Bachok dan Tumpat. Mereka masih lagi dilindungi oleh ketua di bahagian masing-masing, Shahbudin di Bachok dan Norzaidi di Tumpat.

Maknanya orang yang dianggap berimej buruk itu masih ada dan masih laku suaranya di peringkat bahagian. Untuk membuang mereka terus dari persada Umno Kelantan sesuatu yang mustahil sebab mereka umpama Quran buruk, masih ada pengaruh di bahagian masing-masing. Bukan itu saja implikasi kalau mereka itu dilempar, ia boleh menyebabkan Umno dalam keadaan diserang balas oleh mereka. Justeru perubahan dan rombakan itu menambah rumitkan lagi kerja-kerja Umno untuk bersatu menentang Pas.

Tujuan untuk menukar imej tidak kesampaian. Orang yang celik politik boleh menyedari apa yang berlaku itu hanya sihir buta semata-mata. Sebaliknya sihir itu memberi penyakit kepada Umno. Rombakan itu benar-benar menyusahkan Umno. Mengapa tidak, kini sudah mula meletus keluhan rasa kecil hati kepada Mustapa Mohamed yang dikatakan bertanggungjawab sepenuhnya di atas rombakan itu. Mustapa di dalam mengaturkan rombakan itu dituduh mempunyai strategi untuk membina imej dan kekuatannya. Beliau sebelum ini dikatakan menghadapi masalah dengan orang-orang yang disingkirkan itu. Kemuncak penentangan ke atasnya pernah berlaku mesyuarat tidak rasmi untuk mengadakan undi tidak percaya di rumah salah seorang ketua bahagian Umno.

Kalau dulu hanya beberapa bahagian yang cemburu


dengan Mustapa, kini rasa cemburu itu ditambah dengan rasa terkilan dan merebak pula ke bahagian lain. Akui seorang Ketua Bahagian di Kelantan sekurang-kurangnya tujuh bahagian yang berkeduh hati dengan Mustapa Mohamed termasuklah bahagiannya.

Bahagian itu selain dari Bachok yang menjadi musuh tradisi Mustapa, Peringat, Kubang Kerian, Kuala Krai, Tumpat, Machang, Tanah Merah dan Pasir Mas. Rombakan itu sebenarnya memberi penyakit dan menambah penyakit kepada Mustapa. Jadi macam mana Mustapa hendak mengatasi perkara ini. Kalau tujuh bahagian tidak sukakannya, macam mana Mustafa hendak mengadakan mesyuarat Badan Perhubungan atau menjalankan aktiviti parti?

Berdasar kepada realiti inilah, keadaan Umno semakin sulit. Kesulitan itu bukan sahaja kerana tidak wujud perpaduan, tetapi rasa dendam yang berpanjangan. Dendam ini tidak akan mudah padam, atas sifat orang Kelantan; mudah panas baran, bereng, bengkeng, gedebe, ia akan berpanjangan ke dalam pilihan raya kelak.

Musibah ini tentulah membawa tuah besar kepada Pas dan keramat agung kepada Nik Aziz. Masalah dalaman Umno akan memberi kesenangan untuk Pas mempertahankan kerajaan Kelantan setidak-tidaknya untuk satu penggal lagi. Dan kemenangan itu perlu demi membolehkan Islam terus diperjuangkan dan secara peribadi pula Nik Aziz akan mencatat rekod peribadinya untuk menang kali ke empat berturut-turut.

Berdasarkan kepada hipotesis penyakit Umno itulah 'kepimpinan Umno era Pak Lah' menjadikan saya optimis Kelantan berada dalam genggaman Pas pada pilihan raya akan datang. ©



TENGKU RAZALEIGH telah mengakui Nik Aziz adalah pemimpin sebenar bagi rakyat Kelantan. Menurutnya selagi Umno tidak dapat mengemukakan tokoh setanding dengan Nik Aziz jangan mimpilah Umno nak tawan Kelantan. Pengakuan Ku Li itu samada ikhlas ataupun tidak itulah hakikatnya. Tok Guru kontroversi itu memang mempunyai pengaruh yang tinggi dalam Pas. Tidak melampau kalau dikatakan mungkin Kelantan menghadapi masalah kalau Nik Aziz tidak lagi aktif dalam Pas. Namun perkara itu tidak perlu bimbang kerana tok guru jambu itu dah berjanji akan berjuang sampai mati. Maknanya beliau akan tetap bertanding dan akan menjadi MB Kelantan. Kempunanlah Ustaz Halim nak jadi MB...



EMPAT pemimpin Umno Kelantan sudah sepakat untuk tawan Kelantan. Mustapa, Ku Li, Annuar dan Ibrahim Ali sedang memegang memorandum untuk tawan Kelantan yang diserahkan kepada rakyat Kelantan tahun 1999. Ternyata memorandum itu ditolak rakyat Kelantan. Umno berputih mata dalam pilihan raya 1999. Mungkin rakyat hilang kepercayaan kepada mereka? Macam mana rakyat boleh percaya kalau mereka sesama mereka asyik bercakaran seperti anjing dengan kucing! Selagi anjing dan kucing bercakaran selama itulah tikus lena dalam baluh (rumah padi).



Mustapa Mohamed MB Kelantan

10

UMNO Kelantan berjaya melewati satu lagi kebuntuan apabila telah sepakat menamakan Datuk Mustapa Mohamed untuk menjadi MB Kelantan sekiranya BN menang dalam pilihan raya umum akan datang. Kalau menang Mustapa akan menjadi MB Kelantan yang ke tujuh selepas merdeka. Mustapa juga akan mencatat sebagai anak kelahiran daerah Bachok yang pertama memegang jawatan Menteri Besar Kelantan.

Menteri Besar sebelum ini kebanyakan berasal dari daerah Kota Bharu dan Pasir Mas. Bachok belum dapat merasai anak buminya menjadi Menteri Besar, ataupun Timbalan Menteri Besar Kelantan.

Rasanya perlu disebutkan disini nama-nama mereka yang pernah menjadi MB Kelantan untuk perhatian umum.

Sekurang-kurangnya senarai ini boleh digunakan ataupun sebagai perpustakaan untuk media massa membuat *write-up* apabila Mustapa mengangkat sumpah menjadi MB Kelantan kelak.

MB Kelantan yang pertama ialah, Tengku Hamzah Tengku Abdul Aziz iaitu ayahanda kepada Tengku Razaleigh. Menteri Besar kedua ialah Datuk Ishak Lotfi Omar (1959-1964), Menteri Besar ketiga Datuk Mohd Asri Muda (1964-1969), Menteri Besar kempat Datuk Muhammad Nasir (1970-1978), Menteri Besar ke lima Muhammad Yaacob (1982-1990), dan Menteri Besar ke enam yang terkini dan jambu sekali ialah Datuk Nik Aziz Nik Mat (1990-200.?)

Sementara mereka yang pernah menjadi Timbalan Menteri Besar Kelantan pula ialah, Datuk Nik Abdul Rahman, Wan Ismail Wan Ibrahim, Datuk Hussein Ahmad, Ahmad Rastom Ahmad Mahir, Datuk Rozali Isohak, (TMB II) dan kini Datuk Halim Abdul Rahman. Barang kali perlu juga disebut bahawa Timbalan Menteri Besar Kelantan tidak semua akhirnya akan menjadi MB melainkan Muhammad bin Nasir. Semacam jawatan TMB ada 'sial majal tersendiri'. Ustaz Halim sangat takutkan kepada sial majal ini.

Jika dinilai ataupun diselidiki latar belakang bekas MB Kelantan ianya datang dari berbagai sudut pendidikan dan ceruk kampung. Tengku Hamzah dari golongan bangsawan kerana beliau dari kalangan kerabat di raja Kelantan. Pendidikan Tengku Hamzah ialah sekular. Datuk Ishak Lotfi Omar sebagai tokoh perniagaan dari Kota Bharu Kelantan berpendidikan Melayu dan Inggeris. Mohd Asri pula seorang pejuang Melayu, nasionalis Melayu Islam. Dari keluaraga miskin tetapi penuh dengan semangat perjuangan. Pendidikan Melayu dan sekolah agama. Kebolehan beliau yang tidak ada bandingan beliau ialah berpidato.

Datuk Muhammad Nasir seorang pegawai kerajaan berkelulusan Diploma Pertanian. Beliau pernah berkhidmat dengan Jabatan Pertanian. Manakala Muhammad Yaacob pula seorang pegawai kerajaan, bekas *majistret* berkelulusan Undang-undang di London. Latar belakang pendidikan Mat Yaacob sekular. Ia berasal dari Tanah Merah Kelantan.

Dari beberapa bekas MB itu jelaslah Nik Aziz berlainan daripada mereka. Nik Aziz berlatar belakang pendidikan pengajian Islam, pondok dan universiti. Kelulusan Syariah di Deobond India dan Al Azhar Mesir. Perwatakannya sebagai seorang ustaz dan tok guru. Ia berasal dari Pulau Melaka, Kota Bharu.

Sekiranya Mustapa Mohamed menjadi MB, Mustapa juga akan menuruti jejak Mat Yaacob dan Muhammad Nasir. Mustapa sebelum menerjunkan diri dalam politik adalah pegawai tadibr dan diplomatik. Pernah berkhidmat di Institut Tadbir Awam Negara (INTAN). Berkelulusan dalam bidang Ekonomi Kelas Pertama dari universiti di Australia. Beliau adalah anak Melayu pertama mendapat kelulusan demikian. Mustapa dibawa masuk oleh Daim Zainuddin ke dalam politik, sebagai setiausaha politiknya.

Mulanya Mustapa tidak ada minat dalam politik. Sebelum dilantik menjadi Senator tidak ada siapa mengenali Mustapa. Dari segi populariti, Ibrahim Ali atau Annuar Musa ketika itu lebih dikenali oleh rakyat Kelantan. Mustapa ketika itu dilihat sebagai budak yang membawa fail dan beg Daim Zainuddin.

Beliau seorang yang rajin dan minat bekerja. Sikap suka kerja terbawa sampai ke hari ini. Lantaran itu sesetengah orang (politik) tidak berapa suka kepadaanya sebab beliau masih mengekalkan sikap sebagai seorang pegawai. Sikap pegawai kerajaan yang mendalami dalam sesuatu perkara menjadikan ia tidak disenangi. Beliau juga bukan senang

untuk ditemui dan jika berkesempatan masanya terlalu pendek. Sikap demikian menyebabkan beliau digelar dengan berbagai gelar ataupun senikal seperti 'menteri lima minit', 'datang cepat pulang lambat, keputusan tak boleh buat', dan sebagainya.

Mustapa mula merasai seronok politik apabila dilantik menjadi Timbalan Menteri Kewangan II dan Menteri Pembangunan Usahawan. Bermula dari sinilah beliau mula belajar politik dan berpolitik. Penglibatannya dalam pilihan raya tahun 1995 meletakkan beliau belajar mengenali *alif ba tha* politik secara sistematik. Mengenali tindak tanduk politik serta kerensah dan muslihatnya. Sementara pilihan raya tahun 1999 di mana beliau tewas menjadikan beliau berpengalaman dan masak dalam dunia politik sebenarnya. Sukaduka politik baru dirasai selepas pilihan raya 1999.

Dalam pilihan raya 1999, Mustapa dikalah oleh budak 'porah' (baru) dari Pas, Apandi Mohamad. Kekalahan itu sungguh mengejutkan beliau dan orang ramai, kerana orang tidak kenali siapa dia Apandi sebelum ini. Beliau hanya seorang anak Tok Imam di Kuala Balah, yang baru pandai ikat *tie* dan pakai kot. Apandi pada mulanya budak Mustapa sendiri yang baru belajar bermiaga. Mustapa sangat kecewa dengan kekalahan itu. Kekecewaan itu ditunjuk apabila beliau bertindak menyepak kerusi di dewan pengiraan undi.

Mustapa bukan anak kelahiran Jeli. Kampung halamannya nun jauh di tepi pantai Bachok. Dalam erti kata lain harimau di Jeli tidak mengenali siapa beliau. Mustapa berasal dari Kampung Badak, Bachok Kelantan. Di belakang rumah orang tuanya terdapat pengkalan membuat budu (memproses budu). Bakal MB Kelantan itu sekampung dengan nama-nama hebat seperti Pahamin Rejab, Nordin Razak, Dr Awang Adek Husin, Annuar Musa dan lain-lain.

Adapun kenapa beliau dicampakkan ke Jeli, kononnya untuk membangun kawasan berkenaan. Sebenarnya itu adalah retorik, tetapi tujuan sebenarnya ialah untuk beliau mempunyai kawasan bertanding dalam pilihan raya. Mustapa sebelum ini tidak mempunyai kawasan dan perlantikannya sebelum itu di atas kedudukannya sebagai senator. Demi membolehkan beliau terus dilantik menjadi menteri, maka satu kawasan diberikan kepadanya.

Kebetulan pada waktu itu kawasan parlimen Jeli baru diwujudkan. Walaupun ada anak Jeli yang berminat, namun disebabkan kehendak pihak atasan, anak-anak Jeli terpaksa melepaskan kawasan itu kepada Mustapa. Bermula dari itulah nama Mustapa menjadi sinonim dengan Jeli.

Beliau adalah seorang yang *digrowth* demikian rupa untuk menjadi pemimpin Kelantan. Daimlah yang ber tanggungjawab mengubah corak hidup Mustapa dan melendekkan rambutnya sebab itulah beliau lebih bersujud tasbih kepada Daim Zainuddin. Taukeh Mustapa ialah Daim bukannya Mahathir ataupun Anwar Ibrahim.

Sebelum itu beliau hendak dibawa kawasan Bachok tempat kelahirannya. Namun orang-orang Bachok tidak bersedia untuk menerimanya. Beliau dilihat sebagai bidan terjun ataupun tokoh yang dinaikkan bukan dari bawah. Ahmad Sahabuddin, Ketua Umno Bahagian Bachok, yang ada bau-bau bacang dengannya tidak menerima beliau. Sahabuddin tidak bersedia untuk mengorbankan kerusi bagi diberikan kepada Mustapa. Sahabudin sendiri berambisis untuk menjadi ketua. Gara-gara itu beliau terpaksa dihantar meneroka kawasan baru di Jeli. Kedatangan Mustapa ke Jeli seperti peneroka tanah haram kerajaan.

Mustapa memang dapat membangun Jeli. Sebelum ini apa yang ada di Jeli ialah harimau, sungai, dan hutan. Tetapi

selepas Mustapa bertapak kira-kira 10 tahun di sana, Jeli sudah bertukar wajah menjadi sebuah bandar baru. Dengan lambakan projek mengila-gila sungai sudah berganti jambatan, hutan bertukar menjadi padang, dan binatang terpaksa mengungsi ke tempat baru.

Segala kemudahan asas, sekolah, klinik, telefon, bank, jalan raya dibangunkan. Setengah pembangunan yang dibawa ke Jeli tidak tahu digunakan oleh penduduk Jeli kerana ia terlalu canggih. Pekan sempadan di Jeli iaitu Bukit Bunga khabar sedang dalam proses untuk dijadikan kawasan kedai bebas cukai (*duty free area*). Pembangunan paling bererti ialah dalam aspek pendidikan di mana sebuah Maktab Rendah Sains Mara dibina di Jeli. Tanpa ada Mustapa belum tentu maktab tersebut wujud.

Kepesatan pembangunan yang dibawa Mustapa itulah menyebabkan harimau, babi, anjing, landak, pelanduk, kijang dan segala warga binatang hutan merasakan diri mereka terancam. Paling ketara ialah kumpulan harimau yang merasakan Mustapa ingin merampas kawasannya. Sebagai tindak balas harimau bertindak membaham penduduk kampung. Sehingga kini sudah lebih 10 kejadian penduduk dibaham harimau di Jeli termasuk ada yang maut.

Dari segi puak ataupun klik di dalam Umno di Kelantan, Mustapa tidak memihak ataupun dicap kepada mana-mana pihak, beliau bersendirian. Beliau tidak termasuk dalam klik Tengku Razaleigh Hamzah ataupun sehaluan dengan Annuar Musa. Beliau cuba mengasingkan dari Ku Li. Pernah satu ketika Ku Li merungut beliaulah yang membantu memberi biasiswa kepada Mustapa semasa Mustapa menuntut di Australia.

Apabila beliau dilantik menjadi Menteri Kewangan II, Mustapa nampak berjinak dengan Anwar. Beliau

mengundang Anwar hadir di Jeli dan berkempen di sana. Apabila Anwar disingkir beliau terus menyembunyikan diri dan menafikan yang beliau dari kumpulan Anwar. Untuk memberi gambaran yang beliau tidak sebulu dengan Anwar beberapa kenyataan dikeluarkan yang menyakiti telinga Anwar.

Di kalangan ketua bahagian tidak ada yang erat dan baik dengannya. Bukan beliau mengamalkan sikap seteru, tetapi keistimewaan yang diperolehinya menyebabkan ketua bahagian cemburu. Beliau dianggap tidak tahu berpolitik kerana tidak tahu mencatur dan bergiat untuk jatuh menjatuh, apa yang beliau tahu ialah berkerja dan berkhidmat kepada rakyat.

Kini Umno Kelantan telah menamakan beliau sebagai bakal MB. Pujian tinggi patut diberikan kepada Umno. Persepakatan untuk mengangkat Mustapa menjadi MB Kelantan adalah kena pada tempatnya. Pemilihan Mustapa adalah sangat sesuai dan serasi dengan orangnya. Dan sekaligus ia menyelesaikan masalah perebutan dalam Umno.

Sebelum ini macam-macam nama disebutkan bakal menjadi MB Kelantan. Masing-masing sudah berangan. Datuk Zainal Abidin Kadir yang kalah di DUN Melor pernah merasakan dia akan dilantik menjadi MB Kelantan, kononnya dia dikira tokoh berpendidikan agama dan mampu untuk menyaingi pengaruh dan kekeramatanku Nik Aziz. Bekas Pengarah Pusat Islam itu juga dikatakan sengaja dibawa balik dari KL ke Kelantan.

Selain dari itu, Ibrahim Ali juga merasakan dia berkelayakan untuk menjadi MB. Ibrahim dikatakan beralih angin untuk menjadi MB apabila menyedari dia tidak akan menang di parlimen Pasir Mas. Ada ura-ura mengatakan beliau akan bertanding di Tendung ataupun Pengkalan Pasir.

Lain-lain nama yang terfikir akan menjadi MB, Rozali Isolehak bekas TMB II. Para pengikut Ku Li dan bekas Semangat 46 mengharapkan Rozali akan menjadi MB sekiranya Umno menang dalam tahun 1999. Sebelum nama Mustapa diangkat menjadi MB, Che Alwi Che Amat juga, disebut sebagai calon MB Kelantan. Nama Alwi disebut memandangkan beliau mempunyai hubungan rapat dengan bakal PM Malaysia Abdullah Badawi. Alwi juga dikatakan akan menggantikan Annuar Musa di Peringat?

Setelah Umno sepakat memilih Mustapa, perebutan itu tidak berlaku lagi. Semua menyokong. Seorang demi seorang tampil memberi ikrar menyokong Mustapa sebagai MB. Annuar Musa menjadi orang pertama menyatakan ikrar kepada Mustapa diikuti oleh Zaid Ibrahim, Ibrahim Ali dan lain-lain. Pemimpin veteran yang sudah mengantuk, Hussein Ahmad dan Muhammad Yaacob juga dilaporkan menyokong penuh. Sokongan dan ikrar itu tidak mengejutkan, ia adalah sebahagian daripada elemen propaganda sahaja. Belum tentu yang menyokong itu ikhlas atau sebaliknya, sokong membawa rebah.

Apa paling mengejutkan apabila Sultan Kelantan juga turut memberi semangat diatas pemilihan Mustapa itu. Selang beberapa hari selepas Umno Kelantan mengisyiharkan Mustapa sebagai bakal MB Kelantan, Sultan dan Raja Perempuan telah mencemar duli untuk santap di rumah Mustapa di Kuala Lumpur. Keberangkatan Sultan dan Raja Perempuan itu memberi satu imej yang cukup hebat kepada Mustapa. Sekurang-kurangnya membuktikan bahawa semua golongan di Kelantan telah menerima beliau menjadi MB termasuk istana.

Hebat Datuk Pa! Apa yang berlaku ke atasnya tidak pernah belaku ke atas calon dan bakal MB sebelum ini. Nik Aziz

yang dianggap sebagai MB bertaraf waliyullah itu sendiri kalah dan tidak dapat lawan apa yang diperolehi Datuk Pa. Menjelang tahun 1990 dahulu, waktu Pas dan Angkatan Perpaduan Ummah (APU) di ambang kemenangan, tidak ada sesiapa pun dari istana yang mengunjungi rumah Nik Aziz untuk memberi semangat. Cuma selepas Nik Aziz menjadi MB barulah anak-anak sultan pergi bersembahyang terawih dengan Nik Aziz di Pulau Melaka.

Tetapi dalam kes Datuk Pa ini Umno Kelantan belum menang lagi, tetapi Sultan sudah mencemar duli mengunjungi rumah beliau di Kuala Lumpur. Semasa hari raya lalu, Tengku Mahkota dan adindanya juga turut mengunjungi dan berhari raya di rumah Mustapa. Hebat!

Apa keramat dan maunah yang dimiliki Datuk Pa sampai Sultan dan Raja Perempuan awal-awal lagi sudah mengunjunginya. Sekiranya Mustapa tidak mempunyai apa-apa keramat atau cenuai atau minyak pengasih Sultan dan Raja Perempuan tidak mungkin ke rumahnya dan bersantap di sana. Apa yang berlaku itu tidak pernah berlaku sebelum ini. Bolehkah dianggap kejadian ajaib itu sebagai tanda jelas yang Mustapa akan benar-benar menjadi MB Kelantan. Khabarnya majlis makan malam di rumah Mustapa malam itu tak ubah seperti majlis meraikan perlantikan beliau menjadi MB Kelantan.

Seperti dinyatakan di atas tadi, penamaan Mustapa itu boleh mereda dan menenangkan Umno Kelantan. Setidak-tidaknya Umno telah meletakkan awal-awal orang yang bakal memimpin Kelantan dan langkah itu bagi mengelakkan perebutan. Penamaan Mustapa sebagai MB sebagai formula untuk mengelakkan perebutan. Orang-orang yang sebelum ini merasakan diri lebih layak berbanding dengan Mustapa terutamanya dari segi komitmen dan perjuangan tidak lagi

berangan-angan untuk menjadi MB.

Kebaikan lain apa bila Umno menamakan Mustapa sebagai MB, rakyat Kelantan tidak susah payah lagi untuk mencari siapa dia wakil di pihak Umno. Mereka yang sebelum ini merasakan layak tentulah mengendurkan sedikit usaha mereka. Dalam pada ini apakah ia tidak memberi kesan lain kepada Umno? Misalnya, apabila mereka yang sebelum ini berangan sudah merasakan mereka terlepas peluang menjadi MB mereka akan memperlakukan usaha mereka. Lebih dibimbangkan akan berlaku sabotaj kepada Mustapa?

Di sebalik kebaikan ada juga keburukan di sebalik strategi itu. Pihak Pas tentu akan mencari seberapa banyak kelemahan Mustapa. Mereka akan menggali dan mem bongkar apa-apa kesalahan ataupun kesilapan Mustapa selama ini termasuklah kelemahan atau kesilapan adik beradiknya. Sebagai manusia Mustapa tidak maksum dan tentu banyak kesalahan dan kelemahan yang boleh dieksplorasikan. Kalau Nik Aziz sebagai ustaz dan tok guru pun boleh dipermainkan, diinjak-injakkan, apa lagi Mustapa Mohamed.

Bagi rakyat Kelantan hari ini, mereka tidak perlu bersusah untuk mencari siapa yang bakal menjadi MB Kelantan. Di pihak PAS sendiri nampaknya Nik Aziz akan terus menjadi MB. Pengakuan Nik Aziz akan bertanding (berjuang) sampai mati meletakkan bahawa beliaulah bakal MB seterusnya. Kenyataan itu menyebabkan Datuk (Ustaz) Abdul Halim Rahman tidak boleh bermimpi untuk menjadi MB selepas pilihanraya akan datang.

Satu segi pemilihan Mustapa dan pengakuan Nik Aziz memudahkan rakyat Kelantan membuat perbandingan di antara kedua mereka. Kebetulan keduanya sudah mempunyai *track rekod* masing-masing. Mustapa sebagai

bekas Menteri Kewangan dan selaku Pengarah MTEN, manakala Nik Aziz selaku MB selama 12 tahun. *Track rekod* ataupun kedudukan itu membolehkan rakyat membuat penilaian jitu.

Perbandingan ini adalah penting untuk masa depan Kelantan. Keduanya ada kekurangan dan keistimewaan tersendiri. Kalau rakyat Kelantan mahu Kelantan kekal dengan keadaan sekarang ini, maka Nik Azizlah yang mereka harus pilih sebagai pemimpin. Namun sekiranya rakyat Kelantan mahukan kepada pembangunan, jalan raya, sekolah, dan sebagainya maka Mustapalah orangnya. Tidak dinafikan kalau Mustapa menjadi MB, Kelantan akan limpah dengan pembangunan. Namun masalah sosial dan segala macam penyakit dunia yang menimpa di negeri-negeri maju akan turut merebak ke Kelantan. Mustapa akan membawa pembangunan dunia, dan Nik Aziz terus menimbunkan pembangunan akhirat.

Saya tidak mahu mempertikaikan soal pemilihan berasaskan kepada landasan ataupun subjek yang saya sebutkan itu. Ianya pada saya sama-sama penting dan soal prioriti terletak kepada diri masing-masing. Sebaliknya apa yang hendak saya cuba analisa di sini ialah apakah Umno mempunyai peluang untuk menang dalam pilihan raya akan datang bagi memungkinkan Mustapa bergelar YAB.

Dalam bab sebelum ini saya menegaskan Kelantan berada dalam genggaman Pas. Perkembangan didalam Umno selepas berlaku penyusunan semula badan perhubungan Umno pada awal Januari lalu tidak banyak mengubah kedudukan Umno serta perhatian rakyat kepada Umno. Perubahan itu tidak berapa menarik atau mengusik ilusi rakyat Kelantan. Berbanding dengan pemilihan Mustapa, pemilihan Mustafa lebih mengusik jiwa rakyat.

Jika keadaan sebelum ini kekal, maka harapan Umno untuk memerintah di Kelantan bukan mudah. Isu-isu pembangunan yang bakal dibawa oleh Umno tidak akan dimakan oleh rakyat Kelantan. Isu Kelantan miskin adalah isu yang tidak menyentuh hati dan jiwa rakyat Kelantan sebaliknya melukai dan menghina mereka. Bagi rakyat Kelantan mereka sudah redha berada dalam kemiskinan seperti yang ada hari ini. Sebab secara jelas kemiskinan itu tidak membawa kepada kepapaan dan kemiskinan yang dibencikan oleh agama mereka.

Sikap rakyat Kelantan tidak hipokrit, bermegah dan merendah diri menyebabkan persekitaran negeri itu yang ada hari ini sesuai dengan jiwa mereka. Bagi mereka kemewahan bukan sesuatu yang dikehjarnya, sebaliknya kesenangan serta hidup di atas sifat *qanaah*. Didikan dan ajaran Islamlah menjadikan mereka berpegangan begitu.

Lantaran itu kalau isu kemiskinan dan isu projek dimainkan, rakyat Kelantan tidak akan berubah. Orang Kelantan sendiri menyedari apa sebenarnya yang dialaminya. Memang betul kalau pada mata orang luar melihat Kelantan dikaca tv dan dada akhbar sangatlah dhaif, namun hakikatnya tidak seperti yang digambarkan itu. Apa lagi tv sering kali memesongkan cameranya daripada memfokuskan kepada subjek sebenar.

Harus disedari orang Kelantan ialah pengembara. Mereka adalah anak buah Marco Polo dan Ibnu Batutah. Mereka mengembara ke seluruh Malaysia. Dan dalam pengembaraan itu mereka dapat melihat sendiri apa yang wujud di negeri yang diperintah oleh BN dan membandingkan kehidupan rakyat negeri itu dengan mereka. Apa yang jelasnya ialah mengenai tempat kediaman, di mana apa yang ada di Kelantan jauh lebih lapang, indah, cantik daripada rumah-

rumah di negeri yang didakwa maju dan jaya.

Pendeknya isu kemiskinan tidak diterima rakyat. Umno kena mencari isu-isu lain yang lebih relevan dan menyentuh hati nurani rakyat Kelantan sekiranya mereka mahukan perubahan sikap rakyat Kelantan menjelang pilihan raya akan datang.

Sekurang-kurang ada beberapa faktor menyebabkan Umno sulit untuk menang di Kelantan. Antaranya ialah mereka gagal untuk memburukan imej Nik Aziz sebagai MB dan Tok Guru. Walaupun mereka telah berusaha namun hasilnya belum memuaskan lagi. Orang Pas, dan orang atas pagar belum marah atau bosan dengan Nik Aziz. Apa yang berlaku hari ini adalah orang-orang Umno yang marah dan menimbulkan rasa tidak senang. Keadaan itu tidak pelik kerana sejak dari dalam perut mak mereka lagi mereka mencemuh Nik Aziz.

Selain itu Umno juga gagal untuk menunjukkan kelemahan Nik Aziz sebagai seorang pemimpin. Masalah ketiadaan projek tidak boleh dijadikan hujah sebab rakyat tahu perkara itu berlaku kerana ada sekatan dan sabotaj oleh kerajaan Pusat. Rakyat menyedari Nik Aziz bukan anti projek, tetapi keadaan yang menghalangnya. Kewujudan beberapa projek di Kelantan yang tidak melibatkan kerajaan Pusat menunjukkan Nik Aziz mesra projek. Bila-bila masa jika ada tawaran projek Nik Aziz bersedia untuk berkerjasama.

Kekuatan yang ada kepada Nik Aziz ialah sifat zuhud dan rendah dirinya. Sikap ini cukup menawan rakyat Kelantan. Kerendahan dirinya (*tasamuh*) ialah apabila beliau bersedia mengakui kesilapannya. Jarang pemimpin sanggup mengakui kesilapannya kerana kononnya untuk menjaga maruah. Bagi rakyat Kelantan yang arif mengenali Islam, sifat yang ditunjuki Nik Aziz itulah yang mereka inginkan.

Itulah beberapa faktor atau stigma yang sukar dihakiskan oleh Umno. Saya yakin selagi perkara ini tidak dibereskan, maka peluang untuk Umno menawan Kelantan amat 'rohok' (sukar) sekali. Dan kalaularah masalah ini tidak dapat diatasi, apakah maksud (motif) Umno mengangkat Mustapa sebagai MB Kelantan itu seperti tindakan orang mencurah air di tempayan apabila mendengar guruh di langit? Ataupun cara Umno mengendorsekan Mustapa demikian untuk memalukan Mustapa? Tanpa beliau sedari pakatan agar beliau menjadi MB itu sebahagian daripada taktik halus untuk membunuh karier politiknya! ©



DI AWAL pemerintahan kerajaan Pas (APU) dulu Tengku Mahkota Kelantan dan adikndanya sering kali berkesempatan mendirikan solat dengan berimankan kepada Tok Guru Nik Aziz. Malahan beliau bersama adik-adiknya juga pernah bersembahyang tarawih bersama Nik Aziz di Pulau Melaka. Rakyat Kelantan merasa seronok dan sejuk jiwa apabila melihat anak raja bersembahyang dengan ulama kampung! Di masa itu terserlahnya hubungan akrab di antara umara dengan ulamak. Namun hari ini panorama indah itu sudah tidak ada lagi. Jarang benar untuk melihat Nik Aziz dan anak raja mendirikan solat seperti dulu.



BAKAL Menteri Besar Kelantan YAB Datuk Mustapa Mohamed mengiringi baginda Al Sultan Kelantan berangkat masuk ke rumahnya untuk majlis santapan di raja bersama orang-orang kenamaan, korporat-korporat dan orang-orang besar lain baru-baru ini. Khabarnya semua orang besar Kelantan turut hadir kecuali orang besar di Pasir Mas, Ibrahim Ali. Kesudian Sultan Kelantan mencemar duli ke rumah Mustapa dilihat sebagai satu penghormatan kepada Mustapa dan kempen membantu Mustapa untuk menjadi MB Kelantan. Mungkin kempen sebegini tidak mencukupi, baginda hendaklah turun sama ke Jeli dalam pilihan kelak. Semua orang besar Kelantan kena berkerja kuat untuk kemenangan Mustapa. Janganlah pula nanti air di tempayan dicurah kerana mendengar guruh dilangit, ataupun perumpamaan ayam terlepas, tangan berporah (terkena) dengan tahi!



Bila pilihan raya umum ke 11?

10

DALAM kekalutan orang-orang politik membuat congak dan perhitungan bilakah pilihanraya umum ke 11 akan diadakan, tiba-tiba Dr Mahathir Mohamad membuat penjelasan bahawa pilihan raya tidak akan diadakan sebelum Oktober. Maksudnya sebelum beliau berundur tidak ada pilihan raya. Selepas selesai mementaskan sandiwara pada perhimpunan agung Umno tahun lalu, beliau berjanji akan berundur selepas Oktober tahun ini. Penjelasan itu memberi gambaran bahawa beliau tidak akan melibatkan diri dalam pilihan raya umum ke 11 kelak.

Pada masa lain Mahathir menegaskan bahawa penggantinya Datuk Seri Abdullah Badawi akan mengepalai pilihan raya umum akan datang. Pak Lah akan bertanggungjawab mengatur jentera pilihan raya Barisan Nasional, termasuklah

juga menentukan calon-calon daripada Umno. Memanglah tanggungjawab dan kuasa penuh itu perlu diserahkan kepada Pak Lah sebab selepas ini beliau akan mengganti tempat Mahathir? Kenyataan dan penjelasan Dr Mahathir itu disambut dengan perasaan berbelah bagi oleh Pak Lah?

Sebenarnya Dr Mahathir tidak payah membuat perlepasan demikian. Tradisi politik di dalam Umno berkehendakkan begitu. Adalah sesuatu yang ganjal kalau Pak Lah yang diberikan perlepasan untuk mengambil alih jawatan Perdana Menteri tetapi kuasa-kuasa menentukan kerjayanya disekat atau diuruskan oleh orang lain. Lainlah kalau Mahathir ber cadang untuk menjadi penasihat politik kepada kerajaan Pak Lah kelak seperti mana berlaku kepada Lee Kuan Yew di negeri dahaga air—Singapura.

Sekali dengar pengakuan Dr Mahathir itu – bahawa tidak ada pilihan raya sebelum Oktober melegakan sedikit perhatian umum, tetapi hakikatnya ia tidak melegakan orang-orang berkenaan, (Pak Lah sendiri) dan sesiapa yang arif dan makrifat dengan politik Dr Mahathir Mohamad. Apakah penegasan beliau itu boleh dipercayai? Ada orang berpendapat Dr Mahathir bercakap benar kali ini! (Hanya untuk sekali ini?) Pun begitu berbagai spekulasi dan tanda tanya tentang itu tetap juga timbul dan menjadi buah mulut orang ramai.

Penegasan Mahathir itu tidak akan menenangkan keadaan dan boleh memberi kelegaan kepada orang ramai selamanya. Kerana sumpah dan janji Mahathir boleh berubah mengikut keadaan semasa.

Pemangku Presiden Pas Datuk Seri Abdul Hadi Awang siang-siang lagi menyangkal penegasan Mahathir itu. Menurut Menteri Besar Terengganu itu pilihan raya umum tetap diadakan tahun ini. Justeru parti Pas menurutnya sudah

bersiap sedia untuk menghadapi kemungkinan itu pada bila-bila masa. Bagi Hadi beliau tentu ada petanda dan bukti tersendiri untuk meyakininya.

Selain daripada mungkin Hadi sudah arif dengan politik Mahathir, perkembangan semasa juga menunjukkan bahawa BN dalam keadaan rancak membuat persiapan untuk mengadakan pilihan raya umum. Malahan semakin hari semakin rancak. Di antara tanda-tanda besar hampirnya sesuatu pilihan raya umum apabila media masa, radio dan televisyen serta akhbar gajah tidak habis-habis membalun parti pembangkang.

Bukan sahaja Hadi ramai pemerhati politik tidak begitu yakin dengan kenyataan Mahathir itu. Ia tidak terbatas kepada pemimpin pembangkang tetapi di kalangan Umno sendiri tidak berapa percaya dengan kenyataan itu. Bagi pembangkang, kenyataan Mahathir itu sebagai perangkap. Mahathir berkata demikian untuk merelekskan pembangkang agar memperlakukan persiapan untuk menghadapi pilihan raya. Kenyataan itu sebagai taktik untuk melenakan pembangkang, sementara dalam masa yang sama mereka (Umno) terus membuat persiapan rapi.

Sesuatu yang perlu diingat pilihan raya di era Mahathir kerap berlaku dalam keadaan suspen – tidak diduga oleh umum. Dalam era Mahathir sudah empat kali pilihan raya diadakan. Para peramal politik juga menjadi gila dengan telatah Dr Mahathir. Misalnya pilihan raya umum tahun 1990 diadakan pada musim Haji, di mana tidak sesiapa pun menjangkakannya kerana pada masa itu kira-kira 60,000 rakyat Malaysia sedang menunaikan rukun Islam ke lima di Mekah. Hak mengundi dan tanggungjawab 60,000 itu kepada negara dinafikan sama sekali oleh Mahathir. Demikian juga dengan tempoh berkempen di zaman Mahathir begitu

pendek, pernah terjadi tempoh berkempen tidak sampai 10 hari.

Sejarah dan pengalaman itu menjadikan orang bertanya-tanya mengenai tarikh sebenar pilihan raya. Mahathir boleh melakukan apa sahaja yang disukainya. Tidak ada siapa yang berani membantahnya. Kalaupun ada yang cuba membantah ia tidak dipedulikan. Apabila beliau memikirkan sesuatu masa atau tempoh itu memberi kelebihan kepada partinya, beliau akan mengumumkan tarikh pilihan raya meskipun di dalam keadaan apa sekali pun termasuk menodai prinsip demokrasi.

Soal menetapkan tarikh pilihan raya sudah tidak demokratik lagi. Berlainan di zaman Tunku Abdul Rahman. Tunku dikatakan lebih *gentleman* berbanding dengan Dr Mahathir yang digembar-gemburkan hebat. Untuk membuktikan beliau berani Tunku meletakkan jawatan sebagai Perdana Menteri dan berkempen atas kapasitinya sebagai Presiden Umno untuk menghadapi pilihan raya. Penggunaan jentera kerajaan di zaman Tunku juga terbatas tidak seperti di era orang berwawasan ini. Tunku juga tidak menggunakan kedudukan nya selaku Perdana Menteri untuk mengabui mata rakyat. Tempoh berkempen juga panjang melebihi sebulan. Rakyat mempunyai banyak masa untuk membuat penilaian ke atas parti-parti politik. Dalam erti kata lain rakyat tidak disempitkan oleh masa.

Selain itu ada beberapa hujah atau alasan yang membolehkan kita meragui akan kenyataan Mahathir itu. Pertamanya perkembangan semasa. Peranan media yang umum sudah ketahui berpihak dan membantu Mahathir dan BN, semakin lunatik menghentam pembangkang. Serangan peribadi ke atas Hadi Awang serta kelemahan kerajaan pimpinannya adalah petanda paling jelas ke arah pengumuman pembubaran parlimen semakin hampir.

Isu pemberian wang zakat kepada anak salah seorang Exco di Terengganu serta laporan dan ulasan pemergian Haji Hadi ke persidangan di Sulawesi, Indonesia dua tahun lalu adalah di antara senjata ampuh BN untuk memburukkan imej Haji Hadi dan Pas. Isu zakat diperbesarkan seolah-olah kerajaan Terengganu telah melakukan *corruption* besar. Media mungkin terlupa apa yang pernah dilakukan oleh Jabatan Agama Islam Wilayah Persekutuan Kuala Lumpur yang telah menyalahgunakan wang zakat untuk melabur di pasaran saham? Jumlah yang terbabit jauh lebih besar daripada apa yang berlaku di Terengganu, dimana nilainya jutaan ringgit. Kenapa skandal itu tidak dibongkar? Apakah kerana ia melibatkan menteri Umno maka ia halal dan media kehabisan ruang untuk melaporkannya? Bukankah itu tindakan *double standard*?

Sebelum ini media menggodam Kelantan dengan projek "Kelantan Dalam Gerhana". Tindakan ini adalah di antara kegiatan-kegiatan yang sengaja direka untuk meghadapi pilihan raya. Media memberi gambaran seolah-olah rakyat negeri Kelantan berada dalam keadaan dhaif dan sangsara. Sekali lagi dalam hal ini Radio Televisyen Malaysia (RTM) bersikap kelabu mata. Zainuddin Maidin yang diberi tanggungjawab sepenuhnya untuk mengendalikan RTM bersikap kuman diseberang laut nampak, gajah di hadapan mata terlindung.

Selain itu perkembangan dari dalam diri Mahathir sendiri, menjelaskan ada tanda-tanda bahawa beliau keberatan untuk berundur pada Oktober ini. Apabila beliau tidak berundur, ini bermakna pilihan raya tidak mustahil akan di adakan sebelum Oktober. Akan ada nanti desakan agar Mahathir terus memimpin Malaysia. Desakan itu memberi hujah kepada kita untuk membuat spekulasi pilihan raya umum diadakan pada

Oktober atau sebelum dan tidak akan melompat ke tahun hadapan.

Ulasan Mahathir mengenai cadangan supaya perhimpunan agung diadakan pada Oktober sempena bulan pengundurannya merupakan tanda-tanda jelas yang beliau kemungkinan tidak akan jadi berundur. Ada kalangan Umno mencadang perhimpunan agung diadakan pada bulan Oktober. Dr Mahathir membantah dan mengatakan persidangan tetap mengikut jadual iaitu pada bulan Jun. Mengapa Mahathir tidak setuju perhimpunan diadakan pada bulan Oktober? Mahathir sudah boleh membaca kalau perhimpunan diadakan pada bulan Oktober ini bermakna beliau kena berhenti juga pada bulan itu kerana Umno telah membuat persiapan untuk persaraannya.

Apabila beliau mahukan perhimpunan diadakan pada Jun, beliau masih berharap ada desakan atau permintaan agar beliau meneruskan kepimpinannya beberapa tempoh lagi. Setidak-tidaknya selepas beliau habis memegang jawatan Pengerusi NAM iaitu selama tiga tahun. Dr Mahathir mempunyai tugas dan agenda yang masih belum selesai. Beliau boleh menjadikan jawatan Pengerusi NAM sebagai alasan untuk tidak melepaskan jawatan pada Oktober ini. Soal *locus standi* misalnya. Macam mana Mahathir boleh terus menjadi penggerusi sedang beliau tidak mempunyai *locus standi*, tidak menjadi PM?

Ada cerita-cerita tersebar mengatakan Mahathir tidak yakin kepada Pak Lah, maka beliau tidak mahu disegerakan pilihan raya bimbang BN kalah. Sama ada cerita ini suatu perang saraf di kalangan yang berkepentingan, tidak menjadi soal, yang penting hasil daripada perang saraf ini ia akan membolehkan Mahathir kekal sebagai PM.

Sebenarnya tanpa perlu merayu atau bersandiwara Dr

Mahathir masih diingini menjadi PM oleh segolongan yang tidak sebulu dengan Pak Lah. Golongan ini merasakan peluang dan harapan mereka untuk melangkaui Pak Lah akan terbuka kalau Mahathir melanjutkan tempoh pengundurannya. Tempoh itu boleh digunakan untuk mengemasukan kedudukan dan mengumpulkan seberapa banyak tentera.

Yang menjadi tanda tanya kini, ialah bilakah pilihan raya umum akan diadakan? Umno telah menangguhkan agenda pemilihan pemimpin pada tahun ini. Awal-awal lagi umum melihat penangguhan itu memberi *signal* jelas, bahawa Umno sedang bersiap sedia untuk hadapi pilihan raya. Penangguhan itu dibuat untuk mengelakkan perpecahan. Sementara Umno sangat perlukan perpaduan sesama mereka bagi menghadapi pilihannya raya dan seterusnya bagi menjamin dapat membentuk kerajaan sekali lagi.

Timbul juga macam mana dengan Pak Lah. Apakah Pak Lah tidak akan kecewa sekiranya Mahathir terus menjadi PM? Dalam soal ini sandiwara boleh dilakukan oleh Mahathir. Untuk memungkiri janji itu bukan satu perkara payah. Mahathir boleh bisikan kepada umum bahawa, kononnya Pak Lah masih mahukannya lagi sekurang-kurang selepas selesai pilihanraya. Kalau Mahathir berbuat begitu Pak Lah tidak boleh berkata apa-apa. Apa lagi Pak Lah sendiri sangat mengharapkan peralihan kuasa kepadanya itu dilakukan selepsa pilihanraya.

Sekiranya Mahathir benar tidak berhajat untuk berhenti selepas Oktober ini, ini bermakna pilihan raya tidak diadakan pada tahun ini. Dr Mahathir boleh menjadikan sebagai alasan kerana hendak bantu Pak Lah.

Pak Lah sendiri seolah tidak yakin dengan keupayaan dan kredibilitinya untuk menghadapi pembangkang secara bersendirian. Lagi pun sekiranya pilihan raya ini memberi

kesan buruk kepada BN biarlah ianya ditanggungjawab bersama dengan Mahathir. Lantaran itu Pak Lah begitu berhajat untuk mengambil alih selepas BN mendapat mandat baru dari rakyat. Untuk merealisasikan ini Mahathir hendaklah mengepalai pilihan raya umum buat kali terakhir.

Kalau Pak Lah membuat perhitungan begitu sekali lagi perhitungan Pak Lah itu salah. Kalau beliau beranggapan peralihan kuasa akan berlaku selepas pilihan raya, sebenarnya andaian itu boleh menjelaskannya. Apakah tidak terfikir oleh Pak Lah kemenangan gemilang BN nanti akan digunakan oleh Mahathir untuk terus menjadi PM. Mahathir akan menjadikan kemenangan itu sebagai alasan bagi mengakui yang sokongan kepadanya masih kuat. Apakah Dr Mahathir bersedia untuk menyerahkan rumah yang *fully finish* kepada Pak Lah?

Dari sudut lain sekiranya hipotesis ini diterima pakai, ini bermakna pilihan raya umum tidak akan diadakan sebelum atau Oktober ini. Apa yang dapat disimpulkan sekiranya pilihan raya tetap diadakan sebelum Oktober, ini bererti Mahathir tidak akan berundur. Beliau akan bertanding sekali lagi sebagai penghabisan. Sebaliknya kalau pilihan raya diadakan selepas Oktober ini dan melewati sampai ke tahun hadapan, maka sahlah Dr Mahathir akan mengundurkan diri seperti mana yang dijadualkan.

Tarikh pilihanraya ke 11 kemungkinan besar di antara bulan Februari atau April 2004 dan ia tidak akan lajuk sampai bulan Jun hingga September kerana waktu itu Umno akan mengadakan perhimpunan untuk memilih pemimpin. - ©

Rencana ini diubah suai dari rencana asal disiarkan dalam Intisari, April 2003.



Mengapa Lutfi Menyalak Bukit?

12

SEBENARNYA tidak diketahui di mana puncanya menyebabkan Ahmad Lutfi Othman 'menjadi sasau' menyerang Menteri Besar Selangor Dr Mohd Khir Toyo. Tiba-tiba sahaja Lutfi seperti dirasuk hantu 'membelasah' Khir Toyo dengan mendedahkan penyelewengan dan rasuah Menteri Besar yang paling muda itu. Apakah sebab sebenar Lutfi jadi demikian? Apakah beliau mempunyai masalah peribadi dengan Khir Toyo maka beliau bertindak demikian? Serangan Lutfi ke atas Khir Toyo bukan main-main. Ia bukan setakat mahu memberi *warning* kepada Khir Toyo. Kerja Lutfi bukan melepas batuk di tangga, tetapi kerja yang serius. Melihat kepada gayanya ia seperti mahu Khir Toyo bungkus dari menjadi Menteri Besar Selangor.

Kerja Lutfi berterusan sehingga sudah sampai setahun.

Lutfi sudah menjadi satu institusi memantau dan mengkoreksi pentadbiran Khir Toyo! Saya mengikuti 'perang' di antara Lutfi dengan Khir Toyo dari jauh dengan penuh prihatin. Mulanya saya tidak mahu mencampuri urusan beliau. Justeru walaupun beberapa kali saya menemui beliau, tidak pernah terbetik di hati untuk mengajukan pertanyaan kenapa beliau bersengketa dengan Khir Toyo? Walaupun beliau ada maklumat yang buruk tentang Khir Toyo, tetapi tentu ada 'instinct' lain lagi.

Selaku kawan seprofesional dengan beliau (sebagai penulis), saya memberi ransangan kepada beliau. Pendedahan yang beliau lakukan itu sesuatu yang suci. Saya memberi semangat dan sokongan moral. Sesiapa pun yang mencintai kebenaran dan keadilan bersetuju dengan tindakan Lutfi. Mereka yang jijik dengan rasuah dan penyelewengan akan menyokong Lutfi seratus peratus. Menjadi tanggung jawab dan tugas penulis mendedahkan apa juga penyelewengan, waima dilakukan sesiapa sahaja.

Sebagai penulis bebas yang tidak terikat dengan mana-mana individu ataupun harakah, pendedahan seperti dilakukan Lutfi ke atas Khir Toyo itu satu tanggungjawab sosial yang tidak mengenal kawan dan lawan bila mereka bersalah. Lantaran itu kami (penulis) sukar difahami oleh orang ramai. Ada kalanya kami memuji orang-orang tertentu dan ada kalanya menghentam sampai mereka tidak sempat hendak bernafas. Apabila Lutfi mengambil risiko menyusahkan Khir Toyo maka beliau tentu ada hujah tersendiri.

Lutfi mesti mempunyai bukti dan maklumat yang kukuh, yang boleh dipertanggungjawabkan. Kalau beliau tidak memiliki itu semua saya tidak fikir Lutfi merelakan dirinya untuk dihadap ke mahkamah oleh Khir Toyo. Berhadapan dengan mahkamah sedap didengar, tetapi cukup meresah-

gelisahkan jiwa dan memerlukan kos yang banyak.

Mungkin kerana menyedari bahawa apa yang Lutfi dedahkan itu benar maka Khir Toyo membantukan diri daripada bertindak ke atas Lutfi. Saluran undang-undang tampaknya cuba dielakkan oleh Khir untuk menyerang balas Lutfi, walaupun beliau dicabar agar berbuat demikian. Lantaran itu Khir bertindak dari luar mahkamah. Penerbitan akhbar 'MEMO' tiruan adalah salah satu caranya menyerang Lutfi.

Sungguhpun begitu ada juga orang tidak faham akan tugas dan tanggungjawab Lutfi itu. Setengahnya mengambil jalan mudah menuju Lutfi ada agenda peribadi menghentam Khir Toyo. Lantas kedengaranlah berbagai cakap-cakap liar mengenai Lutfi, dimana cakap-cakap itu amat songsang dan kontras dengan keperibadian Lutfi yang saya kenali.

Sejak meletus isu Khir Toyo, macam-macam telahan dan spekulasi murahan yang menyumbat ke dalam telinga saya. Semua cakap itu menyenak dan memedihikan gegendang telinga. Antaranya konon beliau diupah oleh pihak tertentu. Lutfi telah diperalat oleh tokoh tertentu. Dalam hal ini nama Datuk Dr Hassan Ali, Naib Yang Dipertua Agung PAS kerap kedengaran.

Mereka yang berkepentingan dengan Khir Toyo menuju Lutfi telah menjadi alat kepada Dr Hassan Ali ataupun bersekongkol dengan Naib Presiden PAS itu, kononnya sengaja mahu menggugat Khir Toyo. Kesimpulan yang mereka buat, Hassan Ali berpaktat dengan Lutfi untuk menjatuhkan Khir Toyo kerana Hassan Ali dikatakan bercita-cita menjadi MB Selangor.

Tanggapan demikian mungkin boleh diterima. Tetapi kalau sesiapa mengenali siapa dia Lutfi serta menilai kerja-kerja jounarlisnya sebelum ini, tidak mudah untuk mempercayai sangkaan demikian.

Tugas Lutfi ialah menjalankan amanahnya selaku penulis, mencari kesalahan fatal Khir Toyo kemudian men dedahkannya. Dan Hassan Ali selaku salah seorang Ahli Dewan Undangan Negeri Selangor menjadi tanggung jawabnya membawa perkara itu ke dalam Dewan Undangan Negeri Selangor. Apa yang berlaku ialah kebetulan semata-mata, apabila hujah (bukti) yang diambil oleh Hassan adalah hujah (bukti) yang didedahkan oleh Lutfi. Kebetulan ini tidak adil untuk dikatakan mereka sepakat.

Bagi saya tuduhan Lutfi diperalatkan oleh Hassan tidak memerlukan jatkan. Tetapi tuduhan mengatakan Lutfi diupah oleh orang Umno menjadikan saya bingkas bertanya sejauh manakah kebenaran tuduhan ini. Apakah Lutfi juga telah menjadi sebahagian daripada penulis politik yang menagih upahan daripada pihak tertentu?

Kononnya seorang tokoh Umno telah mengupah Lutfi supaya mendedahkan rasuah Khir Toyo. Sejumlah wang telah diberikan kepada Lutfi. Tokoh itulah juga yang memberi maklumat kepada Lutfi. Mungkin Lutfi mendapat maklumat dari dalam, ada kebenarannya; sebab fakta dan bukti penyelewengan Khir begitu terang dan jelas sekali. Dan setengah maklumat yang diperolehi itu ada yang dibincangkan dalam mesyuarat Exco Selangor. Tetapi tentang menerima wang adalah fitnah semata-mata.

Saya boleh menerima kalau dikatakan ada tokoh Umno yang bekalkan maklumat kepada Lutfi. Maklumat itu merupakan 'hidangan' penulisan yang cukup baik bagi Lutfi. Apalagi ia adalah untuk kepentingan umum. Tentulah beliau seronok dengan segala maklumat itu, kerana berpeluang membanteraskan satu lagi kemungkaran.

Namun saya tidak yakin Lutfi menerima apa-apa habuan di sebalik pendedahan itu. Risiko yang telah, sedang dan

akan menimpanya tidak setimpal dengan habuan yang dikatakan diterima itu. Sebagai seorang penulis politik saya cukup arif mengenai perkara ini.

Mengapa saya tidak yakin? Selain daripada saya arif mengenai masalah yang sering dilemparkan kepada penulis, saya mengenali siapa Lutfi. Mengenali semangat yang ada kepada dirinya serta tanggungjawabnya sebagai penulis. Saya kenal Lutfi bukan setahun dua, tetapi lebih 15 tahun. Sewaktu beliau di kampus Universiti Teknologi Malaysia (UTM) Jalan Gurney (Semarak) lagi saya sudah mengenali beliau.

Lutfi seorang yang berani dan konsisten (*istiqamah*) dengan prinsip dirinya. Dia tidak mudah untuk larut dalam apa juga tawaran kebendaan. Sejauh pengenalan saya, Lutfi tidak termasuk golongan penulis yang bersedia berkompromi demi sedikit wang, seperti beberapa orang penulis yang mudah menjual prinsip. Semasa di kampus beliau mengorbankan diri (*pembelajaran*) kerana mempertahankan hak dan tuntutan agama, apabila beliau disingkir kerana memperjuangkan purdah.

Jadi bila dikatakan ada tokoh Umno memberi upah, adalah tidak masuk akal. Bagi Lutfi maklumat dalaman itu adalah paling berharga daripada apa yang dikatakan itu. Itulah yang saya kenal tentang Lutfi. Lagipun Lutfi yang saya tahu adalah antara penulis yang tidak ada hubungan mesra diplomatik dengan mana-mana tokoh Umno.

Sudah setahun Lutfi berperang dengan Khir Toyo. Beratus tulisan telah dibuat. Begitu juga dengan laporan kepada Badan Pencegah Rasuah (BPR), dan Suhakam juga diadukan mengenai kebisuan BPR ke atas laporannya. Namun usaha Lutfi masih tidak membawa hasil lumayan. Natijah yang diharapkan oleh orang ramai masih belum

tertunai. Khir Toyo bukan sahaja tidak jatuh, tetapi BPR tidakpun memanggil Khir untuk disiasat, apalagi dibawa ke kandang OKT di mahkamah.

Kebisuan ini tentulah mengecewakan Lutfi sebagai pengadu dan pendedah. Orang ramai juga merasakan bahawa bukti-bukti yang dikemukakan sudah cukup. Mereka merasa hampa dengan pihak berkuasa, terutamanya BPR. Sehingga kini tidak ada penjelasan tuntas oleh BPR tentang laporan Lutfi terhadap Khir Toyo. Mengapa Khir menjadi kebal?

Situasi ini menjadikan orang di sebelah Khir Toyo ter senyum dan merasakan mereka sudah menang. Lantas itu berharap agar Lutfi memberhentikan serangannya. Dan kebisuan BPR itu diterjemahkan sebagai Khir berada di pihak yang benar. Sementara di pihak yang menyokong Lutfi pula (rakyat) merasa muak dan merasakan apa yang Lutfi lakukan itu sia-sia sahaja.

Dalam pada itu ada suara yang menyindir Lutfi agar berhenti. Mereka mengatakan tidak ada guna Lutfi melakukan kerja sia-sia; menyalak bukit, bukit tidak akan runtuh. Buat penat dan kering tekak saja.

Sebagai penulis saya benar-benar tersinggung dengan kata-kata itu. Mereka yang menganggap kerja Lutfi sebagai menyalak bukit sebenarnya tidak dapat membuat penilaian adil kepada Lutfi. Mereka tidak memahami bahawa apa yang Lutfi lakukan sudah cukup bermakna baginya sebagai seorang penulis. Benar Khir Toyo masih menjadi MB. Tetapi pendedahan penyelewengan dan rasuahnya sudah cukup untuk memberi imej tidak baik kepadanya. Belum sampai satu penggal menjadi MB, Khir Toyo telah dibabitkan dengan kes-kes yang selalu berlaku dan dilakukan oleh MB yang berkhidmat bertahun-tahun. Khir Toyo di antara pemimpin

UNDURKAH MAHATHIR?

yang awal disumpit oleh pena penulis politik. Pada saya, Lutfi sudah menang dari segi moral, tetapi kalah dari segi rasa puas, (*satisfy*) kerana Khir Toyo masih belum dihukum.

Adapun kenapa Lutfi menyalak bukit, bukan kerana kebodohnnya seperti yang dianggapkan, tetapi kerana haiwan yang dimangsanya itu sudah lari ke atas bukit yang besar dan tinggi. Malang bagi Lutfi beliau tidak mempunyai kuku yang kuat, taring yang tajam, kuasa yang banyak untuk mengganyangnya. Kerana kedhaifan itu maka cukuplah Lutfi setakat menyalak dari bawah bukit sebagai menandakan ada haiwan buas dan jahat di atasnya.- ©

Rencana ini pernah disiarkan dalam Cabaran, November 2002



AHMAD LUTFI OTHMAN masih sakit dan tidak dapat menghasilkan karya. Agenda Lutfi menyerang dan mendedahkan kebusukan dan penyelewengan Menteri Besar Selangor Khir Toyo tergendala setelah penulis prolifik ini dikatakan menghidapi sakit aneh dan misteri. Justeru ada yang beranggapan bellau terkena sihir orang. Apakah dizaman moden ini sihir menyihir masih wujud. Sukar untuk dipercayai tetapi bagi mereka yang pernah mengalaminya tidak menafikan ada manusia yang sanggup menggunakan jin dan iblis untuk memusnahkan orang lain. Berdoalah untuk kesejahteraan Lutfi untuk membolehkan bellau menyambung tugasnya yang masih belum selesai.



Penutup

13

SEPERTI yang telah diduga awal-awal lagi semakan ke atas keputusan Mahkamah Persekutuan yang menolak rayuan Datuk Seri Anwar Ibrahim pada 10 Julai 2002 yang dijangka didengar oleh penal khas hakim pada 18 Mac lalu telah ditangguhkan dan 14 Julai ditetapkan sebagai tarikh baru.

Ramai yang tidak percaya apabila saya mengatakan kemungkinan semakan itu akan ditangguhkan. Ada yang emosional marahkan kepada saya, kononnya saya sengaja mahu provok para penyokong Anwar.¹¹ Anwar mengemukakan rayuan agar keputusan Mahkamah Persekutuan yang menolak rayuannya pada 10 Julai 2002 berhubung rayuan terhadap hukuman enam tahun penjara yang dijatuhkan oleh Mahkamah Seksyen ke atasnya pada 7 Jun 1999 atas kesalahan liwat disemak semula. Rayuan

itu adalah peluang akhir Anwar dalam usaha membebaskan diri dari tuduhan berkenaan. Sebelum ini Mahkamah Rayuan telah pun menolak rayuan beliau.

Penangguhan semakan kes itu benar-benar mengecewakan penyokong Anwar dan juga Parti Keadilan Nasional. Ekoran penangguhan itu harapan penyokong Anwar untuk melihat beliau bebas hampa. Sebelum ini para penyokong Anwar menaruh harapan besar penal khas hakim bersidang untuk menyemak keputusan Mahkamah Persekutuan itu. Mereka membayangkan sekiranya penal khas hakim itu menerima rayuan itu, Anwar akan bebas.

Kandatipun Anwar masih menjalani hukuman penjara sembilan tahun di atas kesalahan liwat, mereka mengira Anwar akan dibebaskan kerana hukuman itu boleh diikat jamin. Kumpulan kempen bebaskan Anwar berhujah kes kedua itu masih dalam rayuan dan ia boleh diikat jamin. Keyakinan itu berdasarkan kes-kes sebelum ini dimana pesalah sementara menanti rayuan dibenarkan diikat jamin. Anwar menjadi pesalah pertama yang tidak dibenarkan ikat jamin!

Berlandaskan hujah itulah mereka yakin Anwar boleh dibebaskan pada 18 Mac lalu. Tetapi apabila kes semakan itu ditunda, menyebabkan harapan mereka hampa. Kini mereka menaruh harapan besar kepada 14 April 2003, dimana menurut *firasat maknawi* mereka pada tarikh itu Anwar akan dibebaskan.

Pada tarikh itu Anwar sudah genap menjalani hukuman penjara terhadap kes pertamanya penjara selama enam tahun. Walaupun tidak mencukupi enam tahun, namun selepas ditolak 1/3 Anwar sudah boleh keluar. Persoalan sekarang ini apakah angan-angan itu akan tercapai? Apakah Anwar akan mendapat perlepasan 1/3 itu. Persoalan juga

timbul kalau Anwar mendapat perlepasan 1/3 dan dibebaskan, tetapi beliau masih terikat dengan hukuman kedua iaitu penjara sembilan tahun. Sekiranya polis tidak memberi ikat jamin, Anwar terpaksa juga meringkuk di dalam penjara.

Saya tidak mahu bercakap mendahului takdir Allah, kerana itu sikap orang takbur dan sompong. Tetapi jika dilihat kepada situasi hari ini sukar untuk melihat Anwar berada diluar. Andainya Anwar bebas pada 14 April ini, tetapi kes kedua akan mengikat beliau. Saya tidak nampak polis yang dikuasai Pemangku Perdana Menteri (Dollah Badawi) bersedia untuk membebaskan Anwar. Anwar tidak akan bebas selagi Mahathir menjadi PM dan juga selaku 'pemangku PM' sebenar.

Sehubungan itu kumpulan yang menjalankan kempen bebaskan Anwar telah mengaturkan pelbagai program untuk pembebasan Anwar. Ini termasuklah ceramah, *road show* dan sebagainya. Tarikh 14 April di mana Anwar disumbat ke dalam penjara telah dijadikan tarikh istimewa dan mereka akan membuat sesuatu untuk mengingatinya bila setiap kali tiba tarikh berkenaan.

Zulkifli Nordin salah seorang peguam dan mengakui peguam bela Anwar dalam ceramahnya pada 6 Mac di Taman Melewar begitu optimis mengenai pembebasan Anwar pada 14 April. Apa yang mengejutkan beliau memeritahu yang waran pembebasan itu sudah pun berada ditangannya. Pendedahan itu benar-benar mengejutkan. Kononnya Pengarah Penjara Sungai Buloh telah mengeluarkan waran itu awal-awal lagi untuk mengelakkan gangguan pihak-pihak tertentu yang tidak mahu lihat Anwar bebas. Apa yang menjadi tanda tanya sejauh manakah kata-kata Zulkifli itu benar dan boleh dipercayai?

Orang ramai yang hadir malam itu bersorak gembira apabila Zulkifli mengumumkan berita itu. Apakah prosedur pembebasan seseorang tahanan itu waran pembebasannya diberikan awal-awal lagi? Menurut seorang lagi peguam Anwar waran yang dimaksudkan Zulkifli itu sebenarnya wujud sejak awal lagi. Sebaik seseorang yang diperintahkan menjalani hukuman, mereka akan diberikan waran kebebasan. Dalam waran itu akan dicatat tempoh lama mana seseorang itu kena menjalani hukuman. Dan diwaran itu juga menyatakan tempoh pembebasan selepas ditolak 1/3 hak istimewa kerana berkelakuan baik. Menurut peguam berkenaan, tidak timbul waran itu baru diberikan oleh pihak penjara kerana ia telah diberikan sejak awal dulu – sewaktu Anwar mendaftar diri untuk menjalani hukuman.

Soalnya sekarang ini mengapa berlaku sedemikian? Apakah Zulkifli tidak tahu mengenai prosedur berkenaan? Atau beliau sengaja membuat pengumuman itu untuk membakar semangat orang ramai? Satu provokasi murahan? Atau sememangnya beliau tidak tahu prosedur penjara dan peraturan mahkamah? Barang kali wajar kalau sijil praktiknya disemak semula untuk mengesahkan *qualification* peguam itu.

Pada saya apa yang dilakukan oleh peguam muda yang baru belajar pidato itu tidak patut. Tidak sewajarnya beliau membuat pengumuman seumpama itu. Paling tidak wajar ialah apabila mengatakan Pengarah Penjara Sungai Buloh – kononnya memberitahu, pihaknya tidak ada apa-apa masalah. Kalau pun benar pengarah memberi tips demikian tidak bijaksana beliau mendedahkan perkara itu kerana ia boleh menjelaskan pegawai berkenaan.

Saya rasa apa yang diperkatakan Zulkifli itu adalah rekaannya. Sebab keesokan harinya Pengarah Penjara,

Dato' Mustapa Othman telah membuat penafian mengenai perkara itu. Lebih memedihkan lagi dalam penafian itu beliau menyebut Anwar akan menjalani hukuman penjara sehingga 2009. Ini bererti hak istimewa 1/3 yang sepatutnya diterima Anwar dinafikan.

Mengikut sistem penjara perlepasan 1/3 diberi kepada banduan yang berkelakuan baik. Apabila Anwar tidak dibebaskan pada 14 April 2003 nanti di mana hari genap tempoh beliau menjalani hukuman penjara apakah boleh disifatkan Anwar tidak berkelakuan baik di dalam penjara? Apakah kontroversi dan kerentan Anwar demam, sakit dan sebagainya digolongkan dalam aktiviti tidak berkelakuan baik. Begitukah? Atau apakah juga boleh dianggap Anwar tidak memberi kerja sama kepada penjara apabila para penyokongnya terus-terusan membuat tohmahan buruk kepada penjara?

Kesimpulannya mengapa Anwar tidak dibebaskan pada tarikh yang diharapkan bolehlah disifatkan kempen yang dijalankan gagal. Kempen yang dilancarkan itu tidak berkesan. Atau memberi keinsafan dan menarik simpati kepada pihak berkuasa. Kempen itu gagal untuk membangkitkan sesuatu yang boleh menyebabkan pihak berkuasa membuat semakan ataupun pembetulan di atas kesilapan mereka? Tidak ada guna kempen 'uar-uar' tetapi orang yang dituntut bebas tetap juga diperkasamkan di dalam tembok batu.

Mungkin elok kalau mereka yang terlibat dengan program kempen bebaskan Anwar mengkaji balik kesannya. Sejauh manakah ia memberi kesan dan kebaikan. Apakah strategi kempen ala propaganda dan provokasi itu telah memakan diri?

Berdasarkan kepada kemungkinan itu, kempen itu

hendaklah diubah cara dan taktik. Mungkin kempen secara terbuka menguar-uarkan maklumat yang tidak benar tidak sesuai. Satu bentuk kempen lain perlu difikirkan. Mungkin secara psikologis atau merendah diri.

Kempen secara senyap mungkin munasabah. Kempen yang lebih adil dan lebih lunak. Misalnya jangan mengaitkan mana-mana pihak berkuasa kononnya telah atau akan membantu Anwar. Hakikat Anwar adalah seorang narapidana dan statusnya sama dengan puluhan ribu narapidana lain hendaklah di terima. Pembebasan Anwar tidak wajar dikaitkan dengan sesiapa. Cerita-cerita kononnya orang itu hendak tolong dan sebagainya tidak perlu diheboh-hebohkan. Keyakinan sepenuhnya kepada penjara hendaklah diberi.

Rakyat juga jangan ditipu dengan isu seperti pembebasan itu. Benar semua gimik itu boleh membakar semangat tapi kalau ia acap sangat digunakan menyebabkan rakyat akan merasa tertipu. Bila rakyat atau orang ramai hilang kepercayaan, sesuatu yang benar-benar berlaku pun akan ditolak.

Tidak dinafikan mengenai kotak rahsia mengenai penyelewengan Kerajaan yang didedahkan Ezam Mohd Nor, khabar angin kemungkinan Anwar disuntik dengan virus AIDS, keracunan arsenik dan sakit kronik seperti mana yang dilaporkan oleh Zulkifli Nordin boleh menarik perhatian rakyat. Tetapi apakah dibuat penilaian semula sejauh manakah "cerita muluk" seperti itu membantu proses pembebasan Anwar?

Seperti saya nyatakan tadi pihak yang menaja, menjana program pembebasan Anwar perlu menukar taktik dan strategi lain. Pada saya mata lebam Anwar adalah satu-satu subjek yang cukup relevan dan boleh meronta jiwa dan

perasaan. Kenapa soal mata lebam tidak dijadikan lambang kepada kezaliman dan ketidak adilan di negara ini?

Akhirnya saya pohon maaf kepada semua pihak khasnya mereka yang terlibat secara langsung dengan kempen pembebasan Anwar. Percayalah peranan saya membuat preview ini pun termasuk dalam rangka untuk membebaskan bapa reformis itu, Anwar bin Ibrahim.

Penutup ii.

Soalan untuk diselesaikan oleh Pak Lah semakin hari semakin bertambah. Menunggu Dr Mahathir selesai bercuti mungkin sederet soalan dan permasalahan yang terpaksa Pak Lah hadapi. Sesuai dengan peperiksaan akhir soalan yang dikemukakan kepada Pak Lah bukan soalan mudah. Bukan lagi soal berbentuk objektif memilih *a*, *b*, *c*, dan *d*. Tetapi solan subjektif dimana memerlukan kebijaksanaan serta pengetahuan yang luas didalam menghuraikan persoalan. Sudah tentu kalau Pak Lah tidak mempunyai maklumat, pengalaman ataupun penasihat yang cekap beliau akan gagal dalam memberi jawaban ataupun jalan penyelesaian kepada permasalahan yang dihadapinya.

Sekurang-kurang ada dua persoalan besar yang perlu penyelesaian segera Pak Lah. Soalan ini seperti sengaja dicampaknya untuk menguji sejauh mana ke mampuan Pak Lah. Soalan atau masalah itu ialah, per balahan didalam parti MCA, keretakan hubungan kerajaan Malaysia dengan kerajaan India dan ketiga kempen monogami yang dilancarkan oleh isterinya Endon Mahmod.

Soalan atau masalah pertama benar-benar menguji keupayaan Pak Lah sebagai bakal Presiden Barisan Nasional. Masalah yang berlaku di dalam MCA itu juga memberi simbol sejauh mana Pak Lah dapat menyelesaikan

masalah *multi-nation*. Atas kedudukannya selaku Presiden Barisan Nasional yang mempunyai pelbagai parti, anutan agama, ideologi politik, krisis MCA itu mencabar keupayaan Pak Lah.

Perpaduan di dalam MCA sangat penting khususnya menjelang pilihan raya umum ke 11. Semakin hari masalah dalam MCA makin bercelaru. Keretakan hubungan di antara Presiden dan timbalannya, Ling Liang Sik dengan Lim Ah Lek boleh mencambahkan bibit-bibit perpecahan lebih besar di dalam parti berkenaan. Pendedahan Ketua Pemuda, Ong Tee Keat tentang wujudnya kongsi gelap dalam MCA cukup membimbangkan. Pendedahan itu bukan sahaja mencemarkan MCA tetapi turut terpalit kepada BN.

Ling Liang Sik begitu bereng dengan pendedahan itu sampai memberi kata dua kepada Ong Tee Keat. Dan tindakan terbaru untuk menghadapkan Ong Tee Keat kepada jawatankuasa disiplin yang memungkinkan Ong Tee Keat disingkir dari MCA menunjukkan kedua mereka mereka tidak ada jalan damai lagi.

Perpecahan didalam MCA mencemas dan menemarkan BN. BN boleh tergugat dengan gelaja itu. Sebelum ini Dr Mahathir telah mengemukakan satu formula agar kedua puak itu berbaik namun ia tidak menjadi kenyataan. Mereka berbaik di hadapan Mahathir tetapi bergaduh semula di belakangnya. Kalau Mahathir yang dihormati oleh semua pihak pun gagal untuk menyatukan MCA, apa lagi Pak Lah. Sekiranya benar cakap-cakap mengatakan Ling Liang Sik mengingatkan Pak Lah menjaga kerusinya agar jangan diambil Najib benar, ia merupakan tampanan kepada Pak Lah. Ling Liang Sik nampaknya tidak menghormati Pak Lah.

Perkara kedua yang sedang berhadapan dengan Pak Lah ialah, mengenai dakwaan pihak polis telah bertindak kurang

ajar ke atas warga negara India. Ekoran insiden itu menyebabkan hubungan India dengan Malaysia keruh. India telah bertindak menarik diri daripada kejohanan hoki antarabangsa yang dijadual berlangsung di Malaysia. Tidak cukup itu India juga turut mengugut untuk membatalkan urusan perdagangan dengan Malaysia. Apakah isu sebenar disebalik insiden berkenaan?

Satu perkara yang perlu ditanyai, mengapa Pak Lah lambat menyelesaikan perkara itu. Lentingan kedutaan India itu memberi petunjuk Pak Lah lambat bertindak. Walaupun perkara itu tidak menjelaskan kedudukan Pak Lah dan masa depannya sebagai orang bakal akan mengambil alih tempat Mahathir. Dakwaan polis bertindak kurang ajar sungguh mendukacitakan. Ia juga menjelaskan Pak Lah selaku Menteri Dalam Negeri yang bertanggungjawab mendisiplinkan polis?

Soalan atau masalah terbaru setakat hari ini (19 Mac 2003) ialah ialah mengenai kempen; Satu Suami : Satu Isteri, projek gabungan 12 kesatuan Wanita Dalam Islam. Walaupun masalah itu adalah masalah emosi kaum wanita kerana egois mereka, namun ia memberi kesan secara tidak langsung kepada Pak Lah. Ini disebabkan perlancaran kempen kontroversi itu dilakukan oleh isterinya Datin Endon Mahmod.

Sebagai orang Islam, umum melihat kempen yang dilakukan itu tidak bersesuaian sekali. Bukan setakat itu sahaja ia juga menyentuh mengenai hukum Islam. Di antara yang terkandung dalam kempen berkenaan, gabungan itu mendesak supaya mahkamah membenarkan hak taklik kepada isteri yang tidak sanggup dipoligami. Cadangan itu dianggap sebagai tindakan menghina hukum Islam yang menghalalkan poligami. Ia mendapat tentangan semua Mufti

di negara ini yang menganggap ia bertentangan dengan hukum syarak dan menjelaskan akidah umat Islam.

Selaku isteri kepada seorang pemimpin yang lahir dari rahim ulamak, Endon tidak sepatut turut sama bersuhabat dengan projek-projek seumpama itu. Memang benar Endon hanya melancarkannya. Mungkin beliau tidak boleh mengelak bila dijemput. Tetapi sepatutnya Endon fikir akan implikasinya. Beliau seharusnya menghormati Pak Lah sebab orang kenal Pak Lah sebagai pemimpin berimej Islam.

Apabila Endon bersubahat dengan projek itu menyebabkan orang boleh tuduh macam-macam kepada Pak Lah. Sebelum ini pun orang mempunyai persepsi negatif terhadap Pak Lah dalam berhadapan dengan isterinya. Walaupun Endon mengakui kejayaan beliau membina rumah tangga bersama Pak Lah selama 40 tahun tetapi kejayaan itu masih diragui.

Seharusnya dalam saat krtikal ataupun period peralihan kuasa yang cukup mencemaskan, Endon tidak melakukan kerja-kerja kontroversi demikian. Walaupun apa yang dilakukan Endon itu bukan membabitkan masalah negara, tetapi ia cukup memberikan imej yang tidak menyenangkan Pak Lah. Keberanian Endon bertindak begitulah juga menyebabkan orang akan mengambil kira sejauh mana kemampuan Pak Lah untuk menjadi Perdana Menteri. Dan apabila disaat akhir Pak Lah hendak mempengerusikan mesyuarat Majlis Tertinggi Umno pada 21 Mac tiba-tiba Mahathir terjolor pulang lantas mempengerusikan mesyuarat tersebut. Insiden ini menambahkan lagi dilema Pak Lah untuk menjadi Perdana Menteri. - © 22 Mac 2003 Jam 2.00 PM.